

Bádha Ngali  
 gba Yesu Kilisito maka li  
 Luka  
 aye lie ko  
 Eli na kalanu

Bádha Ngali gba Yesu Kilisito maka li Luka aye lie ngasuno Yesu maka Mukobho inde li Ebhe apa nani me ni aha e pi piga gba omatsalaele la di ne pi ndu opiga na píla doto hana. Luka ngakpokpo me Bu Bhobua gba Ngámá-a a'i nani Yesu ngubula nakpokpo Bádha Ngali pi obhulu ndibhili (4:18). La, Bádha Ngali ango-o abedhe ne ndjinga bhú e pi okpála inde bhú o ne omulopolo gba o hana. Engú na ndjili abhú bhuku gba Luka ngbéngbé ane la mane bhú oalo na kalanu inde ngakpokpo 'ngú nago gba Yesu. Engú na djali ango-o ane matá mane bhú 'so 'kpí nedhinga na'u ka Yesu abhúlá. A ko bha Luka bini inde akpokpo 'ngú bhú bhuku na Kulu gba obhulu titima gba Yesu pindji nabhele a la di-e nayangba ka nabhuka bhú Kilisito pita na'u ka Yesu abhúlá-o.

Bhú Bádha Ngali inde-e, u ngagama 'ngú naali pindji mayo, ne pindji Bu Bhobua, ne pindji kulu gba olisi bhú kulu gba Yesu, di ne lele maka li Ebhe ngambu li sisiti 'ngú gba okpála lie-o.

Ongbengbe ongú inde bhú bhuku inde-e ngae inde:

Eli na kalanu 1:1-4

Nazu lie ne nadu bhú ndili lie gba Djaa bhulu nabatisa okpála di ne Yesu 1:5 - 2:52

Kulu gba Djaa bhulu nabatisa okpála 3:1-20

Batisimo di ne nale inde li Djabulu ale Yesu ne e-o 3:21 - 4:13

Kulu inde li Yesu amene e bhú ká okpála bhú Galilaya 4:14 - 9:50

Dhuku gba Yesu nayie bhú Galilaya ngú nanu abhú Yelusalema 9:51 - 19:27

Oekpí nasoso gba Yesu abhú Yelusalema 19:28 - 23:56

Nazuku gba Yesu, ne nakoto ka aní li okpála, a la di-e na'u ka aní abhúlá-o 24:1-53

### Lita 'ngú-o

<sup>1</sup> Ndai ma na mukunda Tiofile,

Okpála bhelé ale naye todú na ongú inde akodho 'kpí bhú ká ya-o. <sup>2</sup> U aye ongú angó-o maka li okpála inde au nayie li lilita-a, akpokpo pí ya lie ko. A ko okpála inde adú nakpokpo eli gba Ebhe-o. <sup>3</sup> Kaka-a, ngama di-e, píta nagili 'ngú tété má bhotobhoto nayie li dudu-o, ma au ndjindji me, ma kpokpo kúkú pí mú li lelele, bhele kpála Tiofile, maka li ongú angó-o akodho 'kpí lie ko. <sup>4</sup> Ma kpokpo kúkú pí mú, amba mú mbila kukulu 'ngú na ongú inde u asuno e pí mú ko.

### Andjelu apa me u azú Dja bhulu nabatisa okpála

<sup>5</sup> Bhú nedhinga li Elode adú lie 'ngbé ngámá na ndu doto na Yudaya-a, dimandó bini gba Ebhe-e adú oo. A adú 'li aní me Djakalia, aní adú bhú libi odimandó gba Abia. A adú 'li wala aní me Alidjabheti, aní adú bhú piga gba 'ngbé dimandó Alona. <sup>6</sup> Ndu uo bhisi hana adú bhú djila Ebhe ngbingbili. U atsia adú amene ndu líli gba Ngámá Ebhe-e hana. <sup>7</sup> Engú bini, ndili dú ka uo de, anga Alidjabheti adú ne izude. La di-e, u adú ndu o bhisi hana me u nde agbegbe.

<sup>8</sup> Ekpí bini, Djakalia adú amene kulu na dimandó gba e kala Ebhe, anga adú ekpí na libi gba uo-o ngú namemene.

<sup>9</sup> Maka li odimandø adu amemene lie, Djakalia atsia asia ngasa ngu nanu natsulu mungotsi pi Ebhe abhu 'ngbé 'ti gba Ngámá Ebhe, bhú titina na bubu-o. <sup>10</sup> Nedhinga ani adu atsutsulu lie, ndu okpála hana adu ayo Ebhe akilidjo.

<sup>11</sup> Abhomu-o, kolo má gala me-e, andjelu gba Ngámá Ebhe-e akoto li ani. Ani alu de bili natsulu mungotsi-e ne li pápá na kokpa. <sup>12</sup> Li Djakalia au ani lie me-e, tsulu aholo amene ani, mabhundja gba ani-e atsia angbingi. <sup>13</sup> Engú bini, andjelu-o apa pi ani me: «Djakalia, mo odje tsulu de, anga Ebhe adje nayo gba mu-o adje. Wala mu Alidjabheti azú pi mu ndili na bhobhoko. Mo ogisila 'li ani me Djaa . <sup>14</sup> Mo odú ne djali naali, li okpála bhelé tsia kpi di djali ka nazu ani-o. <sup>15</sup> Ani adú 'ngbé kpála bhú djila Ebhe. Ani ndjí vino de, ani ndjí di pandi na kpekpeke de. Ani abédhe ne Bu Bhobua me ani nde nga bha bhú 'bu 'hi e. <sup>16</sup> Ani agie ongisi na tsalaele bhelé li pápá gba Ebhe, Ngámá gba o-o. <sup>17</sup> Ani adú amene kulu kala Ebhe bhú dabili bini ne bua di ne angu maka Polofeta Eliya. Ani aléke engú sunda odyi ongisi ne ongisi gba o-o. Ani adjí mabhundja gba okpála na kpekpeke 'ndji, u tsia kólo ngbingbili,† ngubula naleke okpála inde bedhe pi Ebhe Ngámá.»

<sup>18</sup> Abhomu-o, Djakalia ayi andjelu-o me: «Ma ambíla la lele pi me a ko kukulu 'ngú-o? Padhá de, anga ma agbe, wala ma akolo la di ne kalanga bhelé.» <sup>19</sup> Andjelu-o atsia agie pi ani me: «Ngama-a, ma ne Gabriele, ndu 'kpí hana ma dudu de Ebhe. Ani atima ma me ma go kpokpo bádha ngali inde-e pi mu. <sup>20</sup> Engú bini, li mu bhuka engú ma apa e pi mu-o lie de-e, kaka-a, 'bhø mu aní, mu tí da nagama 'ngú belegu de bini akólo li 'kpí li ongú ango-o

† 1:17 1:17 Tsia bhú Mal. 3:23-24.

améne lie lie ko. Engú inde améne lie na paká li nedhinga li Ebhe a'o e-o.»

<sup>21</sup> Li nedhinga bhomu-o, okpála adu adjeke Djakalia, u adu angamba ka ani adu abhue lie bhú 'ti Ebhe oo naali-o. <sup>22</sup> Ani akoto lie, ani ale nagama 'ngú pi uo pima. Abhomu-o, u atsia ambila me oo, ani au engú na ngangamba gba Ebhe-e au. Ani adu asuno 'ngú pi uo ne 'kpa e, ani ti da nagagama ne 'bhø e de.

<sup>23</sup> Li nedhinga na kulu gba ani andjia lie, ani atsia agie lie agba e. <sup>24</sup> Pita nedhinga bhomu-o, wala ani Alidjabheti atsia abi 'bhi. Ani awo nga bha lie ngubula epe bhuluvue libhomu. Ani adu apa me: <sup>25</sup> «Tsia nga engú inde li Ngámá Ebhe amene e mu-ma-o. Ani abhundja ma. Mbia inde-e, ani a'e ehe inde nako adu aha nu-mu mu-ma bhú ká djila okpála a'e.»

*Andjelu akpo 'ngú pindji nazu Yesu*

<sup>26</sup> Li ebhi gba Alidjabheti akolo lie ne epe madhia-a, Ebhe atima andjelu Gabriele bhú kuti bini na ndu doto na Galilaya, inde 'li e me Nadjaleta.\* <sup>27</sup> Ani atima ani gba tsangba bini inde adu adjeke naha lie ne bhoko bini. A adu 'li bhoko ango-o me Djodjefu , ani adu bhú piga gba 'ngbé ngámá Davidi. Tsangba ango-o, a adu 'li ani me Malia . <sup>28</sup> Andjelu-o ali agba ani, ani atsia ayi ani me: «Mu oo! Ngamu inde asia bádha bhú 'bu gba Ebhe-e , Ngámá Ebhe bhú dabili bini ne mu.» <sup>29</sup> Malia angamba ka eli bhomu-o naali. Ani adu ayi bua e me: «Ta nayi inde-e pi?» <sup>30</sup> Abhomu-o, andjelu-o atsia apa pi ani me: «Malia, mo odjé tsulu de, anga mo osia bádha bhú 'bu gba Ebhe-e asia. <sup>31</sup> Tsia nga, mo obí 'bhi, mu zú ndili na bhobhoko,

\* <sup>1:26</sup> 1:26 Nadjaleta: Nayie bhú Yelusalema akólo bhú Nadjaleta-a, a ko kilometele kámá bini. Tsia bhú Luk. 1:19.

mu tsia gísila 'li ani me Yesu. <sup>32</sup> Ani adú 'ngbé kpála, u tsia dú a'í ani me, Ndili gba Apí 'Kpí. Ebhe Ngámá a'ó me ani u maka ogbi e Davidi. <sup>33</sup> Ani aú duduma ne duduma pí piga gba oma<sup>s</sup>alaele. Nau gba ani-e ndjía de.»

<sup>34</sup> Malia atsia ayi andjelu-o me: «Engú ango-o améne lie lele pí? Padhá de, anga ma kunda nga naama bhoko del!» <sup>35</sup> Andjelu-o agie pí ani me: «Bu Bhobua agó pí mu, li angu gba Ebhe Apí 'Kpí búku mu maka kulu zini. Kaka-a, ndili inde mo ozú e adú bubu, u atsia dú a'í ani me, Ndili gba Ebhe. <sup>36</sup> Tsia nga okala mu Alidjabheti di ne ebhi. Ani azú ndili na bhobhoko, abana ani nde lie ne kalanga bhelé. Kpála nako u adu a'í e me izude-o. Mbia inde-e, ebhi gba ani-e ibili ne epe madhia, <sup>37</sup> anga kpéke da 'ngú pí Ebhe belegu ade bini.» <sup>38</sup> Abhomu-o, Malia atsia apa me: «Ma ne bali gba Ngámá. A ayo me ndu 'ngú mo opa e hana, a mene lie muma moko.» Pipita-a, andjelu-o atsia atapa.

### *Malia anu natsia Alidjabheti*

<sup>39</sup> Bha bhú oekpí bhomu-o, Malia ayie, ani anu má gala bhú kuti bini na ndu doto na ndu ká eta na Yudaya. <sup>40</sup> Ani akolo lie oo, ani ali bhú 'ti gba Djakalia, ani atsia ayi Alidjabheti. <sup>41</sup> Li Alidjabheti adje maka li Malia ayi ani lie me-e, ndili-e atsia atili bhú 'bu ani. Abhomu-o, Alidjabheti atsia abedhe ne Bu Bhobua. <sup>42</sup> Ani atsia asula kpekpeke me: «Ebhe aha bisagu pí mu ane ndu olisi hana, bisagu gba ani-e di pí ndili inde mo ozú e-o! <sup>43</sup> Ma ne da me 'hi Ngámá gba ma-a go tsia ma-a? <sup>44</sup> Tsia nga, li nedhinga inde ma adje maka mo oyi ma lie me-e, ndili inde bhú 'bu ma-a atili ne djali hana. <sup>45</sup> A ko djali pí mu, ngamu  $\theta\theta$  inde abhuka! Padhá de, anga engú inde li Ebhe apa e pí mu-o, améne lie mamene.»

### *Etsi gba Malia*

- 46 Abhomu-o Malia atsia atoko Ebhe me:  
«Bua ma ngadhogθ Ngámá,  
47 bua ma abedhe ne djali pi Ebhe Mukobho gba ma-  
o,  
48 anga ani abhundja ma, bali gba e-e ko.  
A moko, nayie pi mbia inde-e,  
ndu opiga hana adu a'i ma me,  
ma ne θθ inde asia bisagu ka Ebhe,  
49 anga Ebhe na Angu amene ongu na ngbengbengbe  
muma.  
A ko Ebhe na bubu,  
50 ndjinga gba ani-e ngadu duduma ne duduma pi  
okpala inde ngakpe ani ko.  
51 Ani amene ngbengbe 'ngu ne angu gba e-o.  
Ani atsambala okpala na 'ngbé bua.  
Ani atsia amene me mabhundja gba uo-o kolo padhá.  
52 Ani akθ ongbengbe ongámási ne kuto,  
ani atsia a'e'e okpala na padhá ne abhúlá.  
53 Ani aha ehe bhelé pi obhende adu ne gumu-o,  
ani atsia agie obhulu tia ne 'kpa o padhá.  
54 Ani ateteke omatsalaele, obalise gba e-o.  
Ani 'ili 'to e de li nasuno bádha 'ngu gba e ndu 'kpi  
hana,  
55 maka nani ani apa lie pi onguo ogbi ní Abalahama  
ne opiga gba e-o.»  
56 Malia asi ne Alidjabheti masakpe de epe bata. Pipita-  
a, ani atsia agie lie agba e.

Alidjabheti azu Dja

- 57 Li nedhinga nazu ka Alidjabheti akolo lie, ani atsia  
azu ndili na bhobhoko. 58 Li okpala inde asili kuti dengo  
ani-e, di ne obhe na piga gba ani-e adje lie me, Ebhe adje  
bha ndju ndjinga ani-e, u atsia adu akpi djali bhú dabili  
bini ne ani.

<sup>59</sup> Pita poso bini-e, u ago ngú nato ndili-e bhú gandja. U adu akunda nagisila 'li 'dyi ani Djakalia. <sup>60</sup> Abhomu-o, 'hi ani atsia apa me: «A mo-o ade, adú 'li ani me Djaa.» <sup>61</sup> U atsia apa pi ani me: «Bhú piga gba mu-o, kpála bini inde ne 'ili bhomu-o ade.» <sup>62</sup> Abhomu-o, u atsia amene 'kpa o pi 'dyi ani ngú nayi ani me ani akunda me u gisila 'li ndili-e pi. <sup>63</sup> Djakalia amene 'kpa e pi uo me u go pi ní ne pála ndula, ani atsia aye pépé me: «A 'li ani me Djaa.» Ndu uo hana atsia angamba naali. <sup>64</sup> Bha li nedhinga bhomu-o, 'bhe ani abhulu, ani aholo nagama 'ngú, di ne nadhoghe Ebhe. <sup>65</sup> Abhomu-o, ndu okpála hana inde asili kuti lingo uo-o, aholo adje tsulu. Ngali na engú angu-o atsia aya bhú ndu doto na ndu ká eta na Yudaya libhomu. <sup>66</sup> Ndu okpála hana inde adu adjedje-e, adu abhundja pépé, u atsia adu apa me: «Mbo! Ndili angu-o, adú-e maka da?» Angu gba Ebhe-e adu bha ndju bhú dabili bini ne ani.

*Djakalia* akpokpo ngbengbe 'ngú gba Ebhe

<sup>67</sup> Djakalia, 'dyi ndili-e, abedhe ne Bu Bhobua. Abhomu-o, ani atsia aholo nakpokpo 'ngú maka polofeta me:

<sup>68</sup> «A ayo me, u dhoghe Ebhe,  
Ngámá gba omatsalaele-o,  
anga ani abhundja okpála gba e,  
ani atsia agbegbe uo bhú bali.

<sup>69</sup> Ani atima kpála na angu bini  
bhú piga gba Davidi, bali gba e, ngú nakobho ya.

<sup>70</sup> A bhomu-o engú inde ani apa nani e didili bhú 'li obubu opolofeta gba e-o.

<sup>71</sup> Ani apa nani me, ni akóbho ní sa 'kpa ndu obhulu yala gba ní-e hana,  
di ne obhende ngakunda amene ní sisiti-o.

- 72 Anì adje ndjinga onguo ogbi ní,  
anì atsia abhundja di gandja na bubu gba e-o.
- 73 Silika nanì inde anì atụ e pì ogbi ní Abalahama-a,  
anì améne pì ní mamene.
- 74 Pita nakobho ní sa 'kpa obhulụ yala ngubula me ní  
améne kulu pì nì ne tsulụ de,
- 75 amba ní dhogò nì ne bua ní hana.  
Ní dụ di bhú djila nì ngbingbili  
ndụ 'kpí hana bhú mukobho gba ní-o.
- 76 Pì mụ-o, ndika ma, u adú a'i mụ me, polofeta gba Apí  
'Kpí,  
anga mo onú kalanụ  
ngú naleke kpadji gba Ebhe-o.
- 77 Mo osúno pì okpála gba anì-e me, anì a'é siti 'ngú inde  
bhú uo-o ma'e,  
anì tsia kóbho di uo.
- 78 A ko anga Ebhe gba ní-e abedhe ne ndjinga bedhe,  
kaka-a, anì atíma zì 'kpí pí ní maka zì 'ndji 'la na  
kòkpí.
- 79 Anì asúno lie pì obhende bhú biti di ne obhende ne  
tsulụ kuo,  
ngubula me ní dhuku li kpadji na guo 'ngú .»
- 80 Ndili-e adụ abhele, anì atsia adụ asia kpéke bua. Anì  
adụ nadụ bhú omili bili akolo li 'kpí inde anì asuno lie  
lie mbámbá pì omaṣalaele ko.

## 2

*Malia* azu Yesu  
(*Tsia bhú* Mat. 1:18-25.)

- <sup>1</sup> Li nedhinga bhomu-o, Agosite, 'ngbé ngámá na Loma  
, aha líli me u ye 'li okpála hana inde pía doto gba nì-o.
- <sup>2</sup> Gina naye 'li okpála ango-o amene lie me Kiliniusi nde  
ne 'ngbé ngámá na Silia. <sup>3</sup> Ndụ okpála hana adụ anụ me



u ye 'li o. Abhomu-o, kpála ne kpála atsia anu bhú kuti u azu ani bhú e ko.

<sup>4</sup> Djodjefu ayie bhú kuti na Nadjaleta, bhú ndu doto na Galilaya, ngú nanu bhú ndu doto na Yudaya, bhú kuti inde u a'i e me Beteleme. A ko bili inde u azu 'ngbé ngámá Davidi lie-o, anga ngaani makpe, ani du nani bhú piga gba Davidi ko. <sup>5</sup> Ani anu oo me u ye 'li ni, bhú dabili bini ne Malia , 00 inde ani adu adjeke naha e ko. 00 ango-o adu ne ebhi. <sup>6</sup> U adu lie abhú Beteleme-e, ekpi nazu ka ani atsia akolo. <sup>7</sup> Ani azu ndili na bhobhoko, gina ndili gba e ko. Ani agagala ani ne bongo , ani atsia aseke ani bhú ehe nazu 'he gba onu, anga dabili du pi uo bhú 'ti gba ogomago-o de.

*Andjelu akpokpo bádha ngali pi omulila gba okand00*

<sup>8</sup> Bha bhú ndu doto bhomu-o, omulila gba okand00 adu asili abhú 'gu ngú nalila onu gba o-o. <sup>9</sup> Andjelu gba Ebhe-e akoto li uo. Sangu gba Ebhe-e asa uo ngbalina maka zi 'kpi. Abhomu-o, u atsia adje tsulu naali. <sup>10</sup> Engú bini, andjelu-o apa pi uo me: «Yi adjé tsulu de, anga ma ago akpokpo pi yi bádha ngali inde ahá djali naali pi ndu okpála hana. <sup>11</sup> Naki bhú kuti gba Davidi-e, u azu Mukobho pi yi. A ko Kilisito , Ngámá. <sup>12</sup> Yi tsia 'he inde yi ambila ani ka e ko: yi abháka ndje ndili u agagala e ne bongo, u atsia aseke e bhú ehe nazu 'he gba onu.» <sup>13</sup> Kolo má gala me-e, bhiti oandjelu ayie abhúla, u ago abhaka andjelu bhomu, u atsia adu adhog0 Ebhe me:

<sup>14</sup> «Sangu pi Ebhe inde abhúla,  
guo 'ngú gba ani-e du píla doto pi okpála  
inde ani akunda o ko!»

*Omulila anu abhú Beteleme*

<sup>15</sup> Li oandjelu-o agie lio lie abhúla-a, omulila atsia apa sunda o me: «Ní nu kolo nga bha abhú Beteleme, amba ní

u engú inde akolo oo, engú inde li Ebhe Ngámá asuno e pi ní ko.»<sup>16</sup> U anu bhú holo, u abhaka Malia, Djodjefu ne mboye ndili-e me u nde aseke ani bhú ehe nazu 'he gba onu.<sup>17</sup> U au ani lie, u atsia akpokpo 'ngú inde li andjelu apa e pi uo pindji mboye ndili bhomu-o.<sup>18</sup> Ndu okpála hana inde adje engú li omulila adu apa e-e, angamba naali.<sup>19</sup> La-a, pi Malia, ani adu alila ndu 'ngú bhomu-o hana li bua e ndjindji. Ani atsia adu abhundja pépé.<sup>20</sup> Pipita-a, omulila aholo nagie lio. U adu aha sangu pi Ebhe, u atsia adu di adhogò ani ngubula ndu 'ngú inde u adje e ne bhende u au e hana, anga ndundu hana akodho 'kpí maka li andjelu-o akpokpo pi uo lie ko.

*U anu* ne Yesu bhú 'ngbé 'ti Ebhe gba omaYuda

<sup>21</sup> Bhú ekpí na madjina pita nazu ani-e, li nedhinga nato ani bhú gandja akolo lie, u atsia agisila 'li ani me Yesu. A bhomu-o 'ili inde li andjelu asuno e kala me 'hi ani bi 'bhi ani-o.

<sup>22</sup> Li nedhinga navulu lie pita nazu ka Malia akolo lie, maka li líli gba Moidje apa lie, u atsia anu ne ndili-e bhú Yelusalema ngu na'o ani sa 'kpa Ngámá.<sup>23</sup> Padhá de, anga u aye bhú líli gba Ngámá-a me: «Ndu ongisi na obhosibhosi na gigena hana, u a'ó uo kpí pi Ngámá.†»<sup>24</sup> U atsia aha di makiso maka li líli gba Ngámá-a apa lie me: «A ayo naha bəbhə bhisi. † du mo-o de-e, mu de ha ongisi bəbhə bhisi.»\*

*Simeona agie heni pi* Ebhe ngu Yesu

† 2:23 2:23 Tsia bhú Eki. 13:2, 12. \* 2:24 2:22-24 Bhú líli gba omaYuda-a, † du nani me 00 nde azu-o, a ayo me ani nu ngaiza bhú 'ngbé 'ti Ebhe gba omaYuda, ani vulu lie, amba ani kolo bubu kala Ebhe. Tsia bhú Lev. 12:8.

<sup>25</sup> Bhú nedhinga bhomu-o, kpála bini adu nani bhú Yelusalema, a adu 'li ani me Simeo. A ko nani kpála na ngbingbili , ani adu amanga Ebhe. Ani adu adjeke nedhinga li Ebhe a'é likabhu gba omatsalaele lie ko. Bu Bhobua adu bhú dabili bini ne ani. <sup>26</sup> Abhomu-o, Bu Bhobua atsia apa nani pi ani me, kala nakpi ka ani-e, ani au ngaiza Masiya inde li Ngámá atima e-o. <sup>27</sup> Nedhinga li okpála inde azu Yesu ago ne ani lie ngu namene maka li lili apa lie li 'ngu gba ani-e, Bu Bhobua ato bhúla Simeo abhú 'ngbé 'ti Ebhe gba omaYuda. <sup>28</sup> Abhú 'ti Ebhe oo, ani aha ndili-o, ani abi ani sa 'kpa e, ani atsia agie heni pi Ebhe me:

<sup>29</sup> «Ngámá, mbia inde-e, maka mo opa lie,  
mu ti da na'o ma, bali gba mu-o, me ma nu ne guo  
'ngu,

<sup>30</sup> anga ma au mukobho gba mu-o ne djila ma au.

<sup>31</sup> Mukobho inde mo otima e kala ndu okpála hana-o.

<sup>32</sup> Ani adú eke pi omupagano.

Ani tsia dú sangu gba omatsalaele, okpála gba mu-o.»

<sup>33</sup> 'Dyi Yesu ne 'hi Yesu angamba naali ka engu inde u adu apa e li ani-o. <sup>34</sup> Simeo ayo me Ebhe tuko bisagu pi uo, ani atsia apa pi Malia, 'hi Yesu me: «Ebhe abhu ndili inde-e ngubula me okpála bhelé bhú ká omatsalaele li bhú mangimbo, amba Ebhe 'e'e matá okoko bhúla. Ani adú ehe inde li Ebhe ngasuno e, li okpála bhelé tsia yála ani. <sup>35</sup> Kaka-a, ani agbé mabhundja inde awo lie li bua okpála bhelé-e bhú mbasu. La-a, pi mu makpe-e, likabhu adú bua mu maka ngise má pu!»

### *Ana, polofeta na eele*

<sup>36</sup> Polofeta bini na eele adu di nani oo. A adu 'li ani me Ana, ndili gba Fanuele bhú piga gba Asela. Ani adu

me aní nde agbe má dyuku! U amene nani ne bhoko gba e inde u aha lío ne e bhú ndíli-e kalanga mananika. <sup>37</sup> Pita nakpi ka 'ko aní-e, aní atsia ato əkθ. Lí nedhinga bhomu-o, aní adu íbili ne kalanga ndjikpa madjina ne ká badha. Aní du ayie bhú 'ngbé 'ti Ebhe gba omaYuda-a de. Aní adu amene kulu lie pí Ebhe sukpe ne ngbikpi. Aní adu atse ezu ngú nayo Ebhe. <sup>38</sup> Bha lí nedhinga bhomu-o, ngaani di-e, aní ago, aní atsia aholo adhөгθ Ebhe. Aní aholo akpokpo 'ngú pindji ndíli-e pí ndu okpála hana inde adu adjeke me Ebhe gbegbe okpála na Yelusalema bhú líkabhu gba o ko.

#### *U agie lío bhú Nadjaleta*

<sup>39</sup> Lí 'dyi Yesu ne 'hi Yesu andjia namene ndu 'ngú hana inde lí líli gba Ngámá apa e lie, u atsia agie lío bhú ndu doto na Galilaya, bhú kuti gba o na Nadjaleta-o. <sup>40</sup> Ndíli-e adu abhele, aní atsia adu abí angu. Ímbilangu gba aní-e atsia adu di abhulu lie. Bádha bhú 'bu gba Ebhe-e atsia adu di bhú dabilí bini ne aní.

#### *Yesu bhú 'ngbé 'ti Ebhe gba omaYuda*

<sup>41</sup> Ndu kalanga hana, okpála inde azu aní-e adu anú bhú Yelusalema ngú namene anokomiá na Pasíka . <sup>42</sup> Lí aní akolo lie ne kalanga ndjikpa ne ká bhisi-e, u atsia anu ne aní bhú dabilí bini maka u amemene lie ko. <sup>43</sup> Lí anokomiá andjia lie, u aholo agie lío. Engú bini, ndíli-e Yesu atigala naae bhú Yelusalema me 'dyi aní ne 'hi aní nde mbíla de. <sup>44</sup> U adu abhundja lie me aní bhú dabilí bini ne obí o na kpadji-e, u atsia aduku ekpí bini libhomu. Pipíta-a, u aholo nagíli aní bhú ká opiga gba o di ne bhú ká obí o-o. <sup>45</sup> U u la aní lie de-e, u atsia agie lío bhú Yelusalema ngú nagíli aní.

<sup>46</sup> Bhú 'kpí na bata-a, u abhaka ani bhú 'ngbé 'ti Ebhe gba omaYuda me ani nde adu bhú ká omusuno. Ani adu adje uo di ne nayiyi uo. <sup>47</sup> Ndu okpála inde adu adje ani-e hana, adu angamba naali ka imbilangu inde ani adu agie engú ne e ko. <sup>48</sup> Li okpála inde azu ani au ani lie, u angamba naali. 'Hi ani atsia ayi ani me: «Ndika ma, mo omene ya mo-o ka ni? Tsia nga ya ne 'dyi mu-o, ya adu igini agili mu me bua ya nde alu bha ndju abhulá má gba!» <sup>49</sup> Engú bini, ani agie pi uo me: «Yi de ngagili ma ngú ni? Yi mbila igini de me, a ayo me ma du bhú 'ti gba 'dyi ma-a di?» <sup>50</sup> Engú bini, u mbila nani ta 'ngú inde ani adu apa e pi uo-o de.

<sup>51</sup> Pipita-a, ani atsia agie lie ne uo bhú Nadjaleta. Ani adu amene líli gba uo-o. 'Hi ani adu alila ndu 'ngú bhomu-o hana li bua e ndjindji. Ani atsia adu abhundja pépé. <sup>52</sup> Yesu adu abhele, imbilangu gba ani-e adu di abhulu lie. Engú inde ani adu amene e bhú bádha bhú 'bu gba Ebhe-e, a adu anga li Ebhe, di ne li okpála naali.

### 3

*Kulu gba Djaabhu* nabatisa okpála

(*Tsia bhú* Mat. 3:1-12; ne bhú Mlk. 1:1-8; di ne bhú Dja. 1:19-28.)

<sup>1-2</sup> Pipita-a, Tibeke akolo 'ngbé ngámá na Loma . Bhú kalanga na ndjikpa ne ká bhuluvue bhú nau gba ani-e, Djaabhu ndili gba Djakalia, inde adu nani adu abhú 'gu-o, asia eli gba Ebhe . Nedhinga ango-o, Pose Pilat adu alila ndu doto na Yudaya. Elode adu ngámá na ndu doto na Galilaya. Ndai ani Filipino atsia adu ngámá na ndu doto na Itule ne Talakonite. Lisiansi atsia adu naae ngámá na Abilene. Bhú nedhinga bhomu-o, Ana ne uo ne Kaifa atsia adu obhelesi okpála gba odimand adu gba Ebhe

. <sup>3</sup> Abhomu-o, Djaa aholo adhuku bhú 'gu lingo ngade 'ngu na Djuludani, ani atsia adu atotobhila me: «Yi dji bua yi, yi sia batisimo, amba Ebhe 'e siti 'ngú gba yi ko.»

<sup>4</sup> Maka li polofeta tsaya, aye lie bhú bhuku gba e me:

«A ko kpála bini inde ngatotobhila abhú 'gu me:

Yi leke kpadji pi Ngámá,

yi li okpadji pi ani ngbingbili!

<sup>5</sup> Ndu tsutsukudhu bili sunda ongba 'ta hana abédhe lie.

Ndu oeta na ngbengbengbe ne obhe na djedjedje

hana adjí lie,

i kólo má gbata gbata!

Ndu kpadji na gagala hana akólo ngbingbili.

Okpadji na sisiti akólo babadha.

<sup>6</sup> Li ndu okpála hana tsia ú maka li Ebhe ngakobho okpála lie ko!†»

<sup>7</sup> Abhomu-o, okpála bhelé adu ago abhaka Djaa ngubula nasia batisimo. Ani atsia adu ayi uo me: «Ngayi opiga kpulu inde-e! A asuno pi yi da me yi kpe mangimbo gba Ebhe inde ngago-o? <sup>8</sup> I du mo-o, yi mene engú inde asúno me yi adji bua yi kukulu! Yi adú abhundja bha li bua yi de me, Abalahama ne ogbi yi. Padhá de, anga ma apa pi yi na paká me, teme yi ngau e inde-e, Ebhe tí da nadjidji, i tsia kólo odi Abalahama! <sup>9</sup> Maka ma ngapapa lie inde-e, u a'o ngbakpa bhú li ndula-a ngú nadede a'o. Ndu ndula hana inde i li lílí na babadha de-e, u adé, u tsia bhíke bhú djua.»

<sup>10</sup> Abhomu-o, okpála ango-o atsia adu ayi ani me: «I du mo-o, a ayo me ya mene pi?» <sup>11</sup> Ani atsia adu agie pi uo me: «Kpála bhende li bongo na mbulu nde ka e bhisi-e, a ayo me ani ha bini pi kpála bhende li bongo na mbulu nde ka e ade ko. Kpála bhende li ezu nde ka e-e, a ayo me

† 3:6 3:4-6 Tsia bhú Isa. 40:3-5.

ani ha di mbo pi kpála bhende li ezu nde ka e ade ko.»  
 12 Ondombi na mandjandja ago di ngu nasia batisimo, u  
 atsia ayi ani me: «Musuno, a ayo me ya mene pi?» 13 Ani  
 atsia agie pi uo me: «Yi ayó tia ane bhende li líli aziba e  
 de.» 14 Osiudha atsia ayi di ani me: «A la ya-a, a ayo me ya  
 mene naaya pi?» Ani atsia agie pi uo me: «Yi agbúlu tia  
 ka kpála bini ne kpéke, di ne eu de. Engú bini, yi mbila  
 bha tia na kulu gba yi ko.»

15 Maka li okpála adu adjeke nago ka Masiya lie, u  
 atsia adu ayi lio li bua o pindji Djaa me: «A ko ndi-e  
 Masiya inde li Ebhe atima e di?» 16 Djaa atsia agie pi ndu  
 uo hana me: «Ngama-a, ma ngabatisa naama yi ne engu.  
 Engú bini, a ngago pita ma ne kpála. Kpála ango-o ane ma  
 ne angu. Ma belegu ne tetele kpála ade ngubula me ma  
 bhulu ekpú na maloké gba ani-o.\* Ani abátisa yi ne Bu  
 Bhobua di ne djua. 17 Ani aholo kakpa gba e sa 'kpa e ngu  
 nape nguwa gba e-o. Ani apó bhúla nguwa na babadha  
 gba e bhú ngbokopi, engú la bini, ani tsia bú fufukudha-  
 a bhú djua inde li kpála bini ti da nabulu e de.»

18 Djaa aha nani líli koko bhelé pi okpála. Bhúbhú-  
 o, ani atsia adu akpokpo Bádha Ngali gba Ebhe-e pi uo.  
 19 Ngámá Elode aha nani Elodiade, olo gba ndai e-o.† Ani  
 amene nani matá di osisiti 'ngú koko bhelé. Kaka-a, Djaa  
 atsia ambe bhú 'ndji ani. 20 Abhomu-o, Elode amene  
 matá siti 'ngú koko pépé, ani aha Djaa, ani atsia abhike  
 ani bhú tikpu.

---

\* 3:16 3:16 Nani agba omaYuda-a, kulu nagbe maloké bhú  
 'dhu ogomago ne navulu 'dhu uo-o, a ko nani kulu ka  
 obalise di ne okpála na padhá. † 3:19 3:19 Filipino ne ndai Elode  
 nani inde abhelo Djaa bhulu nabatisa okpála ko. A adu  
 nani me Filipino nde kpi nga de. Tsia bhú Lev. 20:21.

*Djaa abatisa Yesu**(Tsia bhú Mat. 3:13-17; di ne bhú Mlk. 1:9-11.)*

<sup>21</sup> Kala me Djaa li bhú tikpu-o, ani abatisa ngaiza ndu okpála hana. Abhomu-o, Yesu atsia asia di batisimo. Nedhinga li Yesu adu akpokpo 'ngú ne Ebhe lie, kokpí abhulu lie, <sup>22</sup> u au Bu Bhobua ngakθ pí ani maka bεbhε. U atsia adje eli ayie abhúlá apa me: «Mu ne ndili gba ma na mukunda. Djali li bua ma ngú mu naali.»

*Onguo ogbi Yesu**(Tsia bhú Mat. 1:1-17.)*

<sup>23</sup> Yesu akpo nani lita kulu gba e me ani nde ne kalanga masikpe de ndjikpa bata. Okpála adu abhundja naao me, a ko ndili gba Djodjefu .

Djodjefu ndili gba Eli,

<sup>24</sup> Eli ndili gba Matati,

Matati ndili gba Levi,

Levi ndili gba Maleki,

Maleki ndili gba Djanai,

Djanai ndili gba Djodjefu ,

<sup>25</sup> Djodjefu ndili gba Matatiasi,

Matatiasi ndili gba Amosi,

Amosi ndili gba Nauma,

Nauma ndili gba Eseli,

Eseli ndili gba Nagai,

<sup>26</sup> Nagai ndili gba Mata,

Mata ndili gba Matatiasi,

Matatiasi ndili gba Semeini,

Semeini ndili gba Djoseke,

Djoseke ndili gba Djoda,

<sup>27</sup> Djoda ndili gba Yoanana,

Yoanana ndili gba Lesa,

Lesanda ndili gba Djelubabela,



Djelubabela ndili gba Salatiele,  
 Salatiele ndili gba Neli,  
<sup>28</sup> Neli ndili gba Maleki,  
 Maleki ndili gba Adi,  
 Adi ndili gba Kosama,  
 Kosama ndili gba Elemadama,  
 Elemadama ndili gba Ele,  
<sup>29</sup> Ele ndili gba Yesu,  
 Yesu ndili gba Eliedjele,  
 Eliedjele ndili gba Djolime,  
 Djolime ndili gba Matati,  
 Matati ndili gba Levi,  
<sup>30</sup> Levi ndili gba Simeo,  
 Simeona ndili gba Yuda,  
 Yuda ndili gba Djodjefu ,  
 Djodjefu ndili gba Djonama,  
 Djonama ndili gba Eliakime,  
<sup>31</sup> Eliakime ndili gba Melea,  
 Melea ndili gba Mena,  
 Mena ndili gba Matata,  
 Matata ndili gba Natana,  
 Natana ndili gba Davidi,  
<sup>32</sup> Davidi ndili gba Yese,  
 Yese ndili gba Obede,  
 Obede ndili gba Boadja,  
 Boadja ndili gba Salamona,  
 Salamona ndili gba Nasone,  
<sup>33</sup> Nasona ndili gba Aminadaba,  
 Aminadaba ndili gba Adimina,  
 Adimina ndili gba Aluni,  
 Aluni ndili gba Edjelone,  
 Edjelone ndili gba Peledje,  
 Peledje ndili gba Yuda,

<sup>34</sup> Yuda ndili gba Yakobho,  
 Yakobho ndili gba Isaka,  
 Isaka ndili gba Abalahama,  
 Abalahama ndili gba Tela,  
 Tela ndili gba Naola,  
<sup>35</sup> Naola ndili gba Seluga,  
 Seluga ndili gba Lagau,  
 Lagau ndili gba Pelege,  
 Pelege ndili gba Ebele,  
 Ebele ndili gba Sela,  
<sup>36</sup> Sela ndili gba Kainame,  
 Kainame ndili gba Alepakasada,  
 Alepakasada ndili gba Seme,  
 Seme ndili gba Nua,  
 Nua ndili gba Lemeke,  
<sup>37</sup> Lemeke ndili gba Matusalema,  
 Matusalema ndili gba Enoke,  
 Enoke ndili gba Yelede,  
 Yelede ndili gba Malalele,  
 Malalele ndili gba Kenana,  
<sup>38</sup> Kenana ndili gba Enosa,  
 Enosa ndili gba Sete,  
 Sete ndili gba Adamu ,  
 Adamu ndili gba Ebhe.

## 4

*Djabulu* ale Yesu

(*Tsia bhú* Mat. 4:1-11; di ne bhú Mlk. 1:12-13.)

<sup>1</sup> Pita li Yesu abedhe lie ne Bu Bhobua-a , ani ayie lingo 'ngu na Djuludani, Bu Bhobua atsia amba bhúla ani abhú mili bili. <sup>2</sup> Oo, Djabulu ale ani ngubula ekpí ndjikpa badha. Bhú oekpí bhomu-o, ani zu 'he de. Pipita-a,

gumú aholo amene aní. <sup>3</sup> Abhomú-o, Djabulú atsia apa pí aní me: «† dū me mú nde ne Ndílí gba Ebhe-e, pa pí teme inde-e me a dji lie, amba a kolo ezú.» <sup>4</sup> Yesu agie pí aní me: «Eli gba Ebhe-e apa me: «Kpála kóbho bha bini ka ezú de.†»»

<sup>5</sup> Djabulú aha aní, anú ne aní apí 'ta. Aní asuno ndú ondende na doto pí aní hana, bhú nedhinga bedi bhomú. <sup>6-7</sup> Aní atsia apa pí aní me: «Ebhe aha ndú angu, ne otia na ondende bhomú-o hana múma. Ma tí da nahaha pí kpála inde ma akúnda nahaha pí e. † dū me mú nde akikita lipúkú mú kuto kala ma-a, ma ahá ndú angu ne otia na ondende bhomú-o hana pí mú.» <sup>8</sup> Yesu atsia agie pí aní me: «Eli gba Ebhe-e apa me: «Dhøø Ebhe Ngámá gba mú,

amba mú toko bha bini aní kpi e kpi.†»»

<sup>9</sup> Pípita-a, Djabulú aha aní, anú ne aní abhú Yelusalema. Aní a'o aní apí tulundji 'ngbé 'tí Ebhe gba omaYuda, aní atsia apa pí aní me: «† dū me mú nde bha ndjú ne Ndílí gba Ebhe-e, 'ulu, mú kø kuto, <sup>10</sup> anga eli gba Ebhe-e apa me:

«Ebhe ahá lílí pí oandjelu gba e me, u lila mú. †»

<sup>11</sup> La di matá:

«U abí mú sa 'kpa o, amba mo otú 'dhú mú lí teme de.†»»

<sup>12</sup> Yesu atsia agie pí aní me: «Eli gba Ebhe-e apa la di me:

«Mo olé Ebhe Ngámá gba mú-o de.†»»

<sup>13</sup> Pita lí Djabulú andjia nale Yesu lie ne ndú kpadji hana-a, aní atsia a'o ka aní ngú nadjeko nedhinga koko.

*Yesu agie lie bhú Galilaya*

*(Tsia bhú Mat. 4:12-17; di ne bhú Mlk. 1:14-15.)*

† 4:4 4:4 Tsia bhú Det. 8:3. † 4:8 4:8 Tsia bhú Det. 6:13. † 4:10

4:10 Tsia bhú Ets. 91:11. † 4:11 4:11 Tsia bhú Ets. 91:12. † 4:12

4:12 Tsia bhú Det. 6:16.

<sup>14</sup> Abhomu-o, Yesu atsia agie lie bhú ndu doto na Galilaya, bhú angu gba Bu Bhobua. Ndu okpála hana aholo nakpokpo 'ngú gba ani-e bhú ndu doto bhomu-o libhomu. <sup>15</sup> Ani adu asuno bhú oeti gba uo nadje líli gba Moidje-o . Ndu okpála hana atsia adu adhөгө ani.

*Yesu anu bhú Nadjaleta*

*(Tsia bhú Mat. 13:53-58; di ne bhú Mlk. 6:1-6.)*

<sup>16</sup> Pipita-a, ani atsia anu bhú Nadjaleta, kuti inde ani abhele bhú e-o. Li 'kpí naguo gba omaYuda-a , ani ali bhú 'ti nadje líli gba Moidje maka ani adu amemene lie ko. Ani ayie bhúlá ngú natanga eli gba Ebhe-e pi okpála.

<sup>17</sup> Abhomu-o, u atsia aha bhuku gba polofeta Isaya pi ani. Ani abhulu bhuku-o, ani atsia agili bili u aye lie me:

<sup>18</sup> «Bua gba Ngámá-a bhú dabili bini ne ma.

Ani abhu ma ngú nanu nakpokpo Bádha Ngali pi obhulu ndibhili.

Ani atima ma ngú natobhila pi obalise me, u azé bhú bali gba o-o maze,

pi okpála i u 'kpí de-e me, u aú matá 'kpí mau.

Ani atima ma di ngú napandja obhende bhú mbolo sa 'kpa obhende ngato mbolo li uo-o.

<sup>19</sup> Ngama-a, ma akpókpo pi okpála me nedhinga inde li Ebhe adjé ndjinga uo lie akolo.†»

<sup>20</sup> Pita li Yesu andjia natatanga lie, ani agagala bhuku-o, ani atsia agie pi kpála na kulu-o. Abhomu-o, ani aha lie adu kuto. Ndu okpála inde adu bhú 'ti oo hana abanga djila o li ani. <sup>21</sup> Ani atsia aholo napa pi uo me: «Engú inde yi adje e bhú Bhuku gba Ebhe-e li bili bhomu-o, amene lie naki amene.» <sup>22</sup> Ndu okpála hana adu angamba li Yesu naali. U atsia adu aziba eli na bádha bhú 'bu inde

† 4:19 4:18-19 Tsia bhú Isa. 61:1-2.

ani adu akpokpo e-o. Abhomu-o, u atsia adu apa me: «A inde-e ndili gba Djodjefu-o di?»

<sup>23</sup> Abhomu-o, ani atsia apa pi uo me: «Ma ambila na paká me yi apá muma gbitaku inde me: «Mutia, kobho limu ne titi mu.» Yi tsia pá di muma me: «Ya adje ndu 'ngú inde mo omene e bhú Kapalanauma-a hana. Mene nga la di ngua 'ngú ango-o bhú kuti mo obhele bhú e ko.»» <sup>24</sup> Ani atsia apa matá pipita-a me: «A moko, ma apa pi yi me, a ko kukulu 'ngú, okpála ziziba polofeta bhú kuti gba e belegu de bini.

<sup>25</sup> Ma apa pi yi na paká me, ookesi na olisilisi adu nani bhelé bhú ká omatsalaele li nedhinga gba polofeta Eliya. Li nedhinga bhomu-o, ebha dhi nani-i de ngubula kalanga bata ne epe madhia. Kaka-a, adyindi na ngbéng-bé atsia ali bhú doto ango-o libhomu. <sup>26</sup> Engú bini, Ebhe tima nani Eliya ngú nateteke suka ookesi bhomu-o bini de. Ani atima bha bini ani gba oko bini na gandji kuti na Salepeta bhú ndu doto na Sidona. <sup>27</sup> Matá-a, okpála na kába adu di nani bhelé bhú ká omatsalaele li nedhinga gba polofeta Elisa. Engú bini, Ebhe kobho nani suka uo de, bha bini Namana, gandji kpála na Silia.»

<sup>28</sup> Li ndu okpála hana inde adu bhú 'ti oo adje 'ngú bhomu-o lie, u ake 'ngú lio naali. <sup>29</sup> U ayie bhúlá, u agbe ani bhú 'ti bhomu-o, u agbele ani apí 'ta inde u ayiki gudhu gba o pí e-o. U amene nani mo-o ngú nandjimba ani akuto. <sup>30</sup> Engú bini, ani akodho bha 'kpí bhú ká uo oo, ani atsia atapa.

*Yesu akobho kpála li siti bua adu ato mbolo lie  
(Tsia bhú Mlk. 1:21-28.)*

<sup>31</sup> Abhomu-o, Yesu anu bhú Kapalanauma, kuti bini na ndu doto na Galilaya. Ani atsia adu asuno pi okpála bhú 'kpí naguo gba omaYuda-o. <sup>32</sup> U adu nangamba li

ngua nasuno gba ani-o, anga ani adu nasuno ne angu gba Ebhe. <sup>33</sup> Bhu 'ti nadje líli gba Moidje oo, kpála bini lí sítí bua adu nato mbolo líe, aholo asusula kpekpeke me: <sup>34</sup> «Aa! Yesu, kpála na Nadjaleta, mo okunda namene ngú ya pí? Mo ogo ngú nabhili ya? Ma mbíla mu hana, mu ne kpála na bubu inde lí Ebhe atima e ko!» <sup>35</sup> Yesu atsia ambe bhú 'ndjì ani me: «Gbite 'bhe mu, amba mu koto la di bhú kpála bhomu!» Sítí bua-a agu 'i kpála ango-o kuto má gbwe, bhú ká djila ndu okpála inde adu oo hana. Aní akoto bhú ani, engú bini ani mene ani sítí de. <sup>36</sup> Ndu okpála hana angamba, u atsia adu ayi lío sunda o me: «A inde-e mangua eli dho? Aní ngaha líli ne kpeke, di ne angu pí osítí bua, uo ngaze bhú okpála!» <sup>37</sup> Okpála atsia adu apa 'ngú gba Yesu-o bhú ndu okuti bhomu-o hana.

*Yesu akobho okpála bhelé na kuo*

*(Tsia bhú Mat. 8:14-17; di ne bhú Mlk. 1:29-34.)*

<sup>38</sup> Lí Yesu ayie líe bhú 'ti nadje líli gba Moidje-e, ani atsia anu alí bhú 'ti gba Simo. A abhaka me a nde lí 'hi wala Simo ne kpeke bandjì. Abhomu-o, u atsia ayo ka Yesu me ani kobho ani. <sup>39</sup> Aní ago alu pí ani, ani ambe bhú 'ndjì bandjì-o. Abhomu-o, bandjì-e atsia ayie lí ani. Aní ayie bhúlá kolo má gala, ani atsia aholo nalu 'zu pí uo.

<sup>40</sup> Lí ela atí líe, ndu okpála hana inde adu ne okpála na kuo ngangá agba o-o, abha uo, u atsia ago ne uo pí Yesu. Aní a'o 'kpa e pí 'ndjì uo bini ne bini, u atsia akobho ndu o hana. <sup>41</sup> Osítí bua aze di bhú okpála na kuo bhelé. Osítí bua ango-o atsia adu asusula me: «Mu ne Ndili gba Ebhe!» Engú bini, Yesu adu ambe bhú 'ndjì uo. Aní atsia adu di agbite kpadjì pí uo me u agama 'ngú de, anga u adu ambíla hana me a ko Masiya inde lí Ebhe atima e ko.

*Yesu akpokpo Bádha Ngali bhú* ndu doto na Yudaya  
(*Tsia bhú* Mlk. 1:35-39.)

<sup>42</sup> Lì ekpí aseke lie, anì akoto bhú kuti bhomu, anì atsia atapa bhú mili bìlì. Bhiti okpála aholo nagìlì anì. U au anì lie, u aholo akikiliki lio pì anì me: «Mo o'ó ká ya de, ní tigala ne yi sî-i.» <sup>43</sup> Engú bini, Yesu apa pì uo me: «A ayo me ma anu di nakpokpo Bádha Ngali Naú gba Ebhe-e bhú okuti koko, anga Ebhe atima ma ngánga.» <sup>44</sup> Abhomu-o, anì atsia adu akpokpo Bádha Ngali bhú otì nadjé lílì gba Moidje na ndu doto na Yudaya-o.

## 5

*Yesu a'í omukpata na gigina*  
(*Tsia bhú* Mat. 4:18-22; di ne bhú Mlk. 1:16-20.)

<sup>1</sup> A akolo ekpí bini, Yesu adu língo ekpè na Genedjaleta.\* Bhiti okpála asulu de anì má wakaka ngú nadjé 'li Ebhe. <sup>2</sup> Anì au zabu bhisi língo 'ngu me obhubhulu-o nde aze, u nde ngavulu onado gba o na sungu-o. <sup>3</sup> Yesu atsia a'ú bhú susu bini, bhende gba Simo-o. Do anì pì Simo me: «Yie língo 'gè-o, amba mu dyudyo limu mbo ne abhú 'ngu.» Yesu atsia adu bhú zabu-o kuto. Anì aholo nasuno pì bhiti okpála bhomu-o. <sup>4</sup> Anì andjia nagama 'ngú lie, anì atsia apa pì Simo me: «Dyudyo zabu-o apí tsiba, amba ngayi ne obi mu-o, yi bala onado gba yi-e bhú 'ngu ngú naholo osungu-o.»

<sup>5</sup> Simo agie pì anì me: «Musuno, ya amene kulu sukpe inde-e libhomu, ya holo belegu sungu de bini. Engú la bini, ka 'li mu-o, ya abhíke onado-o bhú 'ngu mabhike.» <sup>6</sup> U abala onado lie bhú 'ngu-o, u atsia aholo osungu bhelé. Kaka-a, onado gba uo-o aholo natsotsolo. <sup>7</sup> Abhomu-o, u

\* 5:1 5:1 Genedjaleta: A ko 'ilì koko na ekpè na Galilaya. Tsia bhú Mlk. 6:53.

amene 'kpa o pi obi o inde adu bhú zabu koko ngú na'i uo me, u go ha mbo 'kpa o pi o. Obhobhomu-o ago, u abebedhe ozabu bhisi-e ne osungu bedhebedhe. Kaka-a, ozabu atsia aholo nalinda bhú 'ngu.

<sup>8</sup> Li Simo Piele au lie mo-o, ani ati bhú li 'dhu Yesu, ani atsia apa me: «Ngámá, gbe limu de ma ne sidi, anga ma ne siti kpála!» <sup>9</sup> Ani apa mo-o, anga ngauo ne obi e, u angamba nani naali ka bhiti osungu inde u aholo e ko. <sup>10</sup> Djaki ne Djaa , ongisí gba Djebedayo inde adu amene bhú dabili bini ne Simo-o, angamba bhadi moko. Engú bini, Yesu apa pi Simo me: «Mo odjé tsulu de, anga nayie pi mbia inde-e, mu dú matá agili osungu de, engú bini, mo odú ibili agili okpála pi Ebhe.» <sup>11</sup> Abhomu-o, u agbele ozabu gba o apí 'gθ. U a'o ka ndu 'he gba o hana, u atsia anu bhú dabili bini ne Yesu.

*Yesu akobho kpála na kába*

*(Tsia bhú Mat. 8:1-4; di ne bhú Mlk. 1:40-45.)*

<sup>12</sup> A akolo ekpí bini, Yesu adu bhú kuti bini na ndu doto na Galilaya, kpála bini inde li kába atsotsolo kute e hana-a, akoto. Li ani au Yesu lie, ani ago ati kala ani, ani atu bhúla e ne kuto, ani atsia alopole lie pi ani me: «Ngámá, i du me mu nde akunda-a, mu ti da nakobho ma.» <sup>13</sup> Yesu aha 'kpa e a'o li ani. Ani atsia apa me: «Ma akunda moko, kokobho!» Abhomu-o, kába agulu bha kolo li kute kpála ango-o hana maka ndjombe. <sup>14</sup> Yesu atsia aha líli pi ani me: «Mo opá belegu engú inde-e pi kpála bini de. Engú bini, nu suno bha limu pi dimandθ gba Ebhe maka li kute mu nde lie ko. Pipita-a, amba mu ha makiso maka li líli gba Moidje apa lie, ngubula napana pi ndu okpála hana me mo okobho.» <sup>15</sup> Abana mo-o, engú gba Yesu adu bha ayangba ne kalanu. Okpála bhelé adu ago apo bhúla o de ani ngú nadje ani, ne di me ani kobho



o ne okuo gba o-o. <sup>16</sup> Engú la bini, aní adu anu bhú omili bilí. Oo, aní atsia adu akpokpo 'ngú ne Ebhe.

*Yesu akobho dukuto*

*(Tsia bhú Mat. 9:1-8; di ne bhú Mlk. 2:1-12.)*

<sup>17</sup> Ekpí bini, Yesu adu asuno pí okpála. Omufalisai koko ne omusuno na lílì gba Moidje inde ayie nani bhú ndu okuti hana na ndu doto na Galilaya ne Yudaya, di ne bhú 'ngbé gudhu na Yelusalema adulu de aní. Ne angu gba Ebhe-e, aní atsia adu akobho okpála na kuo. <sup>18</sup> Lí nedhinga bhomu-o, okpála koko ago ne dukuto bini me u nde abi aní pí kalagba. U adu nagilì kpadji ngú nato aní abhú 'ti, amba u 'o aní kala Yesu. <sup>19</sup> Engú bini, u ale nali ne aní abhú 'ti pima ka lí okpála adu lie bhelé-o. Abhomu-o, u atsia a'u ne aní apí 'ngbu 'ti. U adu gudho lí 'ngbu 'ti-e má vuu! U atsia aké aní ne ekpú tété ne kalagba gba e hana bhú ká okpála kala Yesu. <sup>20</sup> Lí Yesu ambila lie me okpála bhomu-o abhuka ni na paká-a, aní atsia apa pí kpála na kuo-o me: «Olía ma, ma a'e osisiti 'ngú gba mu-o a'e.»

<sup>21</sup> Lí omusuno na lílì di ne omufalisai adje 'ngú bhomu-o lie, u atsia aholo nabhundja me: «Kpála inde ngasobho Ebhe me-e, a ko nga naae da? A ti da na'e siti 'ngú gba okpála da, bha bini Ebhe ngae kpi e kpi dí?»

<sup>22</sup> Yesu ambila mabhundja gba uo lie, aní apa pí uo me: «Yi ngabhundja lí bua yí mo-o ka ní? <sup>23</sup> Ne napa me, «Ma a'e osisiti 'ngú gba mu a'e», ne napa me, «Yie bhúlá, amba mu dhuku-o» a ane ne bhuku ne bhedho? <sup>24</sup> Engú bini, ma akunda me yí mbila me ngama, Ndilì gba kpála-a, ma ne angu píla doto ngú na'e siti 'ngú.» Abhomu-o, Yesu atsia apa pí dukuto-o me: «Ma apa pí mu me yie bhúlá, ha dabilì gba mu-o, amba mu gie limu agba mu!» <sup>25</sup> Kolo má gala me-e, kpála bhomu ayie bhúlá bhú ká djila ndu

okpála hana, aní aha dabilí inde aní de así pí e, aní atsia agie lie agba e me aní nde ngadhögö Ebhe. <sup>26</sup>Ndu okpála hana adu angamba naali. U abedhe ne tsulu bedhe, u adu adhögö Ebhe, u atsia adu apa me: «Ya au nakí ongú na ngangamba!»

*Yesu a'í Levi*

*(Tsia bhú Mat. 9:9-13; di ne bhú Mlk. 2:13-17.)*

<sup>27</sup>Pipita-a, Yesu akoto kilidjo, aní atsia au ndombi bini na mandjandja, adu 'lí aní me Levi,† aní nde adu kuto bhú bilo gba e-o. Yesu apa pí aní me: «Kpata ma.» <sup>28</sup>Levi ayie bhúlá, aní a'o ka ndu 'he hana, aní atsia akpata Yesu.

<sup>29</sup>Pipita-a, Levi atsia amene 'ngbé anokomia pí Yesu abhú 'ti gba e. Ondombi na mandjandja bhelé di ne okpála koko adu nazu 'he ne uo bhú dabilí bini.

<sup>30</sup>Omufalaisai di ne omusuno na líli gba o adu nadi mutokono, u atsia ayi omukpata gba Yesu-o me: «Ka ní yi ngazu 'he ne nandji vino lie bhú dabilí bini ne ondombi na mandjandja di ne okpála na sisiti-e?» <sup>31</sup>Yesu atsia agie pí uo me: «Okpála bhende lí kuo nde lí o ade-e, u ne gumu mutia ade. Engú bini, obhende inde lí o ne kuo ne gumu mutia ngao. <sup>32</sup>Ma go ngú na'í okpála bhende ngbingbili-e de. Engú bini, ma ago ngú na'í obhende na sisiti-o, ngubula me u dji bua o.»

*Yesu akpo 'ngú pindji natse ezú ngú nayo Ebhe*

*(Tsia bhú Mat. 9:14-17; di ne bhú Mlk. 2:18-22.)*

<sup>33</sup>Okpála bhomu-o apa pí aní me: «Omukpata gba Djaa di ne obhende gba omufalaisai ngatse ezú píko ngú nayo Ebhe. Engú bini, obhende gba mu-o la bha naao ngazu 'he ne nandji vino.» <sup>34</sup>Yesu agie pí uo me: «Yi abhundja naayi me yi tí da naholo omaha 'ko ølø ne kpéke ngú

† 5:27 5:27 Levi: A ko 'líli koko gba Matíé.

natse ezu me 'ko olo-o nde nga bha bhú dabili bini ne uo? <sup>35</sup> Nedhinga koko akólo makolo, nedhinga inde li okpála adhépe 'ko olo-o lie bhú ká uo-o. Li oekpí angó-o, u tsia tsé la 'zu.»

<sup>36</sup> Yesu atsia aha di gbitaku inde-e pí uo me: «Kpála bini tí da nasidha bongo na mbia, aní tsia há pápála-a ngú nadudu li bongo na didili de. Aní mene mo-o, li bongo na didili-e sídha, la di-e, pála bongo na mbia lé ne bhe na didili-e de. <sup>37</sup> Kpála bini tí da na'o vino na mbia bhú odidili dhudhu na ko 'nu de. Aní mene mo-o, li vino na mbia bí 'fu, i úpa odidili dhudhu-o. Pandi-e túko, li odhudhu-o tsia síti di. <sup>38</sup> Engú bini, a ayo na'o vino na mbia bhadi bhú odhudhu na mbia!‡ <sup>39</sup> I du me kpála bini nde andji pandi na didili andji-e, aní kúnda matá pandi na mbia de, anga aní pá me: «Pandi na didili-e ane ne bádha.»»

## 6

Yesu aziba me ni ne ngámá pí 'ndji ekpí naguo gba omaYuda

(Tsia bhú Mat. 12:1-8; di ne bhú Mlk. 2:23-28.)

<sup>1</sup> Ekpí bini naguo gba omaYuda-a, Yesu ne omukpata gba e adu akodho 'kpí bhú ngu 'zu inde u a'i e me ngano. Omukpata gba aní-e aholo akodho 'ndji 'ndji, atutuluba sa-tikpa o, u atsia adu nazuzu.\* <sup>2</sup> OmuFalisai koko ayi uo me: «Yi ngamene bhomu-o ní? Líli gba ní-e ziba namene kulu bhú 'kpí naguo de.» <sup>3</sup> Yesu atsia agie pí uo me: «Yi

‡ 5:38 5:38 Yesu akúnda napa bhomu-o me, u tí da na'o nasuno gba ní na mbia pí bhe gba omuFalisai-e de. \* 6:1 6:1 Agba omaYuda-a, i du me kpála nde ngakodho ngano-o, amba aní ngamene bhomu-o kulu. La-a, líli gba uo-o ziba namene kulu bhú 'kpí naguo-o de. Tsia bhú Det. 23:26, di ne bhú Lev. 23:5-14.

atanga ndjindji bhú Bhuku gba Ebhe-e , engú nani li Davidi amene e? Ekpí bini, ngaani ne omaha e, u adu lie ne gumu-o, <sup>4</sup> ani ali nani bhú 'ti Ebhe. Ani aha mapa inde u a' o e ngú nadhogò Ebhe-e, ani azu. Ani atsia aha di pi omaha e, abana li líli gba ní-e apa lie me azú bha mapa ango-o ne odimandò-o .» <sup>5</sup> Yesu atsia apa matá pi uo me: «Yi mbila me ngama, Ndili gba kpála-a, ma ne ngamá pí 'ndji ekpí naguo.»

*Yesu akobho kpála li 'kpa e adu ne eze  
(Tsia bhú Mat. 12:9-14; di ne bhú Mlk. 3:1-6.)*

<sup>6</sup> A adu nani ekpí naguo koko bini, Yesu ali bhú 'ti nadje líli gba Moidje-o . Ani akolo lie oo, ani atsia aholo nasuno. Bhú ká okpála-a, bhoko bini adu oo, adu li 'kpa ani na kokpa-a ne eze. <sup>7</sup> Omusuno na líli gba Moidje di ne omuFalisai adu agili kpadji ngú napu ngbángá Yesu me, ani ngamene siti 'ngú. Kaka-a, u aholo atsia ani ne kpéke djila atigala ani kóbho kpála li 'kpí naguo.

<sup>8</sup> Engú bini, li Yesu ambila lie me ali bua uo oo, u ngabhundja mo-o, ani atsia apa pi kpála li eze adu li 'kpa e me: «Yie bhúlá, amba mu lu si bhú ká djila ndu okpála hana.» Kpála ango-o ayie bhúlá, ani atsia alu kala ndu okpála inde adu bhú 'ti oo hana. <sup>9</sup> Pipita-a, Yesu atsia apa pi uo me: «Ma ne engú bini ngú nayi yi tété: Li 'kpí naguo, líli gba ní-e aziba pi? U mene bádha 'ngú, ne me u mene siti 'ngú? U kobho kpála, ne me u akóbho ani de?» <sup>10</sup> Ani atsia ndu uo hana bini ne bini. Abhomu-o, ani atsia apa pi kpála na eze-e me: «Gbele 'kpa mu.» Kpála ango-o agbele 'kpa e, 'kpa ani atsia akolo ndjindji. <sup>11</sup> Engú bini, okpála ango-o abi 'gú naali, u atsia aholo nayi lio sunda o me: «Ní ti da namene ngú Yesu mangua 'ngú dho?»

*Yesu alo obhulɔ* titima ndjikpa ne ká bhisi

(*Tsia bhú* Mat. 10:1-4; di ne bhú Mlk. 3:13-19.)

<sup>12</sup> Bhú oekpí bhomu-o, sukpe bini, Yesu a'u apí 'ta ngú nakpokpo 'ngú ne Ebhe. Sukpe libhomu aní así nakpokpo 'ngú ne Ebhe. <sup>13</sup> Li ekpí aseke lie, aní a'i omukpata gba e-o, aní atsia alo okoko bhú ká uo ndjikpa ne ká bhisi inde aní agisila nani 'li o me obhulɔ titima gba Yesu . <sup>14</sup> A adu nani Simo (inde li Yesu agisila 'li e me Piele) ne ndai e Andili, Djaki ne Djaa , Filipo ne Batelemi, <sup>15</sup> Matié ne Tuma, Djaki ndili gba Alafayo ne Simo (inde u a'i e me kpála inde akunda doto gba e), <sup>16</sup> Djude ndili gba Djaki ne Yuda tsikaliete, inde apú Yesu pi obhulɔ yala-o.

*Yesu asuno pi* bhiti okpála

(*Tsia bhú* Mat. 4:23-25.)

<sup>17</sup> Aní akɔ ne uo, aní atsia alu asabu 'ta li bili li omukpata gba aní koko bhelé adu lie ko. Okpála bhelé na ndu doto na Yudaya libhomu, na Yelusalema ne ogudhu na ngo 'ngbé 'ngu, gudhu na Tile ne Sidona adu di oo. <sup>18</sup> Okpála ango-o ago nani ngú nadjé Yesu, amba aní kobho di obhende adu ne okuo-o. Aní atsia akobho di okpála inde li osisiti bua adu ato mbolo li o ko. <sup>19</sup> Ndu okpála hana adu nagili nabu 'kpa o li kute aní, anga ndu uo hana adu akobho ka angu inde adu bhú aní-o.

*Yesu akpo 'ngú* pindji djali ne likabhu

(*Tsia bhú* Mat. 5:1-12.)

<sup>20</sup> Yesu atsia omukpata gba e-o, aní atsia apa pi uo me:  
«A ko djali pi yi, ngayi obhulɔ ndibhili,  
    anga Ebhe ne ngámá gba yi-e ngae!  
<sup>21</sup> A ko djali pi yi, ngayi obhende ngadje gumu mbia inde,  
    anga yi azú 'he, yi tsia 'ú 'u!  
A ko djali pi yi, ngayi obhende ngaku 'gba mbia inde,  
    anga yi amú 'zo!

<sup>22</sup> A ko djali pi yi, i du me okpála nde ngayala yi, u nde ngagbe yi bhú ká o, u nde ngasobho yi, u nde ngapa 'ngú gba yi-e sisiti kabula ma, Ndili gba kpála. <sup>23</sup> Li nedhinga ango kolo, yi de kpi djali, amba yi dho di ebi, anga makalá na ngbéngbé ngadjeke yi abhúlá. Ogbi uo adu nani amene bhadi opolofeta sisiti moko.

<sup>24</sup> Engú bini, a ko likabhu pi yi obhulu tia,  
anga yi asia makalá gba yi-e asia!

<sup>25</sup> A ko likabhu pi yi, ngayi obhulu ká 'zú mbia inde,  
anga yi adú adjé gumu!

A ko likabhu pi yi, ngayi obhende ngamu 'zo mbia inde,  
anga yi adú bhú talia, yi tsia dú naku 'gbá!

<sup>26</sup> A ko likabhu pi yi, i du me ndu okpála hana nde ngapa 'ngú gba yi-e ndjindji, anga ogbi uo adu apa bhadi nani babadha 'ngú moko li opolofeta na eu ko!»

*Yi kunda obhulu yala gba yi-o*

*(Tsia bhú Mat. 5:38-48, 7:12a.)*

<sup>27</sup> «Engú bini, ma apa la pi yi me, ngayi obhende ngadje ma-a, yi kunda obhulu yala gba yi-o. Yi mene bádha 'ngú pi obhende ngayala yi ko. <sup>28</sup> Yi yo me bisagu gba Ebhe-e go pí okpála bhende ngatu pødjø li yi, amba yi yo Ebhe pi obhende ngamene yi sisiti ko. <sup>29</sup> Li kpála bini su pála mu li pápá bini-e, mu de dji di pápá koko pi ani, amba ani su.† Li kpála bini gbulu koti gba mu-o, mu de 'o di ani amba ani ha bongo na mbulu mu-o. <sup>30</sup> Li kpála yo 'he ka mu-o, mu de ha pi ani. † du me kpála bini nde agbulu 'he ka mu-o, mo oyó matá ka ani de. <sup>31</sup> Yi mene pi okpála koko bhadi maka bhende yi akunda me u mene e pi yi ko.

† 6:29 6:29 Agba omaYuda-a, nasu kpála li pabhø e-e, a ko sobho na ngbéngbé.

<sup>32</sup> Ɔ ɖu me yi nde ngakunda bha bini okpála bhende ngakunda yi-e, yi abhúndja de me yi asía makalá kaka-a de, anga okpála na sisiti-e, u ngakunda bhadi okpála bhende ngakunda o ko! <sup>33</sup> Ɔ ɖu me yi nde ngamene bha bini bádha 'ngú pí okpála bhende ɪ ngamemene pí yi-e, yi abhúndja de me yi asía makalá kaka-a de, anga okpála na sisiti-e bhadi ngamemene moko! <sup>34</sup> Ɔ ɖu me yi nde ngaha bha bini 'he pí okpála inde yi abhúndja me u tí da di nagigie pí yi lí 'kpí koko-o, yi abhúndja de me yi asía makalá kaka-a de. Abana okpála na sisiti, u ngaha di 'he pí obi o okpála na sisiti ngubula me, u gie di pí o lí 'kpí koko!

<sup>35</sup> Engú bini, yi kunda obhulu yala gba yi-o. Yi mene bádha 'ngú pí uo. Yi ha 'he pí uo me yi nde bhundja de me u agie pí yi magie de. Yi asía 'ngbé makalá. Yi mene mo-o, yi tsia dú ongisi gba Ebhe Apí 'Kpí, anga ngaani-e, ani babadha pí okpála inde ɪ gie heni pí ani de. Ani di babadha pí okpála na sisiti. <sup>36</sup> Yi bedhe ne ndjinga pí okpála maka lí 'dyi yi Ebhe abedhe di ne di lie pí okpála ko.»

*Yi akódho 'ngú gba okpála koko de*

*(Tsia bhú Mat. 7:1-5.)*

<sup>37</sup> «Yi akódho 'ngú gba okpála koko de, amba Ebhe akódho di 'ngú gba yi-e de. Yi a'ó engú pí okpála koko de, amba Ebhe a'ó di engú pí yi de. Yi mbu lí siti 'ngú gba okpála koko, amba Ebhe mbu di lí siti 'ngú gba yi ko.

<sup>38</sup> Yi ha 'he pí okpála koko, amba Ebhe ha di 'he pí yi. Ani abédhe kílí gba yi-e ne nguwa bedhe má kpambi, ɪ hólo nabala kuto. A moko, Ebhe ahá bhadi pí yi maka lele yi ngahaha pí okpála koko lie ko.»

<sup>39</sup> Yesu atsia apa matá pí uo gbitaku bini me: «Kpála ɪ u 'kpí de-e tí da naholo 'kpa kilí e inde ɪ u 'kpí de ngú

nasuno kpadji pi ani uu? A mo-o ade! I du mo-o, li ndu uo bhisi hana bála bhú 'dú. <sup>40</sup> Mukpata bini ne musuno gba e ne imbilangu de. Engú la bini, ndu mukpata hana inde u asuno 'he pi e ndjindji-e, ani kólo maka musuno gba e-o. <sup>41</sup> Ka ni mu ngau mboye ku musoli inde bhú djila ndai mu-o lie, mu tsia u la ndula inde bhú djila mu-o de? <sup>42</sup> Lele pi mu ti da napa lie pi ndai mu me: «Nda ma, 'o ma, ma gbe mboye ku musoli inde bhú djila mu bhomu», ngamu-o, mu nde u ngala belegu de ndula inde bhú djila mu-o? Bhuu kali, gbe ngaiza ndula inde bhú djila mu-o. Pipita-a, mu tsia u la 'kpi ndjindji ngu nagbe mboye ku musoli inde bhú djila ndai mu ko.»

*Ndula ne lí e*

(*Tsia bhú Mat. 7:16-20, 12:33-35.*)

<sup>43</sup> «Ndula na babadha lili lílí na sisiti de. La di-e, ndula na sisiti lili lílí na babadha de. <sup>44</sup> U mbila ndula li lí e. U koko manga li ndula na eti de. La di-e, u koko malibhombi li kobe de. <sup>45</sup> Kpála na babadha-a, ka bádha 'ngú inde li bua ani-e, ani méne bhadi engú na babadha. La di-e, kpála na sisiti-e, ka siti 'ngú inde li bua ani-e, ani méne bhadi engú na sisiti. Engú inde ngakoto bhú 'bhø kpála-a, a ko engú inde ngayie ali bua ani ko.»

*Oeti bhisi*

(*Tsia bhú Mat. 7:24-27.*)

<sup>46</sup> «La ka ni yi nga'li ma lie ndu 'kpi hana me: «Ngámá, Ngámá?» Yi la ngamene engú inde ma ngapa e pi yi me yi mene e ade. <sup>47</sup> Kpála bini inde agó abháka ma, adjé 'li ma, ani tsia méne maka ma apa lie, ma akunda napana pi yi me ani maka da. <sup>48</sup> Ani maka kpála inde aholo nayiki eti. Ani adjí edú tsutsu, ani atsia a'o 'dhu 'dhu-o pí teme. Li engu asi lie, a ago atu lie li kute eti-o, eti ango-o tsia dyiki de, anga a alu kpekpeke. <sup>49</sup> Engú bini, kpála bhende



adje 'li ma, aní tsia mene maka ma apa lie de-e, aní maka kpála inde ayiki eti gba e pí doto. 'Dhú 'dhú tété ade. Li engu asi lie, a ago atú lie li kute eti-o. Eti-e atuko bha kolo má gala, a atsia agugumu hana má kpokobhø!»

## 7

*Yesu akobho kpála na kulu gba ngámá bini gba osudha*  
(Tsia bhú Mat. 8:5-13.)

<sup>1</sup> Pita aní andjia napa ndú ongú bhomu-o lie hana pí okpála-a, aní atsia atapa bhú kuti na Kapalanauma. <sup>2</sup> Oo, abhú Kapalanauma-a, ngámá bini gba osudha na Loma,\* adú ne bali gba e bini inde aní adú akunda e naali. A adú li bali ango-o ne kuo masakpe de me aní kodho bua e. <sup>3</sup> Li aní adje 'ngú gba Yesu-o lie, aní atsia atima obhelesi okpála koko gba omaYuda agba Yesu. U anú napa pí aní me, aní go kobho bali gba ngámá ango-o. <sup>4</sup> Li obhelesi okpála bhomu-o akolo de Yesu lie, u atsia aholo nakikiliki lío pí aní me: «Mú ti da namene ehe inde aní ayo e pí aní, i dú me mú nde akunda-o, anga aní ndjindji. <sup>5</sup> Aní kunda di omaha ní naali. Aní ayiki eti nadje líli gba Moidje pí ní ngae.»

<sup>6</sup> Abhomu-o, Yesu atsia aholo 'nú ne uo. Aní akolo lie de kuti-e masakpe-e, ngámá gba osudha-a atsia atima obi e me u pa pí aní me: «Ngámá, mo ondála límú de. Ma ne kpála na padhá. A ayo ka mú nali bhú 'ti gba ma-a de.† <sup>7</sup> Kaka-a, ma u igini líma ndjindji de me ma go kolo lí mú ngama-a de. Engú bini, pa bha koli eli bini, amba

\* 7:2 7:2 Ngámá gba osudha na Loma: Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adú nani maYuda de. † 7:6 7:6 Lí maYuda bini lí bhú 'ti gba kpála inde ne maYuda ade-e, lí maYuda ango-o kólo sisiti kala Ebhe.

bali gba ma-a kobho. <sup>8</sup> Ma ngapa mo-o, anga ma sa lílì gba ongámási. Ma la di ngaha lílì pì osudha. Ma pa pì bhe bini-e me: <Nunú!> Anì nù. Ma pa pì bhe koko-o me: <Gogo!> Anì gó. Ma pa pì bali gba ma-a me: <Mene 'he inde!> Anì méne.»

<sup>9</sup> Lì Yesu adje engú inde lì ngámá bhomu-o apa e lie, anì angamba naali. Anì adji lie, anì atsia apa pì bhiti okpála inde adu akpata anì-e me: «Ma apa pì yi me, ma bhaka nga ngua kpála inde abhuka ma me-e de, belegu de bhú ká omaɬsalaale!» <sup>10</sup> Lì okpála na titima agie lío lie agba ngámá-a, u abhaka me kuo nde ayie lì bali gba ngámá ango-o ayie.

*Yesu azuku ndìlì* na bhobhoko gba ɔkɔ bini na ɔɔɔ

<sup>11</sup> Pìta lì Yesu akobho bali gba ngámá bhomu-o lie, anì atsia atapa bhú gudhu na Naine. Omukpata gba anì ne okpála bhelé anu bhú dabilì bini ne anì. <sup>12</sup> Anì akolo lì 'bhɔ bhotì na gudhu-o lie, a abhaka me u nde adji ne ngbangba makombi bini ngu nazizi. A ko nani koli ndìlì na bhobhoko bini gba ɔkɔ bini na ɔɔɔ. Okpála bhelé na gudhu bhomu-o adu bhú dabilì bini ne ɔɔɔ ango-o.

<sup>13</sup> Abhomu-o, Ngámá Yesu au anì. Lì anì au anì lie, anì adje ndjinga anì naali. Anì atsia apa pì anì me: «'O naku 'gbá!» <sup>14</sup> Pìpìta-a, anì adyudyo lie, anì a'o 'kpa e lì ngbangba-o. Abhomu-o, okpála inde abì kuo atsia alu. Yesu atsia apa pì makombi bhomu-o me: «Ma apa pì mu me, yie bhúlá!» <sup>15</sup> Kpála inde adu igini me anì nde akpìe, anì ayie bhúlá, anì adu madu. Anì atsia aholo nagama 'ngú. Abhomu-o, Yesu atsia aha anì pì 'hi e. <sup>16</sup> Ndu okpála hana adje tsulu. U adu adhɔgɔ Ebhe, u atsia adu apa me: «'Ngbé polofeta akoto bhú ká ní! Ebhe ago nateteke okpála gba e-o!» <sup>17</sup> Ngali na engú lì Yesu amene

e atsia agbolo bhú ndu doto na Yudaya libhomu di ne bhú okuti na ngongo-o hana.

*Djaa bhulu nabatisa okpála atima okpála agba Yesu (Tsia bhú Mat. 11:2-19.)*

<sup>18</sup> Li omukpata gba Djaa agie lio lie, u atsia akpokpo ndu ongamba 'ngú inde li Yesu amene e hana pi Djaa. Abhomu-o, ani a'i okpála bhisi bhú ká uo. <sup>19</sup> Ani atsia atima uo ngú nayi Yesu me: «Ne me mu ne Masiya inde ngago, ne me ayo me ya adjeke kpála koko?» <sup>20</sup> Li okpála bhomu-o akolo lie de ani-e, u atsia apa pi ani me: «Djaa bhulu nabatisa okpála atima ya me ya go yi mu me: «Ne me mu ne Masiya inde ngago, ne me ayo me ya djeke kpála koko?»»

<sup>21</sup> Bha li nedhinga bhomu-o, Yesu akobho okpála bhelé na kuo. Ani akobho obhende adu ne okuo ngangá. Ani akobho di obhende adu ne osisiti bua bhú o-o. Ani atsia abhulu di djila okpála bhelé inde i u 'kpí de-e bhú bádha bhú 'bu gba e-o. <sup>22</sup> Pipita-a, ani atsia agie pi okpála li Djaa atima o-o me: «Yi nu kpokpo pi Djaa engú inde yi au e, di ne bhende yi adje e ko. Okpála i u 'kpí de-e ngau 'kpí. Obhende ne eze li 'dhu o-o, u ngadhuku ndjindji. Okpála na kába ngakobho. Obhende i dje 'kpí de-e ngadje 'kpí. Obhende amu-o ngazuku. Ma ngakpokpo Bádha Ngali pi obhulu ndibhili. <sup>23</sup> A ko djali pi kpála inde i bhúka ma ne bua na bhisi bhisi de ko!»

*Yesu akpokpo 'ngú gba Djaa bhulu nabatisa okpála*

<sup>24</sup> Bhiti okpála adu oo. Pita li obhulu titima gba Djaa agbida lie, Yesu atsia aholo akpokpo 'ngú gba Djaa pi uo me: «Yi anu igini natsia abhú 'gu-o ni? Yi anu igini natsia kpála inde maka mbamba inde ngadyiki ka anvi-e? A mo-o ade. <sup>25</sup> I du mo-o de-e, yi anu la igini natsia ni? Kpála inde adyi babadha bongo-o? A mo-o ade, anga

obhende ngadyi babadha bongo-o, inde di ne ká tia ka o-o ngadu abhú 'ti gba ongámási. <sup>26</sup> Yi anu nga la igini natsia ni? Polofeta? A moko, ma apa pi yi me, yi au bhende ane belegu polofeta mane. <sup>27</sup> Padhá de, anga a ko kpála inde li eli gba Ebhe-e apa 'ngú gba e me:

«Ebhe apa me, ma ngatima bhulu titima gba ma-a pi mu kalanu

ngú naleke kpadji pi mu.†»

<sup>28</sup> Ma apa pi yi me, Djaa ngbéngbé ane ndu okpála hana. Engú bini, kpála inde ane ne mboye bhú Nau gba Ebhe-e, ani ane ani ne engbé.»

<sup>29</sup> Ndu okpála hana, belegu ondombi na mandjandja adu adje Yesu. Abhomu-o, u ambila nani ngbili 'ngú gba Ebhe-e lie, Djaa atsia abatisa uo. <sup>30</sup> Engú bini, omuFalisai ne omusuno na líli gba Moidje ayala nani me Djaa batisa o. U amene lie mo-o, u ayala engú inde li Ebhe adu akunda e pi uo-o.

<sup>31</sup> Do Yesu matá me: «Ma tí da nasuno okpála na naki si li da? Uo maka da? <sup>32</sup> Uo maka ongisi inde adulu bhú daposu. Okoko ngasusula pi obi o me:

«Ya abhi ngbabi na ebi pi yi,

engú bini, yi tsia dho 'bi de!

Ya ali etsi na da kuo pi yi,

engú bini, yi ku 'gbá de!»

<sup>33</sup> Padhá de, anga Djaa bhulu nabatisa okpála ago, ani zu 'he maka okpála koko de, ani ndji di vino de, do yi me: «A bhú ani ne siti bual» <sup>34</sup> Ngama, Ndili gba kpála, ma ago, ma ngazu 'he maka okpála koko, ma ngandji vino, do yi me: «Yi tsia nga kpála inde ngabhundja bha bini nazu 'he di ne nandji vino! Ani ngakunda ondombi na mandjandja, a ko la di olia okpála na sisiti!» <sup>35</sup> Engú bini,

† 7:27 7:27 Tsia bhú Mal. 3:1.

ndu okpála hana inde abhuka imbilangu gba Ebhe-e, u ambila me imbilangu ango-o ngbingbili.»

*Yesu azu* 'he abhú 'ti gba Simo muFalisai

<sup>36</sup> A adu nani muFalisai bini, ani a'i Yesu ngu nazu 'he bhú dabili bini ne e. Yesu ali bhú 'ti gba muFalisai-o. Oo, ani atsia aholo nazu 'he-o. <sup>37</sup> ӨӨ bini na sisiti adu bhú gudhu bhomu-o. Ani adje lie me Yesu ngazu 'he abhú 'ti gba muFalisai bhomu-o, ani ago ne gili bini inde u abho e li teme inde u a'i e me alabatele.† Gili ango-o abedhe nani ne mungotsi bedhe. <sup>38</sup> Ani akolo lie, ani atsia akita bhú li 'dhu Yesu li pápá ne akele ani. Ani aholo naku 'gbá, ngula adu atuko li 'dhu Yesu. Abhomu-o, ani aholo nakukuo ne sundjo e. Ani akama 'dhu ani, ani atsia aha mungotsi-e, ani atuko tété. <sup>39</sup> Li muFalisai inde a'i Yesu au lie mo-o, ani atsia apa li bua e me: «Kpála inde-e, a ko bha ndju polofeta de kukulu! Padhá de, anga ӨӨ inde ngabu 'kpa e li ani bhomu-o, a ko siti ӨӨ. Ani mbila la-a del!»

<sup>40</sup> Abhomu-o, Yesu atsia apa pi muFalisai-e me: «Simo, ma mbo ne engú bedi napapa pi mu.» Simo atsia agie me: «Musuno, papa.» <sup>41</sup> Yesu atsia apa me: «Kpála bini aha nani bopulu pi okpála bhisi. Ani aha pi kpála bhe bini-e lí falanga kámá bhuluvue. Ani atsia aha pi kpála bhe koko-o lí falanga ndjikpa bhuluvue. <sup>42</sup> Li tia du la lie ka okpála ango-o ngu nagigie de-e, abhomu-o, ani atsia ambu li bopulu gba ndu uo bhisi hana. Bhú ká okpála bhisi bhomu-o, akúnda ani ané mane ne bhedho?» <sup>43</sup> Simo atsia agie me: «Ma abhundja me a ko kpála bhende u ambu li bopulu gba e adu bhelé naali ko.» Do Yesu pi ani me: «Mo opa ndjindji.»

---

† 7:37 7:37 Alabatele: A ko teme na mase naali inde u abhobho oehe maka gili lie ko.

<sup>44</sup> Pipita-a, aní adji lie ne lí pápá gba ɔlɔ-o, aní atsia apa pí Simo me: «Mo ou engú lí ɔlɔ inde-e amene e au? Ma alí lie bhú 'tí gba mú-o, mú ha engu múma ngú navulu 'dhu ma de.»<sup>§</sup> Engú bini, ngaani-e, aní avulu 'dhu ma ne ngula na djila e. Aní atsia akuo ne sundjo e. <sup>45</sup> Mú kama ma de. Engú bini, ngaani-e, nayie maka ma alí igini lie si-e, akolo pí mbia inde-e, aní 'o nakama 'dhu ma de. <sup>46</sup> Mú tuko emú pí 'ndji ma de. Engú bini, ngaani-e, aní atuko mungotsi lí 'dhu ma.

<sup>47</sup> Kaka-a, ma apa pí mú me, mukunda na ngbéngbé inde aní asuno e, apana me u a'e bhiti siti 'ngú gba aní-e a'e. Engú bini, kpála inde u a'e siti 'ngú gba e me a nde yeye-e, aní pána bhadi mukunda na yeye.» <sup>48</sup> Abhomú-o, aní atsia apa pí ɔlɔ bhomú-o me: «Ma a'e osisiti 'ngú gba mú-o a'e.» <sup>49</sup> Okpála inde adu azu 'he bhú dabilí bini ne aní aholo nabhundja me: «A inde-e mangua kpála dho? Aní nga 'e belegu siti 'ngú!» <sup>50</sup> Abhomú-o, Yesu atsia apa pí ɔlɔ-o me: «Ebhe akobho mú, anga mo obhuka ma. Nu ne guo 'ngú .»

## 8

**Omukpata ndjikpa ne ká bhisi ne olisi koko akpata Yesu**

<sup>1</sup> Pipita-a, Yesu adu adholo bhú ndu ogudhu di ne bhú ndu okuti hana. Aní adu akpokpo Bádha NgaliNau gba Ebhe-e ne ndu bilí hana. Omukpata ndjikpa ne ká bhisi-e adu bhú dabilí bini ne aní. <sup>2</sup> Olisi koko nani lí Yesu apandja osisiti bua bhú o, ne obhe aní akobho o ne okuo-o, a adu di bhú dabilí bini ne aní. A du nani:

---

§ 7:44 7:44 Simo ha nani engu pí Yesu ngú navulu 'dhu e de, anga Simo adu au lie me ní ngbéngbé pí Yesu ngaani. Tsia bhú Dje. 18:4, 19:2.

Malia (u a'í e me kpála na gũdhũ na Magadala) nani li Yesu apandja osisiti bua bhũ e mananika-o; <sup>3</sup> Djaani, wala Kudja, ngámá na kulu gba 'ngbé ngámá Elode; Sudjana ne olisi koko bhelé. Ndu olisi bhomu-o hana adu aha tia gba o ngũ nateteke Yesu ne omukpata gba e ne di.

*Gbitaku gba kpála nalu nguwa*

(*Tsia bhũ* Mat. 13:1-9; di ne bhũ Mlk. 4:1-9.)

<sup>4</sup> Okpála adu nayie bhũ gũdhũ bini ne bini, u adu ago abhaka Yesu. Li okpála bhelé adu apokobhø bhũla o lie de ani-e, ani atsia apa gbitaku inde-e me: <sup>5</sup> «Kpála bini anu ngũ nabala nguwa abhũ 'dyi gba e. Ani adu ababala lie, té nguwa koko atsia abala li kpadji. Okpála adedele ne 'dhũ o, odhu atsia ago, u azu bhobhomu-o hana. <sup>6</sup> Koko abala li bili na teme. Li ezu-o aze lie, atsia a'ulu anga engu du bhũ doto sasa de. <sup>7</sup> Koko atsia abala li bili na eti. A akø lie, ezu-o akø ne eti-e bhũ dabili bini. Eti-e atsia agaga ezu-o. Kaka-a, ezu-o bhele ndjindji de. <sup>8</sup> Engũ bini, koko atsia abala naae bhũ doto na babadha. Ezu-o akø, a atsia ali lílí. Nguwa bini ne bini ali lílí kámá bini.» Yesu atsia apa matá me: «Yi dje ndjindji, i du me a nde li yi ne 'dje 'dje ngũ nadje 'kpí ko!»

*Ka ni li Yesu adu akpo 'ngũ lie bhũ ogbitaku-o?*

(*Tsia bhũ* Mat. 13:10-17; di ne bhũ Mlk. 4:10-12.)

<sup>9</sup> Omukpata gba Yesu ayi ani me: «Ta gbitaku bhomu-o pi?» <sup>10</sup> Ani atsia agie pi uo me: «Ngayi-e, yi ambila naayi engũ inde awo nani lie kalanu pindji Nau gba Ebhe-e ambila. Engũ bini pi okpála koko-o, ma akpo engũ bhomu-o bhũ ogbitaku maka li Bhuku gba Ebhe apa lie me:

«U ti da natsia 'kpí,

engũ la bini, u ú 'kpí de.

U ti da nadje 'kpí,

engú la bini, u mbíla tata-a de.†»

*Yesu akpo ta gbitaku gba kpála nalu nguwa-o*

(*Tsia bhú* Mat. 13:18-23; di ne bhú Mlk. 4:13-20.)

<sup>11</sup> «Ta gbitaku bhomu-o me, nguwa-a, a ko eli gba Ebhe-o. <sup>12</sup> Nguwa bhende abala li kpadji-e, a ko okpála bhende ngadje eli gba Ebhe-o. Engú bini, li Djabulu gó, ani tsia dhépe eli ango-o li bua uo, ngu nagbite kpadji pi uo me u abhúka de, amba Ebhe akóbho uo de. <sup>13</sup> Nguwa bhende abala li bilí na teme-e, a ko okpála bhende ngadje eli gba Ebhe-e, u tsia sía ne djali hana. Engú bini, eli ango-o lí li bua uo de. U bha ngabhuka ngubula nedhinga bedi. Li nale kolo-o, u 'ó ká nabhuka gba o-o. <sup>14</sup> Nguwa bhende abala li bilí na oeti-e, a ko okpála bhende ngadje eli gba Ebhe-o. Engú bini, u ne gumu ndu 'he na doto ngangá. U ne gumu tia na doto ne odjali na mukobho na doto. Gumu tia na doto ne odjali na mukobho na doto ango-o ngagaga Eli-o. Kaka-a, eli bhomu-o lí lílí nabhele mabhele de. <sup>15</sup> Nguwa bhende abala bhú doto na babadha-a, a ko okpála bhende ngadje eli gba Ebhe ne bua na babadha, u tsia zíba. U líla ndjindji, u tsia lí lílí ka kekele gba o ko.»

*Gbitaku na eke*

(*Tsia bhú* Mlk. 4:21-25.)

<sup>16</sup> «I du me kpála bini nde adhedhe eke-e, ani búku ne usa de. Ani tó di asa polo de. Engú bini, ani 'ó pí 'he ngubula me okpála inde ngali bhú 'ti-e, u u 'kpí tété ndjindji. <sup>17</sup> A moko, ndu 'he hana inde awo lie mawo-o, akóto bhú mbasu. Ndu 'he inde na pepe hana akóto li zi 'kpí, li okpála tsia mbíla. <sup>18</sup> Kaka-a, 'e-e! Yi lila liyi bhú nadje eli-o, anga kpála li ehe nde ka e, u ahá matá koko pi

† 8:10 8:10 Tsia bhú Isa. 6:9.



ani pépé. Engú bini, kpála inde li ehe nde ka e ade-e, u adhépe belegu mboye 'he bhende ani ngabhundja me a ka ni ko.»

*'Hi Yesu ne ondaise Yesu*

(*Tsia bhú* Mat. 12:46-50; di ne bhú Mlk. 3:31-35.)

<sup>19</sup> 'Hi Yesu ne ondaise Yesu ago ngu natsia ani. Engú bini, u ale nakolo li ani pima ka bhiti okpála-o. <sup>20</sup> Abhomu-o, u atsia apa pi Yesu me: «'Hi mu ne ondaise mu akilidjo, u ngakunda nau mu.» <sup>21</sup> Engú bini, Yesu atsia apa pi ndu uo hana me: «'Hi ma ne ondaise ma-a, a ko okpála inde ngadje eli gba Ebhe ne namemene ko.»

*Yesu ayoko kpéke anvi pí 'ngu*

(*Tsia bhú* Mat. 8:23-27; di ne bhú Mlk. 4:35-41.)

<sup>22</sup> Ekpí bini pipita-a, Yesu ne omukpata gba e a'u bhú zabu bini. Ani atsia apa pi uo me: «Ní gulu ekpθ-o ai 'ngu.» Abhomu-o, u atsia atapa. <sup>23</sup> Nedhinga u adu agulu 'ngu-o lie, Yesu atsia ati ne ela. Kpéke anvi na gipi aholo nape pí ekpθ-o. Engu aholo nabedhe bhú zabu-o, kuo atsia akolo de uo masikpe. <sup>24</sup> Omukpata adyudyo lio de Yesu masikpe, u atsia azuku ani me: «Musuno, Musuno, ní adji amú!» Yesu azuku, ani atsia ambe bhú 'ndji anvi di ne wowo 'ngu-o. Abhomu-o, anvi-e a'o nape, engu-o atsia akolo guguo. <sup>25</sup> Do ani pi uo me: «Nabhuka gba yi-e su?» Engú bini, u adu adje tsulu, u atsia adu angamba naali. Abhomu-o, u adu apa sunda o me: «A e mangua kpála dho inde ngaha belegu líli pi anvi ne engu, uo ngamemenel!»

*Yesu akobho kpála bini li osisiti bua adu ato mbolo li e*

(*Tsia bhú* Mat. 8:28-34; di ne bhú Mlk. 5:1-20.)

<sup>26</sup> Abhomu-o, u akolo bhú ndu doto gba okpála na Gelasa, ayi ekpθ bhúla ndu doto na Galilaya. <sup>27</sup> Nedhinga

li Yesu adu akoto bhú zabu-o lie, kpála bini na kuti bhomu-o ago ngú nabhaka ani. Kpála ang-o, osisiti bua adu bhú ani. Ekpí bhelé, ani du adyi bongo de, ani du asi bhú 'ti de. La-a, ani adu bha bini adu bhú ká olata. <sup>28-29</sup> Siti bua-a adu agbulu ani piko. Abhomu-o, u atsia adu agbite 'kpa ani ne 'dhu ani ne ekpú di ne gbíndjili ngú nalila ani. Engú bini, kpála ang-o adu atsotsolo gbíndjili di ne ekpu-o má dhu dhu dhu! Siti bua atsia adu amba bhúla ani ne abhú mili bilí. Li kpála ang-o au Yesu lie me-e, ani aholo natu 'ue. Abhomu-o, ani ati bhú li 'dhu Yesu, ani atsia asula kpekpeke me: «Yesu, Ndili gba Ebhe na Apí 'Kpí, mo okunda namene ngú ma pí? Ma ayo ka mu me, mo oméne ma sisiti de!» Ani apa nani mo-o, anga Yesu adu aha líli pí siti bua ang-o me ani koto bhú kpála bhomu-o makoto.

<sup>30</sup> Yesu atsia ayi kpála ang-o me: «A 'li mu pí?» Ani agie me: «A 'li ma me «Bhelé.»» Ani apa mo-o anga osisiti bua bhelé alí nani bhú ani. <sup>31</sup> Osisiti bua ang-o atsia adu akikiliki lío pí Yesu me: «Mo ombá ya bhú tsu 'dú bhe má ngbongobho-o de!» <sup>32</sup> A abhaka me 'ngbé piga opame bini nde ngagili 'zu gba o pí 'ta oo. Osisiti bua-a atsia apa pí Yesu me: «Ha kpadji pí ya, ya li bhú opame bhomu-o.» Ani atsia aziba pí uo. <sup>33</sup> Abhomu-o, osisiti bua aze bhú kpála ang-o, u atsia amba lío bhú opame-o. Piga opame bhomu-o libhому ayie ne holo apí 'ta, u anu alilinda bhú ekpθ-o, u atsia amu.

<sup>34</sup> Li omulila gba opame au engú inde akodho 'kpí-e lie, u atsi ne holo, u atsia anu nakpokpo ngali ang-o abhú gudhu ne abhú okuti. <sup>35</sup> Okpála aze ngú nau

---

\* 8:32 8:32 Engú inde amene lie si-e, a du nani bhú kuti gba omaYuda de, anga omaYuda ngau opame sisiti. Tsia bhú Lev. 11:7, ne bhú Det. 14:8, di ne bhú Mlk. 5:11.

engú inde akodho 'kpí-o. U akolo de Yesu lie, u abhaka me kpála inde li osisiti bua aze bhú e nde adu kuto bhú li 'dhu Yesu. Aní adu me aní nde adyi bongo, aní nde ngabhundja 'ngú hana ndjindji. Abhomu-o, tsulu atsia aholo uo. <sup>36</sup> Okpála inde au ndu 'ngú bhomu-o hana atsia akpokpo pi uo maka li Yesu akobho kpála ango-o lie ko.

<sup>37</sup> Abhomu-o, ndu okpála hana na ndu doto bhomu-o atsia apa pi Yesu me aní yie bhú kuti gba o mayie, anga u adu adje tsulu naali. Yesu a'u bhú zabu-o ngú na'e ne enú. <sup>38</sup> Kpála inde li osisiti bua aze bhú e aholo nalopolo lie pi Yesu me: «Yesu, i du me mu nde akunda-a, mo o'ó ka ma de, ní nu ne mu.» Engú bini, Yesu agie aní sidi, aní atsia apa pi aní me: <sup>39</sup> «Gie limu agba mu, amba mu kpokpo ndu 'ngú inde li Ebhe amene e pi mu-o hana.» Abhomu-o, kpála ango-o atsia atapa ne kpokpo ndu 'ngú li Yesu amene e pi aní-e hana bhú gudhu libhому.

*Yesu akobho* 00 bini, aní atsia azuku di ndili na 000 gba Yailo

(*Tsia bhú* Mat. 9:18-26; di ne bhú Mlk. 5:21-43.)

<sup>40</sup> Nedhinga li Yesu agie lie lie ali pála ekp0 koko-o, okpála bhelé asia aní ndjindji, anga ndu uo hana adu adjeke aní. <sup>41</sup> Li nedhinga bhomu-o, kpála bini akolo. A adu 'li aní me Yailo. Aní adu nani ngámá na eti nadjie líli gba Moidje na bilí bhomu-o. Aní ati bhú li 'dhu Yesu, aní atsia akikiliki lie pi aní me aní nu agba ni, <sup>42</sup> anga ndili gba aní na 000 adu masikpe de nakpi. Koli ndili bhomu-o bha nani ka aní bini, aní adu ne kalanga ndjikpa ne ká bhisi. Li kpadji-e, bhiti okpála asulu Yesu má wakaka!

<sup>43</sup> A abhaka me 00 bini nde oo. 00 ango-o, ngute adu atuko li aní bhú sunda kalanga ndjikpa ne ká bhisi. [Aní andjia nani tia lie hana pi omutia], engú bini, kpála bini

ti nani da nakobho ani de. <sup>44</sup> Ani ago ne akele Yesu, ani atsia abu 'kpa e li bongo 'ta ani-o.† Ngute-e a'o bha kolo natuko li ani maka ndjombe. <sup>45</sup> Abhomu-o, Yesu atsia ayi me: «A abu 'kpa e li ma da?» Ndu uo hana agie me: «A ko naae ya de!» Piele atsia apa pi Yesu me: «Musuno, bhiti okpala inde asa mu ngbalina inde-e, ngasulu mu ngao.» <sup>46</sup> Engu bini, Yesu atsia apa me: «Kpala bini abu 'kpa e li ma, anga ma ambila me te angu gba ma-a akoto.»

<sup>47</sup> Oe ang-o au me Yesu ambila engu inde ni amene e ambila. Abhomu-o, ani ago ne naguku, ani tsia ati bhú li 'dhu Yesu. Ani atsia akpokpo pi Yesu kala ndu okpala hana ta 'ngu inde ani abu 'kpa e li ani lie, di ne maka ani akobho bha lie maka ndjombe-o. <sup>48</sup> Yesu pi ani me: «Ndi oe-e, mo okobho, anga mo obhuka ma kukulu. Nu ne guo 'ngu .»

<sup>49</sup> Nedhinga li Yesu adu apa lie mo-o, kpala bini ayie agba ngamá Yailo, ani ago apa pi ani me: «Ndili gba mu-o andjili. Mo ondala mata musuno de.» <sup>50</sup> Engu bini, li Yesu adje ani lie, ani atsia apa pi Yailo me: «Mo odje tsulu de, du bha ne nabhuka, ndili gba mu-o akobho makobho.»

<sup>51</sup> Li Yesu akolo lie agba ngamá Yailo, ani ziba de me kpala bini li nganda ni abhu 'ti-e de, bha bini Piele, Djaa ne Djaki, a la bhadi-e 'dyi ndili-e ne 'hi ndili-o. <sup>52</sup> Ndu okpala inde adu oo hana, adu atu 'ue ne naku 'gba ngu ndili ang-o. Abhomu-o, Yesu atsia apa pi uo me: «Yi 'o naku 'gba! Ndili-e kpi de, engu bini, ani tila.» <sup>53</sup> La-a, u aholo namu ani anga u adu ambila ndjindji me ndili-e akpi. <sup>54</sup> Abhomu-o, Yesu aholo 'kpa ani, ani atsia asula kpekpeke me: «Ndika ma, yie bhulá!» <sup>55</sup> Ndili-e azuku,

---

† 8:44 8:44 Bhú líli gba omaYuda-a, li oe du ne kuo gba olisi-e, ani bu 'kpa e li bhoko-o, li bhoko ang-o kolo sisiti kala Ebhe. Tsia bhú Lev. 15:25-33.

ani ayie bhúlá kolo má gala! Yesu atsia aha lílí pì uo me, u ha ezú pì ani. <sup>56</sup> Okpála inde azu ani angamba naali. Engú bini, Yesu agbele 'dje uo kpekpeke me u apá belegú engú inde akodho 'kpí-e pì kpála bini de.

## 9

*Yesu atima obhúlu* titima ndjikpa ne ká bhisi gba e-o  
(*Tsia bhú* Mat. 10:5-15; di ne bhú Mlk. 6:7-13.)

<sup>1</sup> Ekpí bini, Yesu apo bhúla omukpata ndjikpa ne ká bhisi gba e-o. Aní aha angu pì uo me u pandja ndú osisiti bua hana bhú okpála, amba u kobho di okpála na kuo. <sup>2</sup> Pípita-a, aní atsia atima uo me u nù ne kpokpo ngali Naú gba Ebhe , amba u kobho di okpála na kuo. <sup>3</sup> Aní pì uo me: «Nanú ka yi-e, yi abhá oehe de. Yi ahá ndula de. Yi ahá ehe ngú nabi 'he bhúbhú de. Yi ahá ezú de. Yi ahá falanga de. Kpála bini bhú ká yi ahá bongo na mbulu bhisi de. <sup>4</sup> Ndú eti hana u asía yi bhú e-e, yi dú bha oo, akólo lí nedhinga inde yi ayíe líe bhú eti ango-o. <sup>5</sup> Ndú eti hana u sía yi bhú e de-e, yi de koto bhúbhú, amba yi pulu doto na kuti gba uo inde adhedhe lí 'dhú yi-o. Bhobhomú-o asúno pì uo me u amene siti 'ngú.»\* <sup>6</sup> Obhúlu titima gba Yesu agbida, u apú bhú ndú okuti hana. U akpokpo Bádha Ngali gba Ebhe-e pì okpála. U atsia akobho di okpála na kuo ne ndú bilí hana.

*Mabhundja gba Elode adholo ngangá*

(*Tsia bhú* Mat. 14:1-12; di ne bhú Mlk. 6:14-29.)

---

\* <sup>9:5</sup> <sup>9:5</sup> Okuti gba omaYuda inde i ziba nani Bádha Ngali gba Ebhe-e de-e, u dú nani au uo maka omaYuda de, ne odoto gba o-o hana. Tsia bhú Mlk. 6:11.

<sup>7</sup> Elode , ngámá na ndu doto na Galilaya, adje ndu 'ngú li Yesu ne omukpata gba e adu amene e hana. Abhomu-o, mabhundja gba ani-e atsia aholo adholo ngangá, anga okpála koko adu apa me: «Djaa bhulu nabatisa okpála azuku!» <sup>8</sup> Okoko adu apa me: «Polofeta Eliya akoto bhomu-o ngae.» Okoko atsia adu apa matá me: «Suka opolofeta na kalanu-o, azuku bhomu-o ngae.» <sup>9</sup> Engú bini, Elode atsia apa naae me: «Ma aha nani líli-e ngama me u kodho ngulu Djaa . Kpála bhende ma ngadje okpála apa 'ngú gba e me-e, a ko matá naae da?» Abhomu-o, ani atsia adu agili me ni u Yesu.

*Yesu aha 'zu pi bhiti okpála*

*(Tsia bhú Mat. 14:13-21; ne bhú Mlk. 6:30-44; di ne bhú Dja. 6:1-14.)*

<sup>10</sup> Li obhulu titima agie lio lie de Yesu-o, u atsia akpokpo ndu 'ngú inde u amene e hana pi ani. Pipita-a, ani abha uo, ani atsia atapa ne uo de okpála tsutsu li pápá na gudhu na Betesaida. <sup>11</sup> Engú bini, li bhiti okpála bhomu-o ambila lie me u agbida oo, u atsia akpata ani. Abhomu-o, Yesu asia uo, ani atsia akpokpo 'ngú pindji Nau gba Ebhe-e pi uo. Ani atsia akobho di okpála inde adu ne kuo ko.

<sup>12</sup> Li ekpí aholo lie nabi-e, obhulu titima ndjikpa ne ká bhisi-e adyudyo lio de Yesu, u atsia apa pi ani me: «Ha kpadji pi okpála, amba u gbida nagili dabili nasi tété, di ne ehe nazu mazu bhú odjedje kuti masikpe si, anga ní ei bhú mili bili.» <sup>13</sup> Do Yesu pi uo me: «Yi ha 'zu pi uo ngayi.» U atsia agie me: «A bha ka ya si ne mapa bhuluvue di ne sungu bhisi. Ne me mo okunda me ya nu nakala ezu pi ndu okpála inde-e hana गया?» <sup>14</sup> (Obhosi adu nani oo masikpe de kutu bhuluvue.) Yesu atsia apa pi omukpata gba e me: «Yi pa pi uo me u popo bhúla o

okpála ndjikpa bhuluvue, ndjikpa bhuluvue, amba u **dulu** kuto.»

<sup>15</sup> Omukpata-a amene maka ani apa pi uo lie ko. U atsia apa pi ndu okpála hana me u **dulu** kuto. <sup>16</sup> Abhomu-o, Yesu aha mapa bhuluvue ne sungu bhisi-o, ani atsia 'kpí ne bhúlá, ani atsia agie heni pi Ebhe ngubula ezu bhomu-o. Pipita-a, ani agumu mapa ne sungu-o, ani aha pi omukpata ngú nagagapa li okpála. <sup>17</sup> Ndu uo hana azu 'he, u a'u'u má kpú kpú kpú! Dudu atigala-a, obhulu titima alo, a atsia abebedhe oklí ndjikpa ne ká bhisi.

*Piele apa me Yesu ne Masiya*

(Tsia bhú Mat. 16:13-19; di ne bhú Mlk. 8:27-29.)

<sup>18</sup> A akolo ekpí bini, Yesu adu akpokpo 'ngú ne Ebhe kpi e kpi me, omukpata gba ani-e nde de ani. Ani atsia ayi uo me: «Okpála ngapa me ma ne da?» <sup>19</sup> U agie me: «Okpála koko ngapa me, mu ne Djaa bhulu nabatisa okpála. Okoko me, mu ne polofeta Eliya. Okoko matá me, sika opolofeta na kalanu-o azuku.» <sup>20</sup> Ani atsia ayi matá uo me: «A la yi-e, yi ngapa naayi me ma ne da?» Do Piele me: «Mu ne Masiya inde li Ebhe atima e ko.»

*Yesu akpo 'ngú pindji nakpi ne nazuku ka e*

(Tsia bhú Mat. 16:20-28; di ne bhú Mlk. 8:30, 9:1.)

<sup>21</sup> Engú bini, ani agbele 'dje uo kpekpeke, ani atsia aha líli me u apa belegu engú bhomu-o pi kpála bini de. <sup>22</sup> Abhomu-o, ani atsia apa matá pi uo me: «A ayo me ngama, Ndili gba kpála-a, ma dje likabhu naali. Obhelesi okpála, ongbengbe odimandø di ne omusuno na líli gba Moidje ayála ma. U abhólø ma, engú bini, ekpí na bata-a, ma tsia zúku.»

<sup>23</sup> Pipita-a, ani apa pi ndu okpála hana inde adu oo me: «I du me kpála nde akunda nakpata ma-a, a ayo me ani 'o nabhundja 'ngú gba e makpe. Ekpí bini ne bini hana, a

ayo me aní bī kulusi gba e-o, amba aní kpata ma. <sup>24</sup> Padhá de, anga í dū me kpála nde akunda nalila mukobho gba e, aní kpí. La-a, í dū me kpála nde akunda nakpi ngubula ma-a, aní tsia kóbho. <sup>25</sup> Í dū me kpála nde asia ndū 'he na doto hana, engú la bini, ngaani makpe aní ngíta-a, aní tsia kpi-e, a la pí aní babadha bhúbhú ne ní? <sup>26</sup> Í dū me kpála bini nde adje nūmū lí 'ngú gba ma-a, di ne bhe ma ngapa e-e, ngama Ndili gba kpála, ma adjé bhadi nūmū lí 'ngú gba aní. A adú moko lí nedhinga ma agó lie bhú naū na asasaua gba ma, ne bhe gba 'Dyi ma, di ne bhe gba oandjelu na bububu-o. <sup>27</sup> Ma apa pí yi na paká me, okpála koko bhú ká obhende inde sí-e, mú padhá de, u aú ngaiza Naū gba Ebhe-e kalanū.»

Zi Ebhe asa Yesu ngbalina

(Tsia bhú Mat. 17:1-8; di ne bhú Mlk. 9:2-8.)

<sup>28</sup> Masikpe de ekpí madjina pita aní apa 'ngú bhomu-o lie, Yesu aha Piele, ne Djaa di ne Djaki, aní atsia a'ū ne uo apí 'ta ngú nakpokpo 'ngú ne Ebhe. <sup>29</sup> Aní adū akpokpo 'ngú ne Ebhe lie, bhúla aní ayipa lie, bongo gba aní avu má tuu! <sup>30</sup> Kolo me-e, okpála bhisi aze, u atsia aholo nagama 'ngú ne aní. A adū nani Moidje ne Eliya. <sup>31</sup> Zi Ebhe asa uo ngbalina. U atsia adū akpokpo 'ngú ne Yesu maka aní adji nandjia kulu gba e lie ne nakpi ka e abhú Yelusalema ko. <sup>32</sup> Piele ne obi e adū ne ela má yikpokpo! U agbungbua lío lie, u au Yesu ne okpála bhisi me zi Ebhe nde asa uo ngbalina. <sup>33</sup> Lí okpála bhisi bhomu-o adū ayie lie de Yesu-o, Piele atsia apa pí aní me: «Mūsuno, ya sí ndjindji. A ayo me ya yiki 'tí ngbangbali bata, bini pí mū, bini pí Moidje, bini pí Eliya.» (Engú bini, aní dū ambila ta 'ngú inde aní adū apa e de.)

<sup>34</sup> Nedhinga aní adū apa 'ngú bhomu-o lie, ndindi atsia ago abuku uo. Lí ndindi adū abuku uo lie, omukpata



atsia aholo nadje tsulu naali. <sup>35</sup> Bhú ndindi-e, eli bini akoto, atsia apa me: «Kpála inde-e, a ko Ndili gba ma inde ma abhu e ko. Yi dje ani!» <sup>36</sup> Pita li eli bhomu-o andjia lie, u au bha ibili Yesu kpi e kpi. Nani li nedhinga bhomu-o, omukpata andjili bha má bulu! U tsia pa nga nani engú ang-o pi kpála bini de.

*Yesu akobho ndili* na bhobhoko bini li siti bua adu ato mbolo lie

(*Tsia bhú* Mat. 17:14-18; di ne bhú Mlk. 9:14-27.)

<sup>37</sup> Li ekpí aseke lie, Yesu ne omukpata bata-a akò eta-o. Okpála bhelé atsia ago ngú nakò lio ne Yesu. <sup>38</sup> Bhú ká okpála bhomu-o, kpála bini aholo nasusula me: «Musuno, kikiliako, dje nga bha-a mbo ndjinga ndili gba ma na bhobhoko-o. Koli ani bha ka ma bini! <sup>39</sup> Siti bua ngagbulu ani piko. A ngaha pi ani natu 'ue. A ngadyiki ani kpekpeke má djigi djigi! Li efu holo naze bhú 'bhò ani. Bua ang-o le bha nakoto bhú ani pima. Li angu ani ndjia má ngba! <sup>40</sup> Ma akikiliki lima pi omukpata gba mu-o me u gbe bua ang-o bhú ani, engú bini, u ale pima.»

<sup>41</sup> Do Yesu de-e: «Ngayi okpála na naki-e, yi ne nabhuka ade, yi ngamene siti 'ngú. Ma adú matá ne yi bhú dabili bini ngubula ekpí madho? Ma akíbila matá yi ngubula ekpí madho?» Pipita-a, Yesu apa pi kpála ang-o me: «Go ne ndili gba mu ei.»

<sup>42</sup> Li ndili-e adu ago lie, bua ang-o adyiki ani má djigi djigi! Ani atsia agu 'i ani kuto má gbwe! Abhomu-o, Yesu ambe bhú 'ndji siti bua ang-o. Ani akobho ndili-o, ani atsia aha ani pi 'dyi e. <sup>43</sup> Ndu okpála hana adu angamba. U atsia aziba me Ebhe ne angu naali.

*Yesu akpo matá engú* pindji nakpi gba e ko

(*Tsia bhú* Mat. 17:22-23; di ne bhú Mlk. 9:30-32.)

Li ndu okpála hana adu angamba lie li ndu 'ngú li Yesu adu amene e, ani atsia apa pi omukpata gba e me: <sup>44</sup> «Yi dje engú ma adji apa e pi yi inde-e ndjindji. U apú ma, Ndili gba kpála-a, pi okpála na doto.» <sup>45</sup> Engú bini, omukpata gba ani-e mbila nani ta 'ngú bhomu-o de. Ebhe awo nani tata-a pi uo mawo. U atsia adu adje tsulu ngú nayi ani tété.

*A ngbéngbé da?*

(*Tsia bhú* Mat. 18:1-5; di ne bhú Mlk. 9:33-37.)

<sup>46</sup> Abhomu-o, omukpata aholo amene kpekebho sunda o ngú nambila me, a ti da nadu ngbéngbé bhú ká o da. <sup>47</sup> Engú bini, li Yesu ambila engú inde u adu abhundja e li bua o-o lie, abhomu-o, ani aha mboye ndili bini, ani a'o ani de e. <sup>48</sup> Ani atsia apa pi uo me: «Kpála inde asía mboye ndili inde-e ka 'li ma-a, ani asia bhomu-o ma. Kpála inde asía ma-a, ani asia la di bhomu-o kpála inde atima ma ko. Padhá de, anga kpála inde ane ne mboye bhú ká yi hana-a, ani ane ne engbé ngae.»

*Kpála* inde i yala yi de-e, a ko naayi kpála

(*Tsia bhú* Mlk. 9:38-40.)

<sup>49</sup> Abhomu-o, Dja adyudyo lie de ani, ani atsia apa pi ani me: «Musuno, ya au kpála bini ngapandja osisiti bua bhú okpála ne 'li mu. Ya di me yoko ani, anga a ko mukpata gba mu-o maka ya de.» <sup>50</sup> Engú bini, Yesu agie pi ani me: «Yi ayóko ani de, anga kpála inde i yala yi de-e, a ko naayi kpála.»

*Okpála na kuti* bini na ndu doto na Samalia ayala nasia Yesu

<sup>51</sup> Li nedhinga nagie lie ka Yesu abhúlá-a akolo lie masikpe-e, ani atsia aholo kpadji na Yelusalema ne kpéke bua hana. <sup>52</sup> Ani atima obhulu titima kalanu bhú kuti bini na ndu doto na Samalia, ngú naleke ndu 'ngú hana

pi ani ndjindji. <sup>53</sup> Engú bini, ani adu la anu lie ne abhú Yelusalema-a, okpála na kuti bhomu-o atsia ayala nasia ani. <sup>54</sup> Omukpata Djaki ne Dja au lie mo-o, u atsia apa pi Yesu me: «Ngámá, mo okunda me ya ha líli me mughálá yie abhúlá, amba a go bhili uo?» <sup>55</sup> Engú bini, Yesu adji bhúla e ne li pápá gba uo, ani atsia ambe bhú 'ndji uo.† <sup>56</sup> Abhomu-o, u atsia agbida bhú kuti koko.

*Okpála bhende akunda nakpata Yesu*  
(*Tsia bhú Mat. 8:19-22.*)

<sup>57</sup> U adu lie li kpadji-e, kpála bini apa pi Yesu me: «Ma akpáta mu li ndu bilí mo onú lie hana.» <sup>58</sup> Yesu atsia apa pi ani me: «A ka onekpø di ne odhu ne dabilí gba o ngú nasi tété. Engú bini, dabilí ngú nague ka ma, Ndili gba kpála tété ade.» <sup>59</sup> Ani apa matá pi kpála koko me: «Kpata ma.» Engú bini, kpála ango-o apa pi ani me: «Ngámá, 'o nga ma, amba ma nú zì ngaiza 'dyi ma.»‡ <sup>60</sup> Yesu agie pi ani me: «'O okpála bhende amu-o, u zì okuo gba o-o, amba ngamu-o, mu nu naamu ne kpokpo ngali Nau gba Ebhe ko.» <sup>61</sup> Kpála koko apa matá pi ani me: «Ngámá, ma akpáta mu makpata. Engú la bini, 'o ngaiza ma, amba ma nu bhana lima pi opiga gba ma ko.» <sup>62</sup> Yesu agie pi ani me: «Li kpála bini holo namene kulu ne kengø-o, pipita ani tsia 'kpi ne sidi-e, kpála ango-o ti ne Nau gba Ebhe-e de.»

---

† 9:55 9:55 U aye bhú obhuku koko-o me: «Yi mbila ngua bua inde i ngagama 'ngú bhú yi-e de. Padhá de, anga ngama, Ndili gba kpála-a, ma go ngú nabhili okpála de, ma ago mangbo ngú nakobho uo.» Tsia bhú Luk. 19:10. ‡ 9:59 9:59 A adu me 'dyi ani nde kpi nga nani-i de. Tsia bhú Eki. 20:12.

## 10

*Yesu atima om* ukpata ndjikpa mananika ne ká bhisi

<sup>1</sup> Pipita-a, Ngámá Yesu alo om ukpata koko ndjikpa mananika ne ká bhisi.\* Aní atsia atima uo bhisi bhisi kalanu bhú ndu ogudhu ne ndu bili hana inde a ayo nako lie me, aní nu bha ngae makpe ko. <sup>2</sup> Aní atsia apa pi uo me: «Nguwa abhú 'dyi bhelé. Engú bini, okpála namene kulu ang-o bhelé ade. Yi yo ka bhulu edyi-e me aní tima okpála na kulu bhelé bhú edyi gba e ko. <sup>3</sup> Ma atima yi maka okandole bhú ká osia. Yi nunu! <sup>4</sup> Yi ahá falanga de. Yi ahá ehe nabi 'he bhúbhú de. Yi ahá maloke de. Yi adú ne lulu li kpadji-e ngú nayiyi okpála de.

<sup>5</sup> Yi li bhú 'ti bini-e, yi de pa ngaiza me: «Guo 'ngú gba Ebhe-e du bhú 'ti inde.» <sup>6</sup> Li kpála inde akunda guo 'ngú du bhú 'ti ang-o, li guo 'ngú gba yi-e dú bhú dabili bini ne aní. I du mo-o de-e, nayi na guo 'ngú gba yi-e gíe lie pí yi. <sup>7</sup> Yi du bhú 'ti ang-o. I du me u nde aha ehe nazu mazu di ne bhe nandji mandji pi yi-e, yi de zu, amba yi ndji. Padhá de, anga a ayo me kpála na kulu sia makalá na kulu gba e ko. Yi adú asi bhú 'ti ngangá de.

<sup>8</sup> I du me yi nde ali bhú gudhu bini-e, li okpála na gudhu ang-o sia yi-e, yi de zu 'he inde u ahá e pi yi ko. <sup>9</sup> Yi kobho obhulu kuo inde bhú gudhu ang-o, amba yi pa pi ndu okpála hana me: «Nau gba Ebhe-e akolo de yi masikpe.»

<sup>10</sup> Engú bini, i du la me yi nde ali bhú gudhu bini-e, u sia yi de-e, yi de ze ali kpadji, amba yi pa me: <sup>11</sup> «Ya ngapulu belegu doto na gudhu gba yi inde adhedhe li 'dhu ya, ngú nasuno pi yi me yi amene siti 'ngú. Yi mbila

\* 10:1 10:1 U aye bhú obhuku koko-o me: «Ndjikpa mananika.»

la ndjindji me, Nau gba Ebhe-e akolo de yi masikpe.»  
<sup>12</sup> Ma apa pi yi me li 'kpí li Ebhe akódho 'ngú gba okpála lie, okpála na gudhu ango-o adjé likabhu naali ané okpála na Sodomu† mane.»

**Okuti** inde ayala nabhuka Yesu

(*Tsia bhú* Mat. 11:20-24.)

<sup>13</sup> «'E-e! A ko likabhu pi yi okpála na gudhu na Koladjina! A ko likabhu pi yi okpála na gudhu na Betesaida! Padhá de, anga i du me ongamba 'ngú inde amene lie agba yi-e, i méne lie bhú ogudhu na Tile ne Sidona-a, okpála na ogudhu ango-o de adyi nani pili didili, u tsia túko 'mbi bhú 'ndji o ngú napana me u adji bua o adji. <sup>14</sup> Kaka-a, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane. <sup>15</sup> Ne yi di, okpála na Kapalanauma-a, yi abhundja naayi me u a'é'e yi abhúlá-a? A mo-o ade. U abála yi bhú djua na duduma.»

<sup>16</sup> Do aní matá pi omukpata gba e me: «Li kpála bini dje yi-e, amba aní adje bhomu-o ma. Li kpála bini yala nasia yi-e, amba aní ayala bhomu-o nasia ma. Engú bini, li kpála bini yala nasia ma-a, amba aní ayala bhomu-o nasia kpála inde atima ma ko.»

**Omukpata** ndjikpa mananika ne ká bhisi-e agie lio

<sup>17</sup> Omukpata ndjikpa mananika ne ká bhisi-e agie lio me u nde abedhe ne djali bedhe. U atsia apa me: «Ngámá, osisiti bua ngamanga belegu ya ngao nedhinga ya ngaha líli pi uo lie ne 'li mu ko!» <sup>18</sup> Yesu atsia apa pi uo me: «Ma au Satana ayie abhúlá akø kuto maka mugbálá. <sup>19</sup> Yi djedje nga, ma aha angu pi yi ngú nadele okpulu ne

† 10:12 10:12 Sodomu: A ko gudhu inde li Ebhe atsulu nani e ka siti 'ngú gba okpála ango-o. Tsia bhú Dje. 19:24-28.

oapekebhe ne 'dhu yi di ne nandjia ndu angu gba bhulu yala gba yi-e hana. Ehe bini tí da namene yi sisiti de. <sup>20</sup> Engú bini, yi akpí djali ka li osisiti bua ngamanga yi lie de. Yi kpi mangbo djali ka li Ebhe aye 'li yi lie abhúlá ko.»

*Yesu akpi djali*

*(Tsia bhú Mat. 11:25-27, 13:16-17.)*

<sup>21</sup> Bha li nedhinga ango-o makpe-e, Yesu abedhe nani ne djali bedhe ka Bu Bhobua . Aní atsia apa me: «Ma agie heni pi mu, 'Dyi ma, Ngámá na abhúlá ne Ngámá na doto. Padhá de, anga engú inde mo opana e pi obhende imbilangú de-e, mo owo pi okpála na imbilangú di ne obhende amene balua má too! A moko, 'Dyi ma, anga mo okunda bha nani moko.

<sup>22</sup> 'Dyi ma, mo oha ndu 'he hana mu ma. Kpála bini mbila de me ngama, Ndili-e, ma ne da-ie, bha bini ngamu, 'Dyi ma. Kpála bini mbila la di de me ngamu, 'Dyi ma-a, mu ne da-ie, bha bini ngama, Ndili gba mu-o, la di ne okpála bhende li ngama, Ndili-e, ma akunda napana mu pi o ko.»

<sup>23</sup> Pipita-a, aní adji bhúla e li pápá gba omukpata gba e-o, aní atsia apa pi uo kpi o kpi me: «A ko djali pi yi, ngayi okpála i ngau engú inde yi ngau e ko! <sup>24</sup> Padhá de, anga ma apa pi yi me opolofeta di ne ongbengbe ongámási bhelé akunda nani nau engú yi ngau e inde, engú bini u u de. U akunda nani nadje engú yi ngadje e inde, engú bini u dje de.»

*Kpála bini na ndu doto na Samalia inde amene bádha 'ngú*

<sup>25</sup> Abhomu-o, musuno bini na líli gba Moidje ayie bhúlá. Aní atsia ayi Yesu ngú nale aní me: «Musuno, a ayo me ma mene pi ngubula me ma sia mukobho na

duduma?» <sup>26</sup> Yesu agie pi ani me: «U aye bhú líli gba ní-e pi? Mo otatanga lie, mu djedje bhúbhú pi?» <sup>27</sup> Kpála ango-o atsia agie pi ani me: ««A ayo me kunda Ebhe, Ngámá gba mu-o, ne bua mu hana, ne mukobho gba mu-o hana, ne angu gba mu-o hana, ne mabhundja gba mu-o hana», amba «Mu kunda la di kilí mu, maka mo okunda limu lie makpe ko.»† » <sup>28</sup> Do Yesu pi ani me: «Mo ogie ndjindji. Mene moko, amba mu sia mukobho na duduma.»

<sup>29</sup> Engú bini, musuno na líli-e ango-o adu akunda nasuno me engú inde ni ayi e, a ngbingbili. Abhomu-o, ani atsia ayi Yesu me: «Kilí ma-a, a ko da?»

<sup>30</sup> Do Yesu pi ani me: «Kpála bini ayie nani bhú Yelusalema, ani adu akò ne abhú Djeliko. Li kpadji-e, ani ati bhú 'kpa obhulu 'zi inde adu agbulu 'he gba okpála ne kpéke. U abha obongo gba ani-o. U abhi ani má kpú! U abha lio-o, u agbida. U atsia a'o ka ani masikpe de nakpi.

<sup>31</sup> Dimandò bini adu apu li kpadji ango-o. Ani au kpála ango-o lie me-e, ani abuma bha ani li pála kpadji koko, ani atsia atapa. <sup>32</sup> Kpála bini na piga gba Levi‡ akolo di li bili li kpála ango-o adu lie-o. Ani au ani lie, ani abuma bha ani li pála kpadji koko, ani atsia atapa.

<sup>33</sup> Engú bini, kpála bini na ndu doto na Samalia inde adu naae bhú dhuku li kpadji bhomu-o, akolo de ani. Ani au ani lie, ani adje ndjinga ani naali. <sup>34</sup> Ani adyudyo lie de ani masikpe. Ani aha emu di ne vino,§ ani atuko li djila oeka gba ani-o, ani atsia agbite ne papala bongo. Ani aha ani, ani a'o ani pí 'ngbu punda gba e-o. Ani anu ne

† 10:27 10:27 Tsia bhú Det. 6:5; di ne bhú Lev. 19:18.

‡ 10:32 10:32 Piga gba Levi: A ko okpála inde a adu nani ateteke odimandò li kulu bhú 'ngbé 'ti Ebhe gba omaYuda-o.

§ 10:34 10:34 Vino du di nani ngú nabhili okókó bhú djila eka.

ani bhú 'ti gba ogomago. Oo, ani atsia alila ani ndjindji. <sup>35</sup> Li ekpí aseke lie, ani agbe lí falanga bhisi, ani aha pi bhulu eti-o. Ani atsia apa pi ani me: «Lila kpála inde-e ndjindji. I du me mu nde apu tia koko pi ani pí bhende-e, ma agie pi mu ngama, nedhinga ma apú matá lie sii ko.»»

<sup>36</sup> Yesu atsia ayi musuno bhomu-o me: «Mo obhundja naamu pi? Bhú ká okpála bata bhomu-o, a ko kpála bhedho adu nani kilí kpála inde ati bhú 'kpa obhulu 'zi bhomu-o?» <sup>37</sup> Musuno na líli-e agie me: «A ko bhende adje ndjinga ani-o.» Yesu atsia apa pi ani me: «Nunu, amba mu mene bhadi moko.»»

*Yesu anu* natsia Malata ne Malia

<sup>38</sup> Li Yesu ne omukpata gba e adu lie li kpadji-e, ani ali bhú kuti bini. Oo, olo bini adu 'li ani me Malata, ani atsia asia Yesu agba e. <sup>39</sup> Malata adu ne ndai e na olo bini, adu 'li ani me Malia . Malia adu naae kuto bhú li 'dhu Yesu, ani atsia adu adje engú inde li Yesu adu apa e ko. <sup>40</sup> Bua Malata adu abhúlá ka bhiti kulu-o. Ani ago de Yesu, ani atsia apa pi ani me: «Ngámá, li ndai ma a'o ka ma lie namene ndu kulu hana kpi ma kpi me-e, mu bhundja 'ngú tété bini di? Pa ngala pi ani me, ani go ha mbo 'kpa e mu ma.» <sup>41</sup> Ngámá agie pi ani me: «Malata, Malata, mu nga'o bua mu abhúlá, mu la di ngatutu limu ngubula ongú bhelé. <sup>42</sup> La-a, a ndjindji ne koli 'he bini. Malia aha naae ehe inde ane ne bádha, inde li kpála bini dhépe e ka ani de.»

## 11

*Yesu asuno nakpokpo 'ngú* ne Ebhe pi omukpata gba e-o  
(*Tsia bhú* Mat. 6:9-13.)



<sup>1</sup> A adu ekpí bini, Yesu adu akpokpo 'ngú ne Ebhe li bili bini. Aní andjia lie, suka omukpata gba aní-e atsia apa pí aní me: «Ngámá, suno nakpokpo 'ngú ne Ebhe pí ya, maka li Djaa asuno di lie pí omukpata gba e ko.» <sup>2</sup> Yesu atsia apa pí uo me: «Yi du akpokpo 'ngú ne Ebhe-e, yi de pa me:

«'Dyi ya,

a ayo me, okpála mbíla me, mu ne Ebhe na bubu;

a ayo me, mu go u Ngámá píla doto.

<sup>3</sup> Ha ezu gba ya na ekpí bini ne bini-e pí ya.

<sup>4</sup> Mbu li osisiti 'ngú gba ya ko.

A moko, ngaya makpe, ya ngambu di li osisiti 'ngú li okpála amene e li pabíli gba ya ko.

Mo o'ó de me nale ha angu ya-a de.»

<sup>5</sup> Yesu atsia apa matá pí uo me: «I du me suka yi bini nde ne kilí e, aní nu bhaka aní agba e tutu sukpe ngú napa pí aní me: «Wai, ha mbo mapa muu bata. <sup>6</sup> Kilí ma bini inde bhú dholo ago li ma oo, ehe la ka ma ngú nahaha pí aní ade.» <sup>7</sup> I du me bhende abhú 'ti-e nde agie pí aní me: «Mo ondála ma de! Ma ani bhoti-e ani. Ngaya ne ongisi gba ma-a, ya asili kuto asili. Ma ti da nayie bhúlá ngú naha mapa pí mu de.» <sup>8</sup> Ma apa pí yi na paká me, abana aní yie bhúlá ngú nahaha pí aní kabula mukunda gba o-o de-e, engú bini, aní ayie bhúlá ngú naha ndu 'he hana inde aní nde ne gumu e pí aní ka aní ngandala aní lie ko.

<sup>9</sup> Ngama-a, ma atsia apa pí yi me, yi yo 'he inde yi nde ne gumu e-o, amba Ebhe ha pí yi. Yi gili 'he inde yi nde ne gumu e-o, amba yi u. Yi bhi bhoti-o, amba Ebhe 'u pí yi. <sup>10</sup> Padhá de, anga ndu okpála hana inde ngayo 'he aní nde ne gumu e, aní ngasisia. Kpála bhende ngagili 'he inde aní nde ne gumu e, aní ngauu. Ebhe nga'u bhoti pí

kpála bhende ngabhibhi-o. <sup>11</sup> Bhú ká yi odyi ongisi-e, a ti da naha kpáú pí ndili gba e da, i dú me ndili-e nde ayo ka aní sungu-o? <sup>12</sup> I dú me aní nde ayo ka aní pala 'ngú-o, aní tsia há pí aní apekebhe-e? <sup>13</sup> Belegú ngayi okpála na sisiti-e, yi ngaha babadha 'he pí ongisi gba yi-o. A ane la mane ne bádha pí 'Dyi yi inde abhúlá-a me aní ha Bu Bhobua pí obhende ngayoyo ka aní ko!»

*Yesu agbe siti bua* inde adú ani 'bhø kpála-o

(*Tsia bhú* Mat. 12:22-30; di ne bhú Mlk. 3:22-27.)

<sup>14</sup> Yesu adú agbe siti bua inde adú ani 'bhø kpála bhú bhoko bini. Li siti bua ang-o akoto lie, kpála ang-o aholo agama 'ngú. Abhomú-o, bhiti okpála inde adú oo angamba naali. <sup>15</sup> Okpála koko bhú ká uo atsia apa me: «Ngámá gba osisiti bua inde 'li e me Beledjebula ngaha angu pí aní ngae, ngú napandja osisiti bua ne di!»

<sup>16</sup> Okoko adú agili nale aní. Abhomú-o, u atsia apa pí aní me, aní mene ngamba 'ngú ngú napana me, angu gba aní-e ngayie abhúlá. <sup>17</sup> Engú bini, Yesu ambila mabhundja gba uo-o lie, aní atsia apa pí uo me: «I dú me okpála gba ngámá bini nde ngagú gbele sùnda o, nau ang-o lú-u de. Li ndú eti hana túko. <sup>18</sup> I dú me omaha Satana nde ngagú gbele sùnda o-o, nau gba aní-e ti da nalú lele pí? Padhá de, anga yi ngapa me, ma ngapandja osisiti bua ne angu gba Beledjebula. <sup>19</sup> I dú me ma nde ngapandja osisiti bua ne angu gba Beledjebula-a, okpála gba yi-e ngapandja uo ne angu gba da? Kaka-a, okpála gba yi-e akódho 'ngú gba yi-e ngao! <sup>20</sup> La-a, i dú me ma nde ngapandja osisiti bua ne angu gba Ebhe na paká-a, apa bhomú-o me, Nau gba Ebhe-e akolo li yi akolo.

\* <sup>11:11</sup> 11:11 U aye bhú obhuku koko-o me: «Teme i dú me u nde ayo ka aní mapa.»

<sup>21</sup> Li kpála bini na angu inde li tia 'gú nde ka e ndjindji, du alila eti gba e-e, ehe bini dúla tia gba ani-e de. <sup>22</sup> Engú la bini, i du me kpála bini inde ane ani ne angu-o go, ani há egú pi ani, ani tsia há angu ani. Ani bhá ndu tia 'gú inde ani adu a'o bua e lie hana. Ani tsia gápa ndu 'he inde ani abha e ka ani-e hana.

<sup>23</sup> Kpála bhende pi ma ade-e, a ko yala ma. Kpála bhende i ha 'kpa e muma ngú napo bhúla okpála de-e, ani ngatsambala uo matsambala.»

*Siti bua ti da matá nagie lie*

*(Tsia bhú Mat. 12:43-45.)*

<sup>24</sup> «Li siti bua koto bhú kpála bini-e, ani nú ne djakadha abhú omili bilí† ngú nagili bilí nague ka e tété. I du me ani nde u de-e, ani pá li bua e me: «Ma agie lima bhú 'ti gba ma inde ma akoto nako bhú e-o.»

<sup>25</sup> Ani gie lie oo, ani bháka me u apo bhú 'ti-o, u aleke ndjindji. <sup>26</sup> Abhomu-o, ani nú, ani bhá osisiti bua koko mananika inde ane ani ne siti. U gie lio bhú dabili bini, u lí bhú 'ti-o, u tsia dúlu. Pipita-a, mukobho gba kpála ango-o, kólo la matá sisiti naali ane bhende na kalanu-o mane.»

*Djali na kukulu*

<sup>27</sup> Nedhinga ani adu apa 'ngú bhomu-o lie, olo bini atsia asula pi ani bhú ká okpála me: «A ko djali pi olo inde azu mu-o, inde di mo ondji 'ka e-o!» <sup>28</sup> Engú bini, Yesu agie me: «A ko djali mangbo pi okpála inde ngadje eli gba Ebhe di ne nalilila ko!»

*Yesu ayala namene ngamba 'ngú pi okpála*

*(Tsia bhú Mat. 12:38-42.)*

† 11:24 11:24 Mili bilí: A ko bilí inde li engu nde lie ade, li kpála ti da di nasi kuti lie de.

<sup>29</sup> Li bhiti okpála ago apo bhúla o lie de Yesu-o, aní atsia aholo apa me: «Okpála na naki inde-e sisiti. U ngayo ngamba 'ngú. Engú bini, Ebhe méne ngamba 'ngú bini pí uo de, bha bini bhende gba polofeta Djonasi. <sup>30</sup> Padhá de, anga maka li Ebhe aha nani Djonasi lie ngú napana ngamba 'ngú pí okpála na Ninive-e, Ebhe ahá bhadi ma, Ndili gba kpála-a, ngú napana ngamba 'ngú pí okpála na naki moko. <sup>31</sup> Ngámá na      inde adu atsia 'kpí li ndu doto na Saba ayie nani tsutsu ngú nago nadje oeli na imbilangu gba 'ngbé ngámá Salomo. Li Ebhe akódho 'ngú gba okpála lie, ngámá na      ang-o alú kala okpála na naki, aní tsia a'ó 'ngú pí uo. Kaka-a, kpála bini si, aní ane Salomo mane! <sup>32</sup> Okpála na Ninive adji nani bua o li nedhinga u adje ngali gba Ebhe inde li Djonasi adu akpokpo e lie-o. Li Ebhe akódho 'ngú gba okpála lie, okpála na Ninive alú kala okpála na naki, u tsia a'ó 'ngú pí uo. Kaka-a, kpála bini si, aní ane Djonasi mane!»

*Nadu li zi 'kpí*

*(Tsia bhú Mat. 5:15, 6:22-23.)*

<sup>33</sup> «I du me kpála bini nde adhedhe eke-e, aní tó asa lusa de. Engú bini, aní 'ó pí 'he amba okpála inde ngali bhú 'ti-e, u u 'kpí tété ndjindji. <sup>34</sup> Djila mu ne zi 'kpí na kute mu. Li djila mu du ndjindji-e, ndu kute mu hana dú bhú zi 'kpí. Engú bini, li djila mu du sisiti-e, ndu kute mu hana dú bhú biti. <sup>35</sup> Tsia ndjindji me zi 'kpí inde bhú mu-o, adú biti de. <sup>36</sup> I du me ndu kute mu hana nde li zi 'kpí-e, yá mu bini nde bhú biti ade-e, kute mu libhomu dú li zi 'kpí, maka li zi 'ke ngaziga mu lie má ngilili ko!»

Yesu ambamba ta osisiti 'ngú gba omuFalisai di ne bhende gba omusuno na líli gba Moidje-o

(Tsia bhú Mat. 23:1-36; di ne bhú Mlk. 12:38-40.)

<sup>37</sup> Li Yesu andjia nagama 'ngú lie, muFalisai bini atsia a'í aní agba e ngú nazú 'he. Aní alí abhú 'tí gba muFalisai-o, aní atsia aholo nazú 'he-o. <sup>38</sup> MuFalisai ango-o angamba naali, anga aní au me Yesu vulu lie kala nazú 'he-e de.†

<sup>39</sup> Abhomu-o, Ngámá Yesu apa pí aní me: «Ngayi omuFalisai-e, yi ngavulu kute pápá di ne kute saani. Engú la bini, ngayi-e, yi abedhe ne 'ngbé bua di ne siti bua bhú yi bedhe. <sup>40</sup> Imbilangu bhú yi ade! Ebhe inde abho kute-e, aní bho di bua ngae dí? <sup>41</sup> Kaka-a, yi ha mangbo pí obhulu ndibhili ehe bhende bhú opápá di ne bhú osaani gba yi ko. Yi mene mo-o, lí ndú 'he hana kólo pí yi babadha.

<sup>42</sup> La-a, a ko líkabhu pí yi, omuFalisai! Padhá de, anga yi ngaha bini bhú ká ndjikpa na oulu na sese ne ndú djedje ulu na abhú 'dyi-e hana pí Ebhe. La-a, yi mene engú na ngbingbili pí okpála de. Yi kunda la di Ebhe de. A la bhomu-o engú inde ayo me yi mene ngaiza e me, yi nde 'íli 'to yi lí naha bini bhú ká ndjikpa na oehe gba yi-e pí Ebhe de ko. <sup>43</sup> A ko líkabhu pí yi, omuFalisai! Padhá de, anga yi kunda bha nadulu pí dabili na akalanu bhú oti nadge líli gba Moidje . Yi kunda la di me okpála dú ne yiyi yi maka ongámási lí ohi-kpadji. <sup>44</sup> A ko líkabhu pí yi! Padhá de, anga yi maka olata inde u 'o 'he pí e ngú nasusuno de, lí okpála ngadhuku pí e me u nde mbila del!»

---

† 11:38 11:38 OmuFalisai adú nani navulu lio kala nazú 'he ngubula nasuno me o naao ne obabadha okpála kala Ebhe.

<sup>45</sup> Suka omusuno na líli-e apa pi ani me: «Musuno, mo opa lie mo-o, mo osobho di bhomu-o ya.» <sup>46</sup> Yesu atsia agie me: «A ko di likabhu pi yi, omusuno na líli! Padhá de, anga yi ngamene mugito me yi nga'o titili 'he li 'ngbu okpála. Engú la bini, ngayi makpe-e, yi 'o belegu likpa yi bini tété ngú nateteke uo de. <sup>47</sup> A ko likabhu pi yi! Padhá de, anga yi ngaleke olata opolofeta, inde li ogbi yi abhili nani o-o! <sup>48</sup> Yi ngapana bhomu-o me, yi aziba engú inde li ogbi yi amene nani e ko. Padhá de, anga ngauo-o, u abhili opolofeta, ngayi-e, yi la ngaleke olata uo! <sup>49</sup> Kaka-a, Ebhe ne imbilangú gba e, apa li 'ngú gba yi-e me: «Ma átíma opolofeta di ne obhulu titima pi uo. U abhíli okoko bhú ká uo, u tsia méne okoko sisiti.»

<sup>50</sup> Nayie maka li Ebhe abho nani doto lie, okpála atuko ngute opolofeta bhelé. Kaka-a, okpála na naki abí mangimbo ango-o ngao. <sup>51</sup> Kalanu-o, u abhelo Abele. Ali soso-o, u abhelo Djakalia bhú mbadhasu na 'ngbé 'ti Ebhe gba omaYuda, sunda bili natsulu enu pi Ebhe ne titina na bubu-o. Ma apa pi yi na paká me, okpála na naki abí mangimbo na ngute okpála bhomu-o hana ngao!

<sup>52</sup> A ko likabhu pi yi, omusuno na líli! Padhá de, anga yi ani bhoti na imbilangú-o. La ngayi makpe-e, yi li de. Yi atsia ani la di bhoti ango-o pi obhende akunda nali-o.»

<sup>53</sup> Li Yesu ayie lie li bili bhomu-o, omusuno na líli ne omuFalisai aholo napadha ani. U atsia aholo ayiyi ani li ongú bhelé bhelé. <sup>54</sup> Padhá de, anga u adu agili nagbo ani li 'li e.

## 12

*Yi du apa 'ngú mbámbá, yi adú ne tsulu de  
(Tsia bhú Mat. 10:26-27.)*

<sup>1</sup> Nedhinga bhomu-o, bhiti okpála apo bhúla o de Yesu. U adu bhibhiti naali, kaka-a, u adu adedele 'dhu obi o. Abhomu-o, Yesu atsia aholo napa ngaiza pi omukpata gba e me: «'E-e! Yi lila liyi ka levile gba omuFalisai-e uu! Padhá de, anga u ngali bhú ndu ongu hana ne kali gba o-o maka li levile\* ngali bhú mapa lie hana ko. <sup>2</sup> Ndu 'ngú inde awo lie mawo-o hana, akóto bhú mbasu. Ndu 'ngú inde na pepe hana, ndu okpála hana ambíla. <sup>3</sup> Kaka-a, ndu 'ngú inde yi apá e sukpe-e hana, okpála adjé ne ngbikpi. Ndu 'ngú inde yi apá e bhú tupele abhú 'ti-e hana, okpála asúsula ne di bhú mbasu.»

*Kpála* inde a ayo me yi kpe e ko

(*Tsia bhú* Mat. 10:28-31.)

<sup>4</sup> «Ma apa pi yi, ngayi ondaise ma me: yi akpé okpála bhende ngabhøø kute-e de, inde pipita-a, i ti da matá namene 'he bini de ko. <sup>5</sup> Ma asúno pi yi kpála inde a ayo me yi kpe e ko. Yi kpe Ebhe inde ka e ne angu ngu nabhili okpála. Pipita-a, ani ti da nabu uo bhú djua na duduma. A moko, ma apa pi yi me: yi kpe mangbo ani!

<sup>6</sup> U tsitsindji odjedje odhu bhuluvue ngubula senge bhisi di? La-a, Ebhe 'ili 'to e li suka uo bini de. <sup>7</sup> Ebhe mbíla belegu alo na sundjo yi-e hana. Yi adjé tsulu de, bhú djila Ebhe-e, yi ane bhiti odjedje 'dhu bhomu-o mane!»

*Okpála ayála Yesu-o, Yesu ayála di uo*

(*Tsia bhú* Mat. 10:32-33, 12:32.)

<sup>8</sup> «Ma apa pi yi me: kpála inde apá li ma bhú ká djila okpála me ni ne naama kpála-a, ngama, Ndili gba kpála-a, ma apá bhadi li ani bhú ká djila oandjelu gba Ebhe-e me, a ko naama kpála. <sup>9</sup> Engu bini, kpála inde apá li ma

\* 12:1 12:1 li bilí inde-e, levile ngasuno ehe na sisiti.

bhú ká djila okpála me ni mbila ma de-e, ngama, Ndili gba kpála, ma apá bhadi li ani bhú ká djila oandjelu gba Ebhe-e me, ma ambila ani de.

<sup>10</sup> I du me kpála bini nde apa siti 'ngú li kute ma, Ndili gba kpála-a, li Ebhe mbú li ani. I du la me kpála bini nde asobho Bu Bhobua-a , Ebhe mbú li ani de.

<sup>11</sup> Nedhinga u anú lie ne yi bhú oti nadje líli gba Moidje , di ne kala ongámási inde ngatsia 'kpí li doto me u kodho 'ngú gba yi-e, yi adjé tsulu de me yi akóbho li mangua kpadji dho-ie de, di ne me yi apá pi-ie de.

<sup>12</sup> Padhá de, anga li nedhinga bhomu-o, Bu Bhobua asúno pi yi ngae engú inde a ayo me yi pa e-o.»

**M**ukobho gba kpála ane tia

<sup>13</sup> Abhomu-o, kpála bini bhú ká okpála apa pi Yesu me: «Musuno, pa pi ndai ma me ani ha naama tia na libhondi 'dyi ya-a muuma haha.» <sup>14</sup> Yesu agie pi ani me: «Wai, a'o ma kpála nakodho 'ngú di ne nagbogbo bhusu otia gba yi-e da?» <sup>15</sup> Ani atsia apa pi ndu uo hana me: «'E-e! Yi lila liyi ka gumu tia na doto uu, anga belegu li tia du bha ka kpála bhelé-e, mukobho gba ani-e dú bhúbhú de.»

<sup>16</sup> Abhomu-o, ani atsia akpokpo gbitaku inde-e pi uo me: «Kpála bini na tia adu nani ne odyi bhelé inde aha nguwa pi ani naali. <sup>17</sup> Ani adu ayi li bua e me: «Ma améne si pi? Dabili ka ma ngú nalila nguwa gba ma-a tété hana ade.» <sup>18</sup> Pipita-a, ani me: «Ma ambila engú inde ma améne e ambila! Ma apándjala ongbokopi gba ma-o, ma ayíki ibili obhe na ngbengbengbe. Ma bú nguwa ne otia gba ma-a hana bhúbhú. <sup>19</sup> Abhomu-o, ma tsia pá li bua ma me, tia ka ma bhelé ngubula bhiti kalanga. Ma guo ngala mbo guguo. Ma zu babadha 'zu, ma ndji pandi, amba ma kpi djali.» <sup>20</sup> Engú bini, Ebhe pi ani me: «Mu ne ngingi! Sukpe na naki-e, mu ngakpi. Ndu 'he inde mo opo bhúla



e hana-a atígala pì da?» <sup>21</sup> Yesu apa matá me: «A bhadi moko pì kpála inde ngapo bhúla tia pì e makpe, me aní nde gili nadu bhulu tia li pápá gba Ebhe de ko.»

*Yi ha liyi pì Ebhe*

*(Tsia bhú Mat. 6:25-34.)*

<sup>22</sup> Pipita-a, Yesu atsia apa pì omukpata gba e me: «Kaka-a, ma apa pì yi me: yi akína liyi ngubula ezú inde yi nde ne gumu e ngú mukobho gba yi-e de. Yi akína di liyi ngubula obongo inde yi nde ne gumu e ngú kute yi-e de. <sup>23</sup> Padhá de, anga mukobho gba yi-e ane ezú. La di-e, kute yi ane bongo. <sup>24</sup> Yi tsia nga odhu, u lulu 'dyi de. U popo bhúla nguwa de. Dabili ngú naleke 'zu ka uo tété ade. Ngbokopi ka uo ade. La-a, Ebhe ngaku uo! Mukobho gba yi-e, ane bhe gba odhu-o tsutsu naali!

<sup>25</sup> A ko da bhú ká yi-e, inde ka nakina lie, i ti da nadyudyo ekpí na mukobho gba e nga bha mbo ne ekpí bini-e? <sup>26</sup> I du me yi nde ti da namene belegu de mboye ehe bhomu-o, yi la ngakina liyi ngú ongu koko ka ni? <sup>27</sup> Yi tsia nga ofelele abhiye. U memene kulu de. U dudu bongo de. Ma apa la pì yi me, belegu 'ngbé ngámá Salomo bhú ndu ká tia gba e hana-a, aní sia bongo bini ane ne bádha maka susuka de. <sup>28</sup> I du me Ebhe nde ngadyi bongo li ulu inde naki abhiye, mambi u tsia bhíke e bhú djua-a, aní ti da nadyi bongo li yi ane mane di? Ngayi okpála inde li nabhuka gba yi-e nde yeye!

<sup>29</sup> Kaka-a, yi a'ó bua yi abhúla ngú nagili ezú inde yi azú e, ne ehe bhende yi andjí e de. <sup>30</sup> Omupagano, okpála na doto inde-e, u ngagili ehe bhomu-o ndu 'kpí hana ngao. Engú bini, 'Dyi yi Ebhe mbila hana me yi ne gugumu. <sup>31</sup> Yi gili nga mangbo namene ongu inde li Nau gba Ebhe-e akunda e ko. Yi mene mo-o, li Ebhe tsia há di ndu 'he koko pì yi hana pépé.»

*Yi wo tia gba yi-e abhúlá*

*(Tsia bhú Mat. 6:19-21.)*

<sup>32</sup> «Ngayi okpála gba ma, inde bhelé ade-e, yi adjé tsulu de. Padhá de, anga 'Dyí yi Ebhe au ndjindji me yi du ongámási bhú Nau gba aní-e, maka ngaani 'Dyí yi, ni nde lie ne Ngámá ko. <sup>33</sup> Yi tsindji ohe gba yi-o, amba yi ha tiatia, yi ha pi obhulu ndibhili. Yi bho pi yi oti bongo inde i kádha de. Yi wo tia gba yi-e abhúlá, li bili i síti lie de. Obhulu 'zi ti da nakolo tété de. Okokó ti la di da nazuzu de. <sup>34</sup> Padhá de, anga bili inde li tia gba yi-e nde lie, bua yi bhadi oo ko.»

*Okpála na kulu inde i ngalila*

<sup>35</sup> «Yi du bedhe ngubula kulu maka kpála inde adyi bongo na kulu, aní atsia adhedhe eke gba e madhedhe. <sup>36</sup> Yi du bedhe maka okpála inde i ngadjeke ngámá gba o me, aní nde atapa bhú anokomia na kuva. U ngadjeke me u 'u bhoti-e pi aní má gala, li nedhinga inde aní agó nabhibhi lie ko. <sup>37</sup> A ko djali pi okpála na kulu inde li ngámá gba o akólo lie, aní bháka me u nde la de ko! Ma apa pi yi na paká me, aní dyí bongo na kulu gba e-o, aní 'í uo ngubula nazu 'he. Aní tsia há ezu-o pi uo. <sup>38</sup> A ko djali pi uo, i du me aní nde abhaka me u nde la de ko, belegu aní go tutu sukpe, belegu aní go bhú sikikpi! <sup>39</sup> Yi mbila ndjindji me, i dú me bhulu eti mbila nedhinga inde li bhulu 'zi agó lie mambila-a, aní de 'ó de me aní li abhú 'ti gba ni-e de. <sup>40</sup> Ngayi di-e, yi du bedhe. Padhá de, anga yi mbila nedhinga li ngama, Ndili gba kpála-a, ma agó lie de.»

*Kpála na kulu na ngbingbili di ne kpála na kulu na sisiti*

*(Tsia bhú Mat. 24:45-51.)*

<sup>41</sup> Abhomu-o, Piele atsia ayi aní me: «Ngámá, mo opa gbitaku inde-e bha bini pi ya kpi ya kpi? Ne me, mo opa

pi ndu okpála hana.» <sup>42</sup> Ngámá agie pi ani me: «Kpála na kulu na ngbingbili ne imbilangu-o, a ko bhedho? A ko kpála bhende li ngámá gba e a'o e ngú nalila eti gba e-o, di ne nagapa ezu pi okpála koko na kulu, i du me nedhinga ang-o o nde akolo-o. <sup>43</sup> A ko djali pi kpála na kulu ang-o, i du me ngámá gba ani-e nde agie lie agba e, ani tsia bhaka me ani nde ngamene kulu gba e ko! <sup>44</sup> Ma apa pi yi na paká me, ngámá bhomu-o 'ó ani pí 'ndji ndu 'he gba e hana. <sup>45</sup> Engú bini, i du me kpála na kulu ang-o o nde apa li bua e me: «Ha-a! Ngámá gba ma-a gó má gala de.» Ani hólo nabhi obi e na obhosibhosi di ne obhe na olisilisi-o. Ani hólo nazu 'he, nandji pandi ne nalangba ne di. <sup>46</sup> Ngámá gba ani-e gíe lie li ekpí ani djeke ani lie de, li nedhinga inde ani mbila e de. Ngámá gba ani-e 'é ani bhú kulu, ani tsia 'ó ani bhú ká okpála na sisiti.†

<sup>47</sup> I du me kpála na kulu nde ambila engú li ngámá gba e akunda e, engú bini ani tsia leke lie ngú namemene maka li ngámá ang-o akunda lie de-e, kaka-a, u bhí ani naali. <sup>48</sup> La-a, i du me kpála na kulu nde mbila 'ngú li ngámá gba e ngakunda e de-e, ani mene engú inde a ayo me u bhí ani ka e, u bhí ani naali de. Padhá de, anga kpála bhende u aha 'he pi e bhelé-e, u ayó bhadi 'he ka ani bhelé. Kpála bhende u a'o 'he sa 'kpa e bhelé-e, u ayó matá ehe ka ani pépé ane mane.»

*Yesu ago ngú nagbogbo bhusu okpála*

*(Tsia bhú Mat. 10:34-36.)*

<sup>49</sup> «Ma ago ngú nabhike djua píla doto. Ma akunda me adu atsi matsi! <sup>50</sup> A ayo me ma sia batisimo na likabhu. La-a, likabhu li bua ma naali akólo li 'kpí inde ma asía lie ko! <sup>51</sup> Yi abhundja naayi me ma ago ngú na'o guo 'ngú

† 12:46 12:46 U aye bhú obhuku koko-o me: «U kókodho bhusu ani má mbi mbi mbi!»

píla doto? Ma apa pí yi me, a mo-o ade. Ma ago mangbo ngú nagbogbo bhusu okpála. <sup>52</sup> Nayie pí mbia inde-e, piga bini na okpála bhuluvue agbó bhusu e, bata ayála bhisi, li bhisi yála bata.

<sup>53</sup> 'Dyí ndíli ayála ndíli na bhobhoko gba e-o,  
li ndíli-e yála 'dyí e.

'Hi ndíli ayála ndíli na **oel** gba e-o,  
li ndíli-e yála 'hi e.

Ogbi na **oel** ayála **oel** gba ndala e,  
li **oel** gba ndíli-e yála ogbi e. †»

*Yi mbila engú inde ngakodho 'kpí mbia inde-e ko  
(Tsia bhú Mat. 16:2-3.)*

<sup>54</sup> Yesu apa matá pí okpála me: «Yi u me ebha ngago ne kati, yi kolo pá me: «Ebha inde-e adhi madhi.» † tsia méne la bhadi lie moko. <sup>55</sup> Yi dje anvi me a nde ngayie li pápá na yoyoko, yi pá me: «Ekpí-e akpá naali.» † tsia méne la bhadi lie moko. <sup>56</sup> Ngayi obhulu kali inde-e! Yi mbila engú inde ngakodho 'kpí abhúlá ne bhende píla doto-o hana. La ka ni, yi kunda nambila engú inde ngakodho 'kpí li nedhinga inde-e lie de-e?»

*Yi dje liyi ne kpála inde yi nde ne e bhú 'ngú ko  
(Tsia bhú Mat. 5:25-26.)*

<sup>57</sup> «Ka ni, ngayi makpe, yi mbila nakodho 'ngú na ngbingbili inde ayo namene e lie de-e? <sup>58</sup> † du me yi nde bhú 'ngú ne kilí mu-o, ani du anú ne mu bhú djila okpála nakodho 'ngú-o, mu de mene ne kpéke me yi dje liyi ne ani li kpadji. Mu ngakpe bhomu-o me, ani anú ne mu pí kpála nakodho 'ngú-o de. Li kpála nakodho 'ngú-o há mu pí osudha de. Li osudha-a tsia bhíke mu bhú

† 12:53 12:53 Tsia bhú Mik. 7:6.

tikpu de. <sup>59</sup> Ma apa pi mu me, mu koto bha oo me, mu nde agie ndu bopulu gba mu-o hana ma kpokobho!»

## 13

*Ebhe nga* i okpala me u dji bua o

<sup>1</sup> Abhomu-o li nedhinga ango-o, okpala koko ago akpokpo pi Yesu me: «Pilato abhili okpala koko na Galilaya me u nde ngatsulu enu pi Ebhe.» <sup>2</sup> Ani agie pi uo me: «Yi abhundja naayi me, i du me Pilato nde abhili uo mo-o, a akunda napa me u adu sisiti ane ndu okpala koko na Galilaya hana?» <sup>3</sup> Ma apa pi yi me, a mo-o ade. Engu bini, i du me yi nde dji bua yi de-e, ndu yi hana, yi amu bhadi maka uo. <sup>4</sup> Yi bhundja okpala ndjika ne ka madjina nani li 'ndja ti na Silue abhili o-o. Yi abhundja naayi me u adu nani sisiti ane ndu okpala koko na Yelusalema hana? <sup>5</sup> Ma apa pi yi me, a mo-o ade. Engu bini, i du me yi nde dji bua yi de-e, ndu yi hana, yi amu bhadi maka uo.»

*Ndula na figi* inde i li lili de

<sup>6</sup> Pipita-a, Yesu atsia apa gbitaku inde-e pi uo me: «Kpala bini alu nani ndula na figi bhui edyi gba e na vino. Ekpí bini, ani ago nagili lili bhuibhu. La-a, ani u belegu de bini. <sup>7</sup> Abhomu-o, ani atsia apa pi kpala na kulu gba e me: «Tsitsia nga, a ko mbia inde-e kalanga bata, ma ngago agili lili bhui ndula inde. La-a, ma u belegu de bini. Dede! A ngangí bilí padhá ka ní?» <sup>8</sup> Engu bini, kpala na kulo agie pi ani me: «Ngamá, 'o nga mata ndula ango-o li kalanga inde, amba ma dji doto bhui lili ngbalina, ma tuko doto na eká bhuibhu. <sup>9</sup> Koko bhui kalanga na sidi-e, i li lili. I du la me a nde li lili de-e, mu tsia dé.»

*Yesu akobho* olo bini na kuo bhui 'kpi naguo gba omaYuda

<sup>10</sup> Li 'kpí bini naguo gba omaYuda-a , Yesu adu asuno bhú 'tí nadje lílí gba Moidje-o . <sup>11</sup> A abhaka me 00 bini na kuo nde oo. Sunda kalanga ndjikpa ne ká madjina, siti bua adu bhú aní. Siti bua ango-o atsia adu anu 'ngbu aní. Kaka-a, aní ale nani nali lie pima. <sup>12</sup> Li Yesu au 00 ango-o lie, aní a'i aní. Aní atsia apa pí aní me: «'Hi ma, kuo gba mu-o ayie.» <sup>13</sup> Aní abu 'kpa e pí aní, kolo má gala me-e, aní alí lie má ngbuu! Aní atsia aholo nadhog0 Ebhe.

<sup>14</sup> Engú bini, ngámá na eti nadje lílí-e ake 'ngú lie naali, ka lí Yesu akobho kpála lie bhú 'kpí naguo-o. Do aní pí okpála inde adu oo me: «A ne 'kpí madhia ngú namene kulu. Yi go lí okpí bhomu-o, ngubula me u kobho yi ne okuo gba yi ko. Engú bini, yi agó bhú 'kpí naguo del.» <sup>15</sup> Abhomu-o, Ngámá Yesu atsia agie pí aní me: «Yi ne obhulu kali! Lí 'kpí naguo-o, yi bhuhulu bagala di ne punda gba yi-e bhú 'tí o, ngú nanu ne uo me u ndji 'ngu di? <sup>16</sup> 00 inde-e, aní bhú piga gba Abalahama. Satana agbite aní kalanga ndjikpa ne ká madjina. A ayo de me u bhulu aní lí 'kpí naguo di?» <sup>17</sup> Li Yesu agie pí uo lie mo-o, ndu obhulu yala gba aní-e hana atsia asia numu. Engú bini, ndu okpála hana adu akpi djali ka ndu obabadha kulu hana inde aní adu amene e ko.

*Gbitaku pindji lí ndula u a'i e me mutadi*

*(Tsia bhú Mat. 13:31-32; di ne bhú Mlk. 4:30-32.)*

<sup>18</sup> Abhomu-o, Yesu atsia apa me: «Nau gba Ebhe-e , a maka ní? Ma tí da napapana lí ní? <sup>19</sup> A maka lí ndula na mutadi. Kpála bini aha, aní alu bhú 'dyi gba e-o. A ak0, a akolo 'ngbé ndula. Odhu atsia ayiki 'tí o bhú oyáyá ko.»

*Gbitaku pindji levile*

*(Tsia bhú Mat. 13:33.)*

<sup>20</sup> Do Yesu matá me: «Ma tí da napana Nau gba Ebhe-e lí ní? <sup>21</sup> A maka levile inde lí ɔlɔ bini aha e. Aní atsia akpɔdhɔlɔ ne bhiti faline akólo lí nedhinga lí faline hana afúka lie ko.»

Yi lí lí bhoti na yeye

(Tsia bhú Mat. 7:13-14, 21-23.)

<sup>22</sup> Yesu aholo 'nú bhú Yelusalema. Lí aní adu anu lie oo, aní adu apu bhú ogudhu ne bhú okuti me aní nde ngasuno Bádha Ngali pí okpála. <sup>23</sup> Kpála bini ayi aní me: «Ngámá, Ebhe akóbho bha okpála masudha?» Abhomu-o, Yesu atsia agie pí uo me: <sup>24</sup> «Yi mene ne kpéke me yi lí lí bhoti na yeye-o. Padhá de, anga ma apa pí yi me, okpála bhelé agíli me ní lí, engú la bini u alé pima.

<sup>25</sup> A maka me lí nedhinga lí bhulu 'ti-e ayie bhulá lie, aní ní bhoti-o. Pípita-a, yi dúlu akilidjo. Yi hólo nabhi bhoti-e me yi nde ngapa me: «Ngámá, 'u bhoti-e pí ya.» Aní tsia gíe pí yi me: «Ma mbíla bíli lí yi ayie lie del»

<sup>26</sup> Abhomu-o, yi tsia pá pí aní me: «Ní azu nani 'he, ní andji di pandi ne yi bhú dabilí bini. Mo otsia asuno lí okpadji gba ya-o.» <sup>27</sup> Aní tsia gíe pí yi me: «Ma mbíla bíli lí yi ayie lie de. Ngayi osisiti okpála, yi yie de ma oo kol»

<sup>28</sup> Nedhinga yi aú Abalahama, Isaka, Yakobho di ne ndu opolofeta hana lie bhú Nau gba Ebhe-e, lí Ebhe tsia bála la naae yi akilidjo! Oo, yi adú aku 'gbá di ne nazu tate yi. <sup>29</sup> Okpála ayie ne 'dje doto badha hana, u tsia gó bhú anokomia bhú Nau gba Ebhe ko. <sup>30</sup> Abhomu-o, okpála koko inde asidi mbia inde-e, u akólo akalanu. Lí obhe koko inde akalanu mbia inde-e, u tsia kólo asidi.»

Yesu lí kpadji na Yelusalema

(Tsia bhú Mat. 23:37-39.)

<sup>31</sup> Lí nedhinga ango-o, omuFalisai koko ago apa pí Yesu me: «Yie sí mayie, anga ngámá Elode ngakunda nabhɔlɔ

mu.» <sup>32</sup> Yesu atsia agie p*i* uo me: «Yi nu pa p*i* bhulu kali maka nekpo bhomu-o me: «Ma ngapandja osisiti bua bhu okpála. Ma di ngakobho okpála na kuo nak*i* di ne mambi. Ma tsia ndjía kulu gba ma-a bhu 'kp*í* na bata.» <sup>33</sup> Engú bini, a ayo me ma kpata kpadj*i* gba ma-a, nak*i*, mambi di ne ekp*í* na bata. Padhá de, anga a ayo de me, okpála bholo polofeta li bil*i* koko de, bha bini abhu Yelusalema.

<sup>34</sup> Aa! Ngayi, okpála na Yelusalema-a, yi ngabhili opolofeta! Yi la di ngabhili ne teme okpála inde li Ebhe atima o agba yi-o! A ko bhutsibhutsi madho ma akunda napo bhula yi maka li 'hi 'ngu apopo bhula ongisi gba e lie sa mbudha e-o. La-a, yi tsia kunda de! <sup>35</sup> Mb*ia* inde-e, kut*i* gba yi-e atígala padhá. Ma apa p*i* yi me, yi ú matá ma belegu de bini akólo li nedhinga inde yi apá lie me: «A ayo me Ebhe tuko bisagu p*í* kpála inde ngago ne 'li an*i* ko!†»»

## 14

*Yesu akobho kpála na kuo li 'kp*í* naguo gba omaYuda*

<sup>1</sup> A akolo ekp*í* bini, ekp*í* naguo gba omaYuda-a , Yesu anu nazu 'he agba suka ongámási gba omuFalisai-o . Okpála inde adu oo adu atsia Yesu ne kpéke djila. <sup>2</sup> Abhomu-o, kpála bini inde li kute e asisika ne engu adu kala an*i*. <sup>3</sup> Yesu ayi omusuno na líli gba Moidje ne omuFalisai-e me: «Líli gba ní aziba nakobho kpála li 'kp*í* naguo? Ne me a ziba de.» <sup>4</sup> Engú bini, u andjili bha má bulu! Abhomu-o, Yesu aha 'kpa bhulu kuo-o, an*i* akobho an*i*. An*i* atsia apa p*i* an*i* me an*i* gie lie agba e. <sup>5</sup> Pipita-a, an*i* p*i* uo me: «Belegu li 'kp*í* naguo-o, li suka ongisi

† 13:35 13:35 Tsia bhu Djlm. 22:5; di ne bhu Ets. 118:5.



gba yi na bhosibhosi-e,\* i du di-e suka bagala gba yi-e ti bhú 'dú 'ngu-o, yi kolo gbé ani má gala! A mo-o adi?»<sup>6</sup> U mbila engú bini inde u agié e tété-e de.

*Yi kə* liyi ne kuto

<sup>7</sup> Yesu au me okpála inde u a'i o-o ngadulu pí odabili na akalanu. Abhomu-o, ani atsia apa gbitaku inde-e pí ndu uo hana me: <sup>8</sup> «Li kpála bini 'i mu bhú anokomia na kuva-a, mo onú adu pí dabili na akalanu de. Padhá de, anga mu mbila de me, u a'i kpála koko inde ane mu mane e-e de. <sup>9</sup> I du mo-o, li kpála inde a'i ndu yi bhisi hana gó pa pí mu me: <'O ka dabili bhomu-o pí ani.> Abhomu-o, mu nú ne numu hana, mu tsia dú asidi. <sup>10</sup> Engú bini, li kpála bini 'i mu bhú anokomia-a, mu de nu du pí dabili na asidi, amba li kpála inde a'i mu agó lie, ani de pa pí mu me: <Ndai ma, dyudyo limu ne akalanu.> Li ndu okpála bhende yi ngazu 'he ne o-o hana, tsia ú mu me, mu ne 'ngbé kpála. <sup>11</sup> Padhá de, anga i du me kpála nde nga'o lie ne abhúlá-a, li Ebhe kó ani ne kuto. I du la me kpála nde nga'o lie ne kuto-o, li Ebhe 'é'e ani ne abhúlá.»

*A ayo na'* i da bhú anokomia gba mu-o?

<sup>12</sup> Pipita-a, Yesu apa pí kpála inde a'i ani-e me: «Li mu 'i okpála ngú nazu 'he tulukpe, i du di-e tagolo-o, mo o'í obi mu de. Mo o'í ondaise mu de. Mo o'í okpála na piga gba mu-o de. Mo o'í la di okpála na tia inde asili kuti lingo mu-o de. Padhá de, anga ngauo-o, u 'i di mu li 'kpí koko, u tsia gíe ehe inde mo omene e pí uo-o pí mu. <sup>13</sup> Engú bini, li mu 'i okpála bhú anokomia-a, 'i obhulu ndibhili. 'I okpála na eze. 'I obhende ne eze li 'dhu o-o di

\* 14:5 14:5 Ongisi na obhosibhosi: Bhú obhuku koko-o u aye me «punda.»

ne obhende i u 'kpí de ko. <sup>14</sup> Mu mene mo-o, mu dú ne djali, anga u ti da nagie 'he bini pi mu de. Ebhe agie pi mu li 'kpí li okpála na ngbingbili-e azúku lie ko.»

*Gbitaku pindji 'ngbé anokomia*  
(*Tsia bhú Mat. 22:1-10.*)

<sup>15</sup> U adje 'ngú bhomu-o lie, suka okpála inde adu azu 'he bhú dabilí bini ne Yesu-o atsia apa pi aní me: «A ko djali pi kpála inde azú anokomia bhú Nau gba Ebhe-o!» <sup>16</sup> Do Yesu pi aní me: «Kpála bini amene 'ngbé anokomia. Aní atsia a'i okpála bhelé ngánga. <sup>17</sup> A akolo lie li nedhinga nazu 'he-e, aní atsia atima kpála na kulu gba e ngú napa pi okpála inde aní a'i o-o me: «Ezu-o abhu, yi gógo.» <sup>18</sup> Kpála ne kpála aholo ayo ka aní me aní mbu li ní. Bhe na kalanu-o apa pi aní me: «Ma akala edyi, a ayo me ma nu natsitsia. Ma ayo ka mu me mbu li ma.» <sup>19</sup> Koko apa pi aní me: «Ma akala obagala ndjikpa ngubula kulu na edyi. Ma adji nale uo. Ma ayo ka mu me mbu li ma.» <sup>20</sup> Koko atsia apa matá me: «Ma aha 010 mbia inde. Kaka-a, ma ti dá nanu-u de.»

<sup>21</sup> Kpála na kulu-o agie lie agba ngámá gba e-o. Aní atsia akpokpo 'ngú bhomu-o pi aní. Abhomu-o, ngámá-a aholo ake 'ngú lie. Aní atsia apa pi kpála na kulu gba e me: «Nu má gala bhú odaposo, di ne li okpadji. 'I obhulu ndibhili. 'I okpála na eze. 'I obhende i u 'kpí de, di ne obhende ne eze li 'dhu o-o.» <sup>22</sup> Pita nedhinga masudha-a, kpála na kulu ago, aní atsia apa me: «Ngámá, ma amene líli gba mu-o amene. Engú bini, dabilí nga bha uu.» <sup>23</sup> Abhomu-o, ngámá atsia apa pi kpála na kulu gba e me: «Nu li okpadji 'dyi, língo oaga na edyi, mba okpála ne kpéke, amba eti gba ma-a bedhe bedhe. <sup>24</sup> Padhá de, anga ma apa pi yi me, okpála inde ma a'i o kalanu-o, suka uo bini zú anokomia gba ma-a de!»»

*Yi 'o ka ndu* 'he hana ngú nakpata Yesu  
(*Tsia bhú* Mat. 10:37-38.)

<sup>25</sup> Ekpí koko-o, li okpála bhelé adu adhuku lie bhú dabili bini ne Yesu-o, ani adji bhúla e li pápá gba uo-o, ani atsia apa pi uo me: <sup>26</sup> «Kpála inde akunda akpata ma-a, a ayo me ani yala 'dyi e ne 'hi e. Ani yala wala e ne ongisí gba e-o. Ani yala ondaise e na obhosi bho si, di ne obhende na olisilisi, amba ani yala belegu mukobho gba e makpe ko. I du mo-o de-e, ani tí da nadu mukpata gba ma-a de. <sup>27</sup> Kpála inde i kunda nabi kulusi gba e de-e, inde i kpata ma de-e, ani tí da nadu mukpata gba ma-a de.

<sup>28</sup> I du me suka yi nde akunda nayiki 'ngbé 'ti-e, ani dú ngaiza kuto. Ani tsia hólo nabhundja ngú nambila me tia ka ni bhelé ngú nandjia kulu ango-o. <sup>29</sup> I du mo-o de-e, ani 'o 'dhu 'ti-e, pipita ani tsia ndjia eti-e de-e, ndu okpála hana inde aú-o, u hólo namu ani. <sup>30</sup> U tsia dú apa me: «Yi tsia nga kpála inde, ani akpo nako lita nayiki eti. Engú bini, ani ndjia de!» <sup>31</sup> A bhadi moko, i du me 'ngbé ngámá bini nde akunda nagu 'gú ne 'ngbé ngámá koko, ani dú ngaiza kuto. Ani holo nabhundja ngú nambila me, ne okpála kutu ndjikpa-a, ni ti da nagu 'gú ne 'ngbé ngámá inde ka e ne okpála kutu ndjikpa bhisi-o. <sup>32</sup> I du mo-o de-e, ani tíma obhulu titima pi 'ngbé ngámá ango-o nedhinga ani nde nga bha lie tsutsu-o. Ani tsia yí ani me: «A ayo namene pi ngubula me egú adú-u de-e?» <sup>33</sup> Abhomu-o, Yesu atsia apa matá me: «Suka yi bini ti da nadu mukpata gba ma-a de, i du me ani nde 'o ka ndu 'he gba e hana de ko.»

*Ngutu* inde akolo padhá  
(*Tsia bhú* Mat. 5:13; di ne bhú Mlk. 9:50.)

<sup>34</sup> «Ngutu ne bádha 'he. Engú bini, i du me kpokpo nde andjia bhúbhú andjia, u tí da nagie matá kpokpo bhúbhú ne ni? <sup>35</sup> A belegu ndjindji ade ngú doto di ne ngú nalu 'zu. U bála bha ibili akilidjo. Kpála inde ne 'dje 'dje ngú nadje 'kpí-e, ani djedje!»

## 15

*Gbitaku gba kandole* inde angita, u atsia au matá e  
(*Tsia bhú* Mat. 18:12-14.)

<sup>1</sup> Ekpí bini, ondombi na mandjandja di ne okpála na sisiti ago ndu o hana de Yesu ngú nadje ani. <sup>2</sup> Omufalísai ne omusuno na líli gba Moidje adu adi ani. U adu apa me: «Kpála inde-e ngasia okpála na sisiti. Ani la di ngazu 'he ne uo bhú dabilí bini!»

<sup>3</sup> Abhomu-o, Yesu atsia apa gbitaku inde-e pi uo me: <sup>4</sup> «Kpála bini bhú ká yi ne okandole kámá bini. Li suka uo bini ngita-a, ani mene pi? A na paká me, ani 'ó ká obhende ndjikpa odukpabini ne ká odukpabini-e li bilí nazu 'he ka o-o. Ani tsia nú nagili bhende angita-a, akólo li nedhinga inde ani aú ani lie-e ko. <sup>5</sup> Li ani au ani lie, ani bédhe ne djali bedhe. Ani há kandole-o, ani 'ó ani pí de-ngulu e. <sup>6</sup> Ani gíe lie agba e. Pipita-a, ani 'í obi e ne okpála inde asili kuti de ani-o. Ani tsia pá pi uo me: «Yi kpi djali bhú dabilí bini ne ma, anga ma au kandole gba ma inde angita nako au!» <sup>7</sup> Yesu atsia apa matá me: «Djali adú bhadi moko abhúlá ngubula kpála bini na sisiti inde adji bua e. Djali ango-o ané bhende u nde ne e ngubula okpála na ngbingbili ndjikpa odukpabini ne ká odukpabini, inde ngabhundja me o ne gumu nadji bua o ade ko.»

*Gbitaku pindji lí falanga* inde angita, u atsia au matá e

<sup>8</sup> «Matá di-e, i **du** me **elθ** bini nde ne lí falanga\* ndjikpa, lí **susuka** bini ngita-a, aní méne pí? A na paká me, aní dhédhe eke. Aní pó **bili** abhú 'tí. Aní **gíli** má bhotobhoto, akólo lí nedhinga inde aní aú lie-e ko! <sup>9</sup> Lí aní au lie, aní 'í obi e di ne okpála inde asilí **kuti** de aní-o. Aní tsia pá pí uo me: «Yi kpi djali bhú dabilí bini ne ma, anga ma au lí falanga inde angita nako ka ma-a au!» <sup>10</sup> Yesu atsia apa matá me: «Oandjelu gba Ebhe- e akpí bhadi djali moko ngubula koli kpála na sisiti bini inde adji bua e ko.»

*Gbitaku gba ndili* inde angita, u atsia au matá e

<sup>11</sup> Yesu atsia apa matá me: «Bhoko bini adu nani ne ongisi na obhosibhosi bhisi. <sup>12</sup> Bhende na ndimindimi-e apa pí 'dyi e me: «'Dyi ma, ha naama tia na libhondi-e muma haha.» Abhomu-o, 'dyi uo atsia agapa tia gba e lí uo. <sup>13</sup> Pita 'kpí bedi, ndili na ndimindimi-e abha tia gba e, aní atapa ne di bhú **kuti** bini tsutsu. Oo, aní andjia tia gba e hana má kpøkøbhø lí ndu 'ngú na padhá padhá!

<sup>14</sup> Lí aní andjia tia gba e lie hana-a, adyindi na ngbéngbé atsia ali bhú ndu doto ango-o. Abhomu-o, aní aholo adje gumu. <sup>15</sup> Aní anu ali bhú kulu pí suka kpála na ndu doto bhomu-o. Kpála ango-o aha aní, aní atsia atima aní abhú 'dyi gba e me aní du nalila opame. <sup>16</sup> Aní adu akunda nazu ezu gba opame-o. La-a, kpála bini ha nani ehe nazu mazú pí aní de.

<sup>17</sup> Abhomu-o, aní aholo abhundja. Pipita-a, aní atsia apa lí bua e me: «Ndu okpála na kulu gba 'dyi ma-a hana, ezú ka uo bhighbiti naali. Ngama la ei-e, ma ngakpi ne gumu! <sup>18</sup> Ma agie lima agba 'dyi ma, ma tsia pá pí aní

\* <sup>15:8</sup> 15:8 Agba omaYuda-a, lí falanga bini (denaliusi) nani ne makalá pí kpála na kulu ngubula ekpí bini.

me: 'Dyi ma, ma amene siti 'ngú kala Ebhe di ne li pápá gba mu. <sup>19</sup> A ayo matá na'i ma me ndili ka mu de. Ha bha ibili ma maka suka okpála na kulu gba mu ko.)

<sup>20</sup> Aní atsia aholo agie lie agba 'dyi e. Li nedhinga inde aní adu nga bha lie de kuti-e tsutsu-o, 'dyi aní au aní. Aní au aní lie, aní adje ndjinga aní naali. Aní anu ne holo, aní atí li ngulu aní, aní atsia akama aní li kute e.

<sup>21</sup> Abhomu-o, ndili-e atsia apa pí aní me: <'Dyi ma, ma amene siti 'ngú kala Ebhe di ne li pápá gba mu. A ayo matá na'i ma me ndili ka mu de.> <sup>22</sup> U akolo lie akuti-e, do 'dyi aní pí okpála na kulu gba e me: <Yaka! Yi go ne yambu bhende ane ne bádha, yi dyi li aní. Yi to kati bhú 'kpa aní, amba yi to maløkø bhú 'dhu aní. <sup>23</sup> Pipita-a, yi nu bhøø folo bagala na tsikpa-o. Ní zu 'he, amba ní kpi djali. <sup>24</sup> Padhá de, anga ndili gba ma inde adu nako mugito me aní akpi-e, aní agie matá lie bhú mukobho. Aní adu nako me aní nde angita, ma atsia au matá aní.> Abhomu-o, u atsia aholo nakpi djali.

<sup>25</sup> Li nedhinga bhomu-o, ndili bhende na gigena adu abhiye. Nedhinga aní adu agie lie lie akuti-e, aní akolo lie de eti-e masikpe-e, aní adje tolo 'tsi ne ebi. <sup>26</sup> Aní a'i suka okpála na kulu-o. Aní atsia ayi aní li engú inde adu akodho 'kpí-o. <sup>27</sup> Kpála na kulu angu-o agie pí aní me: <Ndai mu agie lie agie. 'Dyi mu atsia abhøø folo bagala na tsikpa-o, anga aní au me, aní agie lie ne kute na angu.>

<sup>28</sup> Abhomu-o, ndili na gigena-a aholo nake 'ngú lie. Aní ayala nali abhú 'ti-o. 'Dyi aní akoto, aní atsia alopole lie pí aní me aní lili. <sup>29</sup> Engú bini, ndili-e agie pí 'dyi e me: <Djedje nga, a ko kalanga bhelé ma ngamene kulu pí mu maka bali. Ma ndjo suka líli gba mu-o 'kpí bini de. Mu ha nga la belegu ndili meeme muma bini de me, ya mene anokomia ne obi ma-a ne di. <sup>30</sup> Li ndili gba mu

inde andjia tia gba mu-o hana ne olisi na zabhe-e ago lie, mo otsia abhøø folo bagala na tsikpa-a pi ani!»

<sup>31</sup> 'Dyi ani atsia apa pi ani me: «Ndika ma, ndu 'kpi hana, ni ne mu bhú dabili bini. Ndu 'he inde gba ma-a hana, a ko naamu. <sup>32</sup> Engú bini, a ayo bha igini me ni mene anokomia amba ni kpi djali. Padhá de, anga ndai mu inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani!»»

## 16

### *Kpála na kulu na kali*

<sup>1</sup> Pipita-a, Yesu atsia apa matá pi omukpata gba e me: «Bhulu tia bini adu ne kpála na kulu gba e. Kpála angoo adu atsia 'kpi li ohe gba ani-o. Okpála koko ago apa pi ani me, kpála na kulu angoo ngapuru tia gba ani-o. <sup>2</sup> Abhomu-o, ani a'i kpála na kulu-o. Ani atsia apa pi ani me: «Ma ngadje pindji mu e mangua 'ngú dho? Suno obhuku na ndu tia gba ma-a hana mu ma, anga mu ti da matá natsia 'kpi li ohe gba ma-a de.» <sup>3</sup> Abhomu-o, kpála na kulu angoo aholo ayi bua e me: «Ma améne si pi? Padhá de, anga ngámá gba ma adji a'é ma bhú kulu. Angu ka ma ngú nade edyi ade. A la di li ma ne numu ngú nadu ne yoyo 'he. <sup>4</sup> Aa! Ma ambila engú inde ma améne e ambila, ngubula me okpála sia ma ndjindji li nedhinga u a'é ma lie bhú kulu ko!»

<sup>5</sup> Abhomu-o, ani a'i okpála bini ne bini inde adu ne bopulu gba ngámá gba ani-o. Ani ayi bhende na kalanu-o me: «Bopulu gba ngámá gba ma-a ka mu madho?» <sup>6</sup> Ani agie pi ani me: «Ngbøngøø na emu kámá bini.» Kpála na kulu-o pi ani me: «Ha 'kpa balua na bopulu gba mu-o. Du kuto má gala, amba mu dji me ndjikpa bhuluvue.»

<sup>7</sup> Pipita-a, anì ayi koko me: «A la mu-o, bopulu gba mu-o madho?» Anì agie me: «Kíli mapunga kámá bini.» Kpála na kulu-o pì anì me: «Ha 'kpa balua na bopulu gba mu-o, amba mu dji me ndjikpa madjina.» <sup>8</sup> Ngámá gba kpála na kulu na kali ang-o adhogò anì, anga anì amene ehe maka kpála inde ngau 'kpí tsutsu. Okpála na doto inde-e ne imbilangù na kali gba o-o, u ambila namene ehe sùnda o ane ongisi gba Ebhe.

<sup>9</sup> Ngama-a, ma apa pì yi me, yi gili nadu bhú makpolia ne obi yi ne tia na kali na doto inde, amba li tia neke ka yi-e, u de sia yi bhú kuti na duduma. <sup>10</sup> Kpála bhende ngbingbili bhú ohe na djedjedje-e, anì bhadi ngbingbili bhú ohe na ngbengbengbe. Kpála bhende ngbingbili bhú ohe na djedjedje-e ade, anì di ngbingbili bhú ohe na ngbengbengbe ade. <sup>11</sup> I du me yi nde mene ndjindji ne tia na kali na doto inde-e de-e, Ebhe tí da naha kukulu tia pì yi de. <sup>12</sup> I du me yi nde mene ehe ngbingbili ne tia gba kpála koko de-e, a há tia gba yi-e pì yi da?

<sup>13</sup> Kpála bini ti da namene kulu pì ongámási bhisi de. Anì yála bini, anì tsia kúnda koko. Anì méne kulu pì koko ndjindji, anì tsia ú koko bhú djila e padhá. Yi ti da namene kulu pì Ebhe bhú dabili bini ne namene pì tia de.»

*Yesu asuno pindji 'ngú ngangá*

*(Tsia bhú Mat. 11:12-13, 5:31-32; di ne bhú Mlk. 10:11-12.)*

<sup>14</sup> Omufalaisai adje ndu 'ngú bhomu-o hana. Abhomu-o, u atsia adu amu Yesu, anga u adu nani akunda tia naali. <sup>15</sup> Yesu atsia apa pì uo me: «Yi ngamene ehe bhú djila okpála mugito me yi ngbingbili. Engú bini, Ebhe mbila bua yi hana, anga ehe li okpála ngau e bhú djila o ngbéngbé-e, Ebhe ngauu bhú djila e padhá.



<sup>16</sup> Nakolo li nedhinga gba Djaa bhulu nabatisa okpála-a, u akpokpo 'li Ebhe pi okpála bhú líli gba Moidje di ne bhú obhuku gba opolofeta . Nayie li nedhinga bhomu-o, u akpokpo Bádha NgaliNau gba Ebhe-e pi okpála. Kpála ne kpála ngagili ne kpéke me ni li bhú kuti na mundayi-o . <sup>17</sup> A ko mboye 'ngú masudha me ekpi di ne doto kodho 'kpi. A ko la kpéke da 'ngú me okpála 'e mboye ku eli bini bhú ká líli gba Moidje-o.

<sup>18</sup> Li bhoko bini 'e wala e bhú kuva-a, ani ha eko koko-o, ani akunda bhomu-o eko gba kpála koko. Li bhoko bini ha eko inde li 'ko e a'e e bhú kuva-a, ani akunda di bhomu-o eko gba kpála koko.»

### *Gbitaku gba bhulu tia ne bhulu ndibhili*

<sup>19</sup> «A adu nani bhulu tia bini. Ani adu adyi babadha bongo na tia naali. Ndu 'kpi hana, ani adu nandu ndjindji. Ani atsia adu di nazu 'he ndjindji. <sup>20</sup> Bhulu ndibhili bini adu di nani oo. A adu 'li ani me Ladjalo. Eka atsotsolo nani kute ani hana. Ani adu asi kuto li bhoti gba bhulu tia-o. <sup>21</sup> Ani adu akunda nazu okulu 'zu inde adu abala sa dabili nazu 'he gba bhulu tia-o. La di-e, obulu adu ago adhapa oeka gba ani-o. <sup>22</sup> Bhulu ndibhili-e akpi. Oandjelu aha ani, u atsia anu a'o ani ade Abalahama. Bhulu tia akpi di, u atsia azi ani.

<sup>23</sup> Oo, li bili gba okpála inde amu-o, ani adu adje likabhu naali. Ani atsia 'kpi ne abhulá, ani au Abalahama tsutsu ne Ladjalo de e. <sup>24</sup> Abhomu-o, ani aholo natobhila me: <'Dyi ma Abalahama, dje nga bha mbo ndjinga ma! Tima Ladjalo me ani to ndji-likpa e bhú 'ngu, amba ani go ne di tunu pi 'mi ma, anga ma ngadje likabhu bhú djua inde-e naali.> <sup>25</sup> Abalahama agie pi ani me: <Ndika ma, bhundja me mo osia nani tia bhelé li nedhinga mo odu lie bhú mukobho pila doto-o. La-a, Ladjalo atsia asia

nani naae likabhu naali. Mbia inde-e, ani ngasia bádha 'ngú, mu la naamu ngasia likabhu. <sup>26</sup> Matá-a, a sunda ní ne tsú 'dú, ngubula me lí kpála kunda nayie gba ya ei akodho 'kpí ne agba yi oo, ani de le pima! Lí kpála kunda nayie gba yi oo akodho 'kpí ne agba ya ei-e, ani de le di pima!»

<sup>27</sup> Do bhulu tía me: 'Dyi ma, kikiliako, ma ayo nga bha-ka mu me, tima Ladjalo agba 'dyi ma, <sup>28</sup> anga ondaise ma na obhosibhosi bhuluvue oo. A ayo me, ani nu nagbele 'dje uo, amba ngauo di-e, u agó lí bili na likabhu inde-e de. <sup>29</sup> Abalahama agie me: 'U mbila lílí gba Moidje di ne obhuku gba opolofeta-a hana. A ayo me u dje uo. <sup>30</sup> Bhulu tía atsia apa me: 'Dyi ma Abalahama, a mo-o ade. Engú bini, i du me suka okpála inde amu-o nde azuku-o, ani nu pa pí uo-o, u djí bua o. <sup>31</sup> Abalahama pí ani me: 'Í du me u nde dje engú inde bhú lílí gba Moidje di ne bhú obhuku gba opolofeta de-e, belegu i du me suka okpála inde amu-o nde azuku-o, u djé di ani de.»

## 17

*Yi mbu lí siti 'ngú gba okpála koko*

*(Tsia bhú Mat. 18:6-7, 21-22; di ne bhú Mlk. 9:42.)*

<sup>1</sup> Pipíta-a, Yesu apa pí omukpata gba e me: «Engú inde ngato okpála bhú siti 'ngú-o néke de. Engú la bini, a ko likabhu pí kpála inde i ngato engú ango-o ko! <sup>2</sup> Í du me kpála bini nde ngato ongisi bhú siti 'ngú-o, a pí ani ndjindji me u gbite ngingi tangulu ani, amba u bhike ani bhú 'ngbé 'ngu. Bhobhomu-o pí ani ndjindji naali ane me suka okpála na bhubhuku-o tí ka ani bhú siti 'ngú. <sup>3</sup> 'E-e! Yi lila liyi ndjindji!

Í du me ndai mu nde amene siti 'ngú-o, mu de suno pí ani. Í du me ani nde apa me ní amene sisiti-e, mu de mbu

li ani. <sup>4</sup> I du me ani nde amene mu sisiti bhutsibhutsi mananika li 'kpí bini-e, ani go bhutsibhutsi mananika hana, ani pa pi mu me: «Ma amene mu sisiti, mbu li ma.» Mu de mbu li ani.»

*Nabhuka na kpekpeke*

<sup>5</sup> Obhulu titima apa pi Ngámá Yesu me: «Mene me nabhuka gba ya-a kolo matá kpekpeke.» <sup>6</sup> Abhomu-o, Ngámá Yesu atsia agie me: «I dú me nabhuka gba yi-e dú maka lí ndula na mutadi-e, yi de tí da napa pi ndula inde-e me: «Yie si, amba mu nu lu limu abhú 'ngbé 'ngu.» I tsia méne bhadi moko.»

*Kulu inde a ayo me kpála na kulu mene e ko*

<sup>7</sup> «Li kpála bini bhú ká yi du ne kpála na kulu gba e bini-e, i du me kpála na kulu ango-o nde ngamene kulu abhiye, ani du di-e ngalila onu-o, ani gie lie akuti-e, ani tsia pá pi kpála na kulu ago-o me: «Go má gala ngú nazu 'he?» <sup>8</sup> A mo-o ade. Ani pá mangbo pi ani me: «Lu ezu, mu yipa bongo-o ngú naha ezu-o muuma akólo li nedhinga ma andjia nazu 'he lie di ne nandji 'he bhende nandji mandji lie ko. Pipita-a, mu tsia zu 'he amba mu ndji di 'he bhe gba mu-o.» <sup>9</sup> Ani tí da nagie heni pi kpála na kulu-o, anga ani amene líli gba ani-e uu? Belegu de bini. <sup>10</sup> A bhadi pi yi moko. Nedhinga yi amene ndu 'ngú inde u apa e pi yi e lie hana-a, yi de pa me: «Ya bha naaya ne okpála na kulu. Ya amene bha kulu inde a ayo igini me ya mene e ko.»»

*Yesu akobho okpála na kába ndjikpa*

<sup>11</sup> Li Yesu adu anu lie abhú Yelusalema-a, ani apu sunda ndu doto na Samalia ne bhe na Galilaya. <sup>12</sup> Ani ali lie bhú kuti bini me-e, obhosi na kába ndjikpa ago akò lío ne ani. U alulu mbo de ani tsutsu. <sup>13</sup> U atsia aholo atobhila me: «Ngámá Yesu, dje nga bha-a mbo ndjinga

yal» <sup>14</sup> Yesu au uo lie, aní atsia apa pí uo me: «Yi nu suno liyi pí odimandø gba Ebhe-o .» Nedhinga u adu anu lie, u atsia akobho. <sup>15</sup> Li suka uo bini au lie me ni akobho-o, aní atsia agie lie sidi me aní nde ngadhøgø Ebhe ne angu hana. <sup>16</sup> Aní atí bhú li 'dhu Yesu. Aní atú bhúla e ne kuto. Aní atsia agie heni pí Yesu. Bhoko angoo adu nani kpála na Samalia. <sup>17</sup> Abhomu-o, Yesu atsia ayi me: «Ndu okpála ndjikpa hana akobho adi? Obhende odukupabini-e la su? <sup>18</sup> Kpála bini bhundja nago nagie heni pí Ebhe de, bha bini kpála inde naae ne maYuda ade inde-e?» <sup>19</sup> Pipita-a, Yesu atsia apa pí aní me: «Yie bhúla, nuu. Mo okobho, anga mo obhuka ma.»

*Nedhinga li Ebhe agó nau lie píla doto  
(Tsia bhú Mat. 24:23-28, 37-41.)*

<sup>20</sup> Omufalisai ayi Yesu me: «Nau gba Ebhe-e agó nadho?» Aní atsia agie pí uo me: «Nau gba Ebhe-e gó ngua bhende de me okpála nde ngauu mau-o de. <sup>21</sup> U pá de me: «Yi tsitsia, a sii!» ne me «A aoo!» padhá de, anga yi mbila me Nau gba Ebhe-e bhú ka yi.»

<sup>22</sup> Pipita-a, aní atsia apa pí omukpata-a me: «Nedhinga koko akólo makolo. Yi akúnda me yi u nga bha mbo ma, Ndili gba kpála, 'kpí bini. Engú bini, yi ú la ma de. <sup>23</sup> U apá pí yi me: «Aní aoo!» di ne me: «Aní sii!» engú bini, yi agú holo oo de. <sup>24</sup> Ekpí li ngama, Ndili gba kpála, ma agó lie, a adú maka mugbálá, li zi e ngayie li 'dje kokpí, li pápá bini akólo li pápá koko. <sup>25</sup> Engú bini, a ayo me ma dje ngaiza likabhu naali, amba okpála na naki yala di ma.

<sup>26</sup> Maka engú inde akodho 'kpí nani bhú 'kpí Nua-a, akódho bhadi 'kpí moko li 'kpí inde li ngama, Ndili gba kpála, ma agó lie ko. <sup>27</sup> Padhá de, anga bhú 'kpí Nua, okpála adu azu 'he. U adu andji pandi. Obhosi ne olisi adu aha lio akolo li 'kpí li Nua ali bhú zabu lie ko. Ebha

adhi, engu asi píla doto libhomu, a atsia abhili ndu uo hana. <sup>28</sup> A adú maka bhú 'kpí gba Loto. Okpála adu azu 'he. U adu andji pandi. U adu akala 'he di ne natsindji 'he. U adu alu 'zu. U adu ayiki 'ti. <sup>29</sup> Engú bini, ekpí li Loto akoto bhú Sodomu lie, djua di ne itimeli ayie abhúla, abala pí uo maka ebha, atsia abhili ndu uo hana. <sup>30</sup> A akódho bhadi 'kpí moko li 'kpí li ngama, Ndili gba kpála-a, ma súno angu gba ma-a lie pí okpála ko.

<sup>31</sup> Li 'kpí angoo, kpála bhende abháka e apí 'ngbu 'ti-e, a ayo de me aní li abhú 'ti ngú nabha ohe gba e de. A bhadi moko, kpála bhende abháka e abhú 'dyi-e, a ayo de me aní gie lie akuti-e de. <sup>32</sup> Yi bhundja engú inde amene nani wala Loto-o.\* <sup>33</sup> Kpála bhende agíli nalila mukobho gba e, aní kpí. Kpála bhende la abhíke mukobho gba e, aní tsia kóbho. <sup>34</sup> Ma apa pí yi me, sukpe angoo, okpála bhisi adú pí mako bini, u ahá bini, u tsia 'ó ká koko. <sup>35</sup> Olisi bhisi adú atu mapunga bhú dabili bini, u ahá bini, u tsia 'ó ká koko. [ <sup>36</sup> Obhosi bhisi adú amene kulu bhú edyi bini, u ahá bini, u tsia 'ó ká koko.»] <sup>37</sup> Omukpata ayi aní me: «Ngámá, engú angoo akódho 'kpí ne su?» Aní atsia agie pí uo me: «Bili li kuo kpála adú lie, oagbagba apókobhò bhadi bhúla o oo ko.»

## 18

*Gbitaku gba siti kpála nakodho 'ngú* ne ekò bini na eòe

<sup>1</sup> Pípita-a, Yesu apa gbitaku bini pí omukpata gba e ngú nasuno pí uo me, a ayo me u du nayo Ebhe ndu nedhinga hana, u andála de. <sup>2</sup> Aní pí uo me: «Kpála nakodho 'ngú bini adu nani bhú gudhu bini. Aní du akpe Ebhe de. Aní

\* <sup>17:32</sup> 17:32 Wala Loto akolo nani teme na ngutu anga aní agumu nani líli gba Ebhe. Tsia bhú Dje. 19:26.

atsia adu di au okpála bhú djila e padhá. <sup>3</sup> Bhú gudhu ang-o, oko na oolo bini adu di oo. Ani adu ago apa pi ani me: «Leke engú sunda ya ne kpála inde ya nde ne e bhú 'ngú ko.» <sup>4</sup> Ekpí bhelé, kpála nakodho 'ngú ang-o adu ayayala. Pipita-a, ani atsia apa li bua e me: «Ma ngakpe Ebhe ade. Ma la di ngau okpála bhú djila ma padhá. <sup>5</sup> Engú bini, oko inde ngandala ma naali. A ayo me ma leke engú gba ani-o, anga i du mo-o de-e, ani du bha ago naba 'ndji ma.»»

<sup>6</sup> Ngámá Yesu atsia apa matá me: «Yi dje engú inde li siti bhulu nakodho 'ngú bhomu-o apa e ndjindji! <sup>7</sup> Ebhe méne bádha 'ngú pi okpála inde ani alo o-o di? I du me u nde ngaku 'gba pi ani sukpe ne ngbikpi-e? Ani djéke ngengele ngú nateteke uo? <sup>8</sup> Ma apa pi yi me, ani aléke 'ngú gba uo-o má gala! La-a, li nedhinga li ngama, Ndili gba kpála, ma agó lie, ma abháka me okpála nde abhuka Ebhe píla doto uu?»»

*Gbitaku gba mu*Falisai , ne ndombi na mandjandja

<sup>9</sup> Okpála koko adu au lio me o naao ngbingbili. U atsia adu au ndu okpála koko hana bhú djila o padhá. Abhomu-o, Yesu atsia apa gbitaku inde-e li 'ngú gba uo-o me: <sup>10</sup> «Ekpí bini, okpála bhisi anu bhú 'ngbé 'ti Ebhe gba omaYuda ngú nayo Ebhe. Bhe bini adu muFalisai , bhe koko adu ndombi na mandjandja. <sup>11</sup> MuFalisai-e ayie bhúlá, ani atsia ayo Ebhe a li bua e me: «Oo, Ebhe! Ma ngagie heni pi mu, anga ma maka okpála koko ade. U ngazi 'he. U ngamene sisiti 'ngú. U ngakunda olisi, i du di-e obhosi gba okpála koko. Ma di ngagie heni pi mu, anga ma maka ndombi na mandjandja inde-e ade. <sup>12</sup> Ma tsetse ezu 'kpí bhisi sunda poso bini ngú nayo mu. Ma haha bini bhú ká ndjikpa pí ndu 'he ma ngasia e hana.»

<sup>13</sup> Ndombi na mandjandja alu naae mbo tsutsu, ani akpe belegu natsia 'kpi ne abhula. Engu bini, ani atu bhula e ne kuto, ani abu 'kpa e pi 'ka e, ani atsia apa me: «Oo, Ebhe! Dje nga bha-a mbo ndjinga ma, ma naama ne siti kpala.» <sup>14</sup> Do Yesu mata me: «Ma apa pi yi me, ndombi na mandjandja ango-o agie nani lie agba e me, Ebhe nde adje nayo gba ani-e adje. Engu bini, Ebhe dje bhende gba mufalisi-e de. Padha de, anga kpala bhende nga'o lie ne bhula-a, li Ebhe ko ani ne kuto. La-a, kpala bhende nga'o lie ne kuto-o, li Ebhe 'e' ani ne bhula.»

*Yesu asia ongisi* na ndjendje

<sup>15</sup> Okpala adu ago di pi ani ne ongisi na ndjendje ngubula me ani 'o 'kpa e pi 'ndji uo. Li omukpata au lie mo-o, u aholo nayoko uo. <sup>16</sup> Engu bini, Yesu a'i uo, ani atsia apa me: «Yi 'o ongisi na djedjedje me u go bhaka ma! Yi ani kpadji pi uo de, anga Nau gba Ebhe-e , a pi okpala inde maka uo ko. <sup>17</sup> Ma apa pi yi na paká me, kpala inde i sia Nau gba Ebhe-e maka mboye ndili de-e, ani ti ne Nau gba Ebhe-e de.»

*Bhulu tia* ne uo ne Yesu

(*Tsia bhú* Mat. 19:16-30; di ne bhú Mlk. 10:17-31.)

<sup>18</sup> Abhomu-o, ngama bini gba omaYuda ayi Yesu me: «Musuno, ngamu badha kpala, a ayo me ma amene pi ngubula nasia mukobho na duduma?» <sup>19</sup> Yesu atsia agie pi ani me: «Mu nga'i ma me badha kpala ka ni? Kpala bini babadha ade. Ebhe bha babadha ngae kpi e kpi. <sup>20</sup> Mu mbila olili-e ndjindji: «Mo okunda elo, i du di-e bhoko gba kpala koko de. Mo obhelo kpala de. Mo ozi 'he de. Mo opa eu li kilí mu de. Manga 'dyi mu ne 'hi mu mamanga.†» <sup>21</sup> Ngama ango-o atsia apa me: «Nayie

† 18:20 18:20 *Tsia bhú* Eki. 20:12-16; di ne bhú Det. 5:16-20.

bhú ndili li ma-a, ma amene ndu 'ngú bhomu-o hana.»  
<sup>22</sup> Pita li Yesu adje engú bhomu-o lie, ani atsia apa pi ani me: «Mo oneke matá koli ehe bini. Nunu, tsindji ndu 'he gba mu-o hana, amba mu gapa tiatia pi obhulu ndibhili. Mo osía tia abhúlá. Pipita-a, mu go kpata ma.»<sup>23</sup> Ani adje lie mo-o, ani asia likabhu naali, anga tia adu nani ka ani bhelé naali.

<sup>24</sup> Li Yesu au lie me ani asia likabhu mo-o, ani atsia apa me: «A bha ndju kpekpeke pi obhulu tia ngú nali bhú Nau gba Ebhe-o!»<sup>25</sup> A kpekpeke pi eya ngubula nali li gudho musana. A la matá kpekpeke ane pi bhulu tia ngubula nali bhú Nau gba Ebhe ko.»

<sup>26</sup> Abhomu-o, okpála inde adje engú inde ani apa e atsia ayi me: «I du mo-o, a ti da nakobho da?»<sup>27</sup> Yesu agie me: «Engú bhende i ti ne okpála de-e, a ati bha ne Ebhe.»

<sup>28</sup> Abhomu-o, Piele atsia apa me: «Tsitsia nga, ya a'o ká ndu 'he gba ya-a hana ngú nakpata mu.»<sup>29</sup> Do Yesu pi uo me: «Ma apa pi yi na paká me, i du me kpála bini nde a'o ká eti gba e, ani 'o ká wala e, ani 'o ká ondaise e, ani 'o ká okpála inde azu e, ani 'o ká ongisí gba e ngubula Nau gba Ebhe-e,<sup>30</sup> ani sía 'he bhelé naali kuto ei. Pipita-a, bhú nedhinga inde ngago-o, ani tsia sía di mukobho na duduma.»

*Yesu akpo 'ngú* bhutsibhutsi na bata pindji nakpi di ne nazuku ka e

(*Tsia bhú* Mat. 20:17-19; di ne bhú Mlk. 10:32-34.)

<sup>31</sup> Pipita-a, Yesu aha okpála na titima ndjikpa ne ká bhisi-e, ani anu ne uo li ngongo, ani atsia apa pi uo me: «Yi djedje, ní adji mbia inde-e abhú Yelusalema. Oo, ndu 'ngú hana inde li opolofeta aye e pindji ma, Ndili gba kpála-a, adji amene lie.<sup>32</sup> Padhá de, anga u apú ma pi omupagano. Li okpála ango-o mú ma, u sóbho ma, u tsia



kú di ngusu li kute ma. <sup>33</sup> U abhí ma ne fimbo. Pipita-a, u tsia bhólø ma. La-a, bhú 'kpí na bata-a, ma tsia zúku.»  
<sup>34</sup> Engú bini, omukpata mbila nani ta 'ngú ang-o de, anga a awo nani lie pí uo mawo. U tsia du ambila ta 'ngú li Yesu adu apa e de.

*Yesu akobho kpála bini* inde i u 'kpí de

(*Tsia bhú* Mat. 20:29-34; di ne bhú Mlk. 10:46-52.)

<sup>35</sup> Li Yesu akolo lie masikpe de Djeliko-o, kpála bini inde i u 'kpí de-e adu kuto dengo 'hi-kpadji. Aní adu ayo 'he. <sup>36</sup> Aní adje tolo okpála akodho 'kpí lie, aní atsia ayi me: «A ko ní?» <sup>37</sup> Okpála atsia agie pí aní me: «Yesu, kpála na kuti na Nadjaleta ngakodho 'kpí bhomu-o ngae.» <sup>38</sup> Abhomu-o, aní atsia asula me: «Yesu, Ndili gba Davidi, dje nga bha-a mbo ndjinga ma!» <sup>39</sup> Okpála inde adu akalanu-o aholo ambembe bhú 'ndji aní me: «Gbite 'bhø mu.» Engú bini, aní aholo asusula matá kpekpeke me: «Ndili gba Davidi, dje nga bha-a mbo ndjinga ma!»  
<sup>40</sup> Yesu alu, aní atsia aha líli me u go ne aní pí ní. Aní akolo lie de aní-e, Yesu atsia ayi aní me: <sup>41</sup> «Mo okunda me ma mene pí mu ní?» Aní agie me: «Ngámá, bhulu djila ma, amba ma u matá 'kpí.» <sup>42</sup> Yesu apa pí aní me: «U matá 'kpí uu! Mo okobho anga mo obhuka ma.» <sup>43</sup> Kolo má gala me-e, aní aholo matá nau 'kpí. Aní atsia adu akpata Yesu me aní nde ngadhøgø Ebhe. Ndu okpála hana inde au engú ang-o, aholo di nadhøgø Ebhe.

## 19

*Yesu ali bhú 'ti* gba Djakayo

<sup>1</sup> Pita li Yesu ali lie bhú Djeliko, aní atsia adu agulu gudhu-o. <sup>2</sup> A abhaka me kpála bini nde oo, a adu 'li aní me Djakayo. A adu nani ngámá gba ondombi na mandjandja. Tia adu ka aní bhelé. <sup>3</sup> Aní adu agili nau me

Yesu ngae dho. Engú bini, li okpála adu la lie bhelé-e, ani ale nau ani pima anga ani adu nani ndundu. <sup>4</sup> Abhomu-o, ani ayiki lie ne holo ne akalanu. Ani atsia a'au bhú ndula bini dengo 'hi-kpadji ngubula me ni u Yesu nedhinga inde ani apú lie oo ko.

<sup>5</sup> Li Yesu akolo lie li bili bhomu-o, ani a'e djila e ne abhúlá, ani atsia ani. Ani atsia apa pi ani me: «Djakayo, kə kuto má gala, anga a ayo me ma si naki bhú 'ti gba mu-o.» <sup>6</sup> Abhomu-o, Djakayo akə kuto bhú holo. Ani atsia asia Yesu ne djali hana. <sup>7</sup> Ndu okpála hana au lie mo-o, u aholo adi mutokono. U atsia adu apa me: «Lele pi li kpála inde-e atapa lie nasi agba kpála na sisiti-e!» <sup>8</sup> Djakayo ayie bhúlá, do ani pi Yesu me: «Ngámá, djedje nga. Ma agbó bhusu tia gba ma-a bhisí. Ma ahá bhe bini-e pi obhulu ndihili. I du me ma nde aha tia gba kpála bini ne kali-e, ma agie pi ani bhutsibhutsi badha.» <sup>9</sup> Abhomu-o, Yesu atsia apa pi ani me: «Naki-e, Ebhe akobho mu. Ngamu di-e, mu bhú piga gba Abalahama-o. <sup>10</sup> Padhá de, anga ngama, Ndili gba kpála-a, ma ago nagili di ne nakobho okpála inde angita ko.»

*Gbitaku gba okpála na kulu ndjikpa*

*(Tsia bhú Mat. 25:14-30.)*

<sup>11</sup> Yesu akolo de Yelusalema masikpe. Okpála inde adu adje ani-e adu abhundja naao me, Nau gba Ebhe-e asúno lie pi okpála mbia inde. <sup>12</sup> Kaka-a, ani atsia apa gbitaku bini pi uo me: «Kpála bini na piga gba ngámá bini anu nani bhú doto bini tsutsu ngubula me u to palata na ngámá tangulu ni, amba pipita-a, ni gie lini. <sup>13</sup> Kala me ani nu-o, ani a'i okpála na kulu gba e ndjikpa-o. Ani agapa lí falanga\* bini bini li ndu uo hana. Ani atsia apa pi

\* 19:13 19:13 Agba omaYuda-a, lí falanga bini (olo) nani ne makalá pi kpála na kulu ngubula epe bata.

uo me: <Yi mene kulu ne falanga inde, akólo li nedhinga inde ma agie lima lie ko.> <sup>14</sup> Okpála na doto gba ani-e adu ayala ani. U atima okpála nganda ani ngú napa me: <Ya kunda de me kpála bhomu-o u ngámá pí 'ndji ya-a de.>

<sup>15</sup> La-a, u ato palata na ngámá tangulu ani. Ani atsia agie lie bhú doto gba e-o. Abhomu-o, ani a'i okpála na kulu inde ani agapa nako falanga lio ngubula nambila bhende u asia e pépé-o. <sup>16</sup> Abhomu-o bhe na kalanu-o ago. Ani atsia apa me: <Ngámá, ma asia lí falanga ndjikpa pí bhende nako mo oha e muuma ko.> <sup>17</sup> Abhomu-o, ngámá-a apa pí ani me: <A ndjindji. Mu ne bádha kpála na kulu, anga mo omene ndjindji bhú mboye ehe bedi. Ma a'ó ibili mu ngámá pí 'ndji ogudhu ndjikpa.> <sup>18</sup> Bhe na bhisi-e ago, ani atsia apa me: <Ngámá, ma asia lí falanga bhuluvue pí bhende nako mo oha e muuma ko.> <sup>19</sup> Abhomu-o, ngámá-a apa di pí ani me: <Ngamu di-e, ma a'ó mu ngámá pí 'ndji ogudhu bhuluvue.>

<sup>20</sup> Pipita-a, koko ago, do ani de-e: <Ngámá, lí falanga gba mu-o ii. Ma awo nako bhú bongo .> <sup>21</sup> Mu 'o li ma tsulu, anga mu ne kpála inde ngamene 'ngú na kpekpeke. Mu ngaha ehe bhende mu 'o e ngamu de. Mu ngaha 'zu inde mu lu e ngamu de.> <sup>22</sup> Ngámá-a apa pí ani me: <Mu ne siti kpála na kulu. 'Li mu makpe agbíte mu ngae. Mo ombila nako hana me, ma ne kpála inde ngamene 'ngú na kpekpeke. Ma ngaha ehe inde ma a'o e ngama de. Ma ngaha ezu inde ma alu e ngama de.> <sup>23</sup> Ka ni mu 'o nako tia gba ma-a lie bhú baki de-e? Maka ma ago-o, ma de asia koko pépé.>

<sup>24</sup> Pipita-a, ani apa pí okpála inde adu oo me: <Yi dhepe tia inde ka ani bhomu, amba yi ha pí bhende ne di ndjikpa ko.> <sup>25</sup> U atsia apa pí ani me: <Ngámá, a ka ani ndjikpa!> <sup>26</sup> Ani agie me: <Ma apa pí yi me, kpála bhende

li ehe nde ka e, u ahá ehe pi ani bhelé. Engú bini kpála bhende li ehe nde ka e ade-e, u adhépe belegu mboye ehe inde ka ani ko. <sup>27</sup> La-a, pi obhulu yala gba ma inde i kunda nako de me ma au ngámá pí 'ndji o-o, yi go ne uo ei, amba yi bhili uo kala ma sii.»»

*Yesu ali bhú Yelusalema*

*(Tsia bhú Mat. 21:1-11; ne bhú Mlk. 11:1-11; di ne bhú Dja. 12:12-19.)*

<sup>28</sup> Pita li Yesu akpo 'ngú bhomu-o lie, ani atsia akodho 'kpí ne akalanu ngú nanu bhú Yelusalema. <sup>29</sup> Ani akolo lie sunda kuti na Betefadje ne Betania-a,† lingo 'ta na ondula na Olive, ani atsia atima omukpata bhisi. <sup>30</sup> Ani pi uo me: «Yi nu bhú kuti inde kala yi aoo. Yi akólo lie oo, yi abháka me u nde agbite ndili punda oo. Kpála bini dhaku nga pi ani de. Yi bhulu ani amba yi go ne ani ei. <sup>31</sup> I du me kpála bini nde ayi yi me: «Yi ngabhulu ani ngú ni?» Yi de pa pi ani me: «Ngámá ne gumu ani.» <sup>32</sup> Omukpata bhisi anu, u atsia abhaka ndu 'ngú hana maka li Yesu apa pi uo lie ko. <sup>33</sup> U adu abhulu enu-o lie, obhubhulu-o ayi uo me: «Yi ngabhulu enu bhomu-o ngú ni?» <sup>34</sup> U agie me: «Ngámá ne gumu ani.»

<sup>35</sup> Pipita-a, u ago ne ndili 'nu-o pi Yesu. U apa okoti gba o pí 'ngbu enu-o. U atsia ateteke Yesu ngú na'u pí 'ngbu ani.‡ <sup>36</sup> Ani adu anu lie, okpála adu apa okoti gba o li kpadji. <sup>37</sup> Ani akolo de Yelusalema masikpe li ngba 'ta na ondula na Olive. Ndu omukpata hana abedhe ne djali bedhe. U atsia aholo nadhogø Ebhe kpekpeke ngú ndu ongamba 'ngú hana inde u au e ko. <sup>38</sup> U adu apa me:

† 19:29 19:29 Nayie bhú Yelusalema akólo bhú Betefadje ne Betania, a ko kilometele bata. ‡ 19:35 19:35 Na'u ka Yesu pí 'ngbu punda-a, asuno nani bhomu-o guo 'ngú di ne nakø lie ka ani ne kuto. Tsia bhú Djkl. 9:9.

«A ayo me Ebhe tuko bisagu pí  
       'ngbé ngámá inde aní atima e ko!  
 Guo 'ngú abhúlá,

      amba sangu du di pí Ebhe Apí 'Kpí!†»

<sup>39</sup> Omufalisai koko inde adu bhú ká okpála bhomu-o, apa pí Yesu me: «Musuno, yoko omukpata gba mu-o mayoko.» <sup>40</sup> Yesu atsia agie me: «Ma apa pí yi me, i du me u nde agbite 'bhø o-o, li oteme holo natu 'ue!»

*Yesu aku 'gbá ngú* okpála na Yelusalema

<sup>41</sup> Li Yesu akolo lie masakpe de Yelusalema-a, aní au gudhu-o lie, aní atsia aholo aku 'gbá ngú okpála ango-o.

<sup>42</sup> Aní adu apa me: «Aa! Ngayi okpála na Yelusalema-a, i dú me yi mbíla li 'kpí na naki inde-e, guo 'ngú inde u ago pí yi ne e uu-o! La-a, a ko likabhu pí yi anga mbia inde-e, awo lie pí yi mawo. <sup>43</sup> Padhá de, anga oekpí koko akólo pí yi makolo, li 'kpí ango-o, obhulu yala gba yi-e, asá aga denge yi ngbalina. U búka yi, u tsia há 'gú pí yi ne ndu pápá hana. <sup>44</sup> U agúgumu gudhu-o. U tsia bhíli ndu okpála inde bhúbhú-o hana. Agba yi-e, teme bini tígala pí kilí e de, anga yi mbíla nani ekpí inde li Ebhe ago natsia yi lie de!»

*Yesu ali bhú 'ngbé 'ti* Ebhe gba omaYuda

(*Tsia bhú* Mat. 21:12-17; ne bhú Mlk. 11:15-19; di ne bhú Dja. 2:13-22.)

<sup>45</sup> Pipíta-a, Yesu ali bhú 'ngbé 'ti Ebhe gba omaYuda-o. Aní atsia aholo natsambala okpála inde adu atsindji 'he oo-o. § <sup>46</sup> Aní apa pí uo me: «U aye bhú Bhuku gba Ebhe-e

† 19:38 19:38 Tsia bhú Ets. 118:26. § 19:45 19:45 U adu nani atsindji onu di ne odhu bhú 'ngbé 'ti Ebhe gba omaYuda ngubula me okpála, inde adu ne gugumu ngú nahaha pí Ebhe-e, kala.

me, Ebhe apa me: «Eti gba ma-a, a adú eti nayo ma.» Engú bini, ngayi-e, yi adji, atsia akolo bili gba obhulú 'zi!†»

<sup>47</sup> Yesu adu asuno ndu 'kpí hana bhú 'ngbé 'ti Ebhe gba omaYuda. Ongbengbe odimandø , omusuno na líli gba Moidje di ne obhelesi okpála adu agili kpadji ngú nabhøø ani. <sup>48</sup> Engú bini, u tsia sia kpadji ngú namemene de, anga ndu okpála hana adu adje ani ne gugumu naali.

## 20

*A ngaha angu pi* Yesu da?

(*Tsia bhú* Mat. 21:23-27; di ne bhú Mlk. 11:27-33.)

<sup>1</sup> A akolo ekpí bini, Yesu adu asuno pi okpála bhú 'ngbé 'ti Ebhe gba omaYuda. Aní atsia adu di nakpokpo Bádha Ngali pi uo. Ongbengbe odimandø gba Ebhe , omusuno na líli gba Moidje di ne obhelesi okpála ago. <sup>2</sup> U atsia ayi ani me: «Pa nga pi ya, aha kpadji pi mu ngú namene ongú inde-e da? A aha la di angu ango-o pi mu ngánga da?» <sup>3</sup> Abhomu-o, Yesu atsia agie pi uo me: «Ngama di-e, ma ayí yi lí 'ngú bini. Yi pa nga mu ma, <sup>4</sup> a ha kpadji pi Djaa ngú nabatisa okpála da? Ne me a ko Ebhe, ne me a ko okpála?»

<sup>5</sup> U aholo namene kpekebho sunda o. U atsia adu apa me: «† du me ní nde agie me: «A aha kpadji pi ani ne Ebhe», ani yí ní me: «† du mo-o, ka ni yi bhuka la nani engú inde ani adu apa e lie de-e?» <sup>6</sup> † du di me ní nde apa me: «A ha kpadji pi ani ne okpála-a», lí ndu okpála hana bhili ní ne teme, anga u ambila ndjindji me Djaa nani ne polofeta .» <sup>7</sup> Abhomu-o, u atsia agie me: «Ya mbila kpála inde aha kpadji pi ani-e de.» <sup>8</sup> Do Yesu pi uo me: «† du

† 19:46 19:46 Tsia bhú Iša. 56:7; di ne bhú Djlm. 7:11.

mo-o, ngama di-e, ma pá pí yi de me aha kpadji muma da ngú namene ehe inde.»

*Gbitaku* pindji okpála na kulu inde abhøø ndili gba ngámá gba o-o

(*Tsia bhú* Mat. 21:33-46; di ne bhú Mlk. 12:1-12.)

<sup>9</sup> Pipita-a, Yesu aholo nakpokpo gbitaku inde-e pí okpála me: «Kpála bini alu nani ngu vino.\* U adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Ani atsia atapa dhuku ngubula 'kpí bhelé.

<sup>10</sup> A akolo li nedhinga nako lílí o. Abhomu-o, ani atima kpála na kulu bini agba okpála ango-o me u ha nguwa bhe gba ni-e pí ni haha. Engú bini, okpála ango-o abhi kpála na kulu bhomu-o má kpú! U atsia agie ani ne mbulu 'kpa e padhá. <sup>11</sup> Bhulu 'dyi-e atima matá kpála na kulu koko bini. U abhi di ani, u asosobho ani, u atsia agie ani ne mbulu 'kpa e padhá. <sup>12</sup> Ani atima matá kpála na bata. Bhobhomu-o, u atsotsolo kute ani ne eka. U atsia agbe ani bhú 'dyi-o.

<sup>13</sup> Abhomu-o, bhulu 'dyi atsia apa me: «Ma améne si pí? Ma atíma nga ibili ndili gba ma na mukunda-o. Nedhinga koko-o, u tí da namanga ani.» <sup>14</sup> Engú bini, li okpála ango-o au ndili-e lie me-e, u atsia apa sunda o me: «Yi tsia nga la ndju kpála inde atígala galikpe ne edyi-o. Ní bhøø ani, amba edyi-e kolo ibili naaní.» <sup>15</sup> Abhomu-o, u agbe ani bhú 'dyi-o, u abhøø ani.» Yesu atsia ayi me: «Mbia inde-e, bhulu 'dyi-e améne ngú uo pí? <sup>16</sup> Ani agó, ani bhíli okpála na kulu ango-o. Ani tsia há edyi-e pí

\* 20:9 20:9 Bhú bhuku gba polofeta Isaya-a, vino ngasuno piga gba omatsalaele. Tsia bhú isa. 5:1-7.

okpála na kulu koko.» Li okpála adje engú bhomu-o lie, u atsia apa me: «A ayo de me, bhobhomu-o mene lie de!»

<sup>17</sup> Yesu atsia uo, aní atsia apa me: «Engú inde u aye e bhú Bhuku gba Ebhe-e me:

«Teme inde li okpála nayiki eti-e abhike e,

akolo teme inde abi eti-e libhomu.†»

A akunda napa pi? <sup>18</sup> I du me kpála nde ati pí teme angoo, aní gúgumu. I du la di me teme angoo nde ati pí kpála-a, i tú nu aní.»

*Engú* pindji nakala mandjandja

(*Tsia bhú* Mat. 22:15-22; di ne bhú Mlk. 12:13-17.)

<sup>19</sup> Bha li nedhinga bhomu-o, omusuno na líli gba Moidje di ne ongbengbe odimandø gba Ebhe-e, agili nani naholo Yesu, anga u ambila me aní apa gbitaku bhomu-o li 'ngú gba o-o. Engú bini, u adu adje tsulu ka okpála. <sup>20</sup> Abhomu-o, u aholo akenge Yesu. U atsia atima obhulu kali inde adu amene ehe mugito me uo ngbingbili. Okpála angoo adu agili naholo aní li 'li e ngubula me o pu aní pi Pilatø, ngamá na ndu doto angoo. <sup>21</sup> U ayi aní me: «Musuno, ya ambila me mu ngagama 'ngú ndjindji, mu la di ngasuno 'ngú ngbingbili. Mu tsia engbé gba kpála de. Mu ngasuno kpadji gba Ebhe-e pi okpála ngbingbili. <sup>22</sup> Pa nga pi ya, a ayo me ya kala mandjandja gba Kaisala, 'ngbé ngamá na doto na Loma-a, ne me ya kala de?»

<sup>23</sup> Li Yesu ambila ekú gba uo-o lie, aní atsia apa pi uo me: <sup>24</sup> «Yi suno nga lí falanga muma bini. A pépé ne kulu da, la di ne 'li da?» U agie me: «A ko kulu Kaisala, 'ngbé ngamá na doto na Loma, di ne 'li aní.» <sup>25</sup> Abhomu-o, Yesu atsia apa pi uo me: «I du mo-o, yi ha ehe bhende gba Kaisala, 'ngbé ngamá na doto na Loma-a pi e, amba yi ha

† 20:17 20:17 *Tsia bhú* Ets. 118:22.



la di bhende gba Ebhe-e pi Ebhe.» <sup>26</sup> U u siti 'ngú bhú engú inde aní adu apa e kala okpála-a de. Engú bini, u angamba naali ka eli inde aní agie e ko. Kaka-a, u andjili bha má bulu!

*Nazuku ka okpála inde amu*

*(Tsia bhú Mat. 22:23-33; di ne bhú Mlk. 12:18-27.)*

<sup>27</sup> Abhomu-o, oSadukai koko ago de Yesu. OSadukai ziba nani naao de me okpála inde amu-o, azúku mazuku-o de. U ayi aní me: <sup>28</sup> «Musuno, Moidje aye nani lílí pi ní me: <Lí kpála kpi 'o ká wala e me aní nde zu de-e, a ayo me ndai aní de ha 00 ango-o, amba aní zu ongisi pi ndai e inde akpi ko.> <sup>29</sup> La-a, adu nani obhosi mananika bhú piga bini. Bhende na kalanu-o aha 00, aní akpi padhá me aní nde zu de. <sup>30</sup> Bhende na bhisi-e aha 00 ango-o. Aní atsia akpi. <sup>31</sup> Pipita-a, bhende na bata-o. A adu bhadi moko pi ndu uo mananika hana, u amu me u nde zu de. <sup>32</sup> Alí soso-o, 00 ango-o atsia akpi di. <sup>33</sup> Ya ngayi mu me: Lí 'kpí lí okpála inde amu-o azúku lie, 00 ango-o adú naa da? Padhá de, anga ndu uo mananika hana aha nani aní!»

<sup>34</sup> Abhomu-o, Yesu atsia agie pi uo me: «Okpála na naki inde-e ngaha lío. <sup>35</sup> Engú bini, okpála bhende amu-o, lí Ebhe au me u tí da nazuku ngú nasia mukobho bhú nedhinga inde ngago-o, u há lío de. <sup>36</sup> U tí da matá namu-u de, anga u akolo ibili maka oandjelu . A ko ongisi gba Ebhe, anga u azuku. <sup>37</sup> Moidje asuno pi ní mbámbá me okpála inde amu-o azúku mazuku. Aní aye bhú bhuku gba e lí bili inde aní akpo 'ngú lie pindji tsa 'po inde adu atsi-e me, Ebhe apa me: <Ma ne Ebhe inde lí Abalahama ngadhog0 e, Ebhe inde lí tsaka ngadhog0 e,

Ebhe inde li Yakobho ngadhogö e ko.† 38 Ebhe ne Ebhe gba okpála bhende amu-o ade. Engú bini, a ko Ebhe gba okpála bhende bhú mukobho, maka li Abalahama, tsaka ne Yakobho nde pi ani lie bhú mukobho ko.»

39 Abhomu-o, omusuno na líli koko atsia agie pi ani me: «Musuno, mo opa ndjindji.» 40 Kaka-a, u yi matá ani li 'ngú bini de.

*Masiya ne Ngámá gba Davidi*

*(Tsia bhú Mat. 22:41-46; di ne bhú Mlk. 12:35-37.)*

41 Abhomu-o, Yesu apa matá pi uo me: «Lele pi li okpála ti da napa lie me Masiya ne ndili na piga gba Davidi-e? 42 Padhá de, anga ngaani Davidi makpe-e, ani apa bhú bhuku na oetsi gba omaYuda me: «Ebhe Ngámá apa pi Ngámá gba ma-a me:

Du kuto li pá 'kpa ma na kokpa,

43 akólo li nedhinga inde ma a'ó obhulu yala gba mu-o lie

dabili na sa-tidhu mu ko.» †

44 † du me Davidi nde nga'i Masiya me Ngámá gba ni-e, lele pi li Masiya ti da nadu lie ndili na piga gba Davidi-e?»

*Yi améne maka omusuno na líli de*

*(Tsia bhú Mat. 23:1-36; di ne bhú Mlk. 12:38-40.)*

45 Ani apa pi omukpata kala ndu okpála hana inde adu adje ani-e me: 46 «E-e! Yi lila liyi ka omusuno na líli gba Moidje-e uu! U kunda bha nadhuku ne ondjandja yambu. U kunda bha me okpála du ne yiyi o maka ongámási li bili li okpála apopokobho bhúla o lie ko. U kunda bha nadulu pí odabili na akalanu bhú oeti naje líli , di ne

† 20:37 20:37 Abalahama, tsaka ne Yakobho ngadhogö Ebhe anga pi Ebhe-e, belegu u amu lie li kute o, uo bhú mukobho li bua o. Tsia bhú Eki. 3:6. † 20:43 20:42-43 Tsia bhú Ets. 110:1.

odabili na akalanu bhú da anokomia. <sup>47</sup> U ngandjia angu oökösi na olisilisi ne nabha ohe gba uo. U ngayo Ebhe ngengele ngú nasuno mugito me a ko obabadha okpála. Kaka-a, u asía likabhu naali!»

## 21

*Makiso gba* òkò bini na èèlè  
(*Tsia bhú* Mlk. 12:41-44.)

<sup>1</sup> Ekpí bini, Yesu adu bhú 'ngbé 'ti Ebhe gba omaYuda. Aní atsia 'kpí, aní au me obhulu tia ngabhike tia gba o-o bhú sanduku na makiso na 'Ngbe 'ti Ebhe-e ngú nahaha pí Ebhe. <sup>2</sup> Aní atsia au di òkò bini na èèlè bhulu ndibhili me aní nde ngabhike senge bhisi. <sup>3</sup> Abhomu-o, aní atsia apa me: «Ma apa pí yi na paká me, èlè na ndibhili lí 'ko e akpi inde-e, aha makiso ane ndu okpála koko hana. <sup>4</sup> Padhá de, anga ndu okoko hana, u aha tia bhende u nde ne gumu e ade ko. Engú bini, ngaani-e, abana aní nde lie bhú ndibhili-e, aní aha ndu bhende aní adu akobho lie hana.»

*Yesu apa me:* «U agúgumu 'ngbé 'ti Ebhe gba omaYuda-o»

(*Tsia bhú* Mat. 24:1-2; di ne bhú Mlk. 13:1-3.)

<sup>5</sup> Pipita-a, okpála koko aholo akpokpo 'ngú pindji 'ngbé 'ti Ebhe gba omaYuda-o. U adu apa me: «A bha ndju babadha naali ne obabadha teme ango-o, di ne ohe na mase naali inde u aha e pí Ebhe-o.» Engú bini, Yesu atsia apa me: <sup>6</sup> «Ndu 'he inde yi ngau e inde-e, ekpí koko akólo makolo, teme bini tígala pí kilí e de. U agúgumu eti-e hana kuto.»

*Likabhu inde akólo kala sokpí-o*

(*Tsia bhú* Mat. 24:3-14; di ne bhú Mlk. 13:3-13.)

<sup>7</sup> Abhomu-o, u atsia ayi anì me: «Musuno, engú inde mu ngakpokpo 'ngú pìndji e bhomu-o, akólo nadho? Ehe inde asúno nedhinga nago ka engú ango-o, a adú ní?» <sup>8</sup> Yesu agie me: «Yi lila liyi uu! Kpála bini apíte yi de. Padhá de, anga okpála bhelé agó ne 'lì ma, u tsia pá me: «Ma ne Masiya !» U tsia pá di me: «Nedhinga nago ka Masiya akolo!» Engú bini, yi akpáta uo de. <sup>9</sup> I du me yi nde adje okpála ngakpo 'ngú na oegú di ne ongú na okpekpeke 'ndji-e, yi adjé tsulu de. Padhá de, anga a ayo ngaiza me oengú ango-o kolo kalanu. La-a, sokpí-e dú nga kolo má gala mo-o de.» <sup>10</sup> Pipita-a, anì matá pì uo me: «Okpála na kuti bini ahá 'gú pì okpála na kuti koko. Lì ngámá na kuti bini há 'gú pì ngámá na kuti koko. <sup>11</sup> Doto adyiki ne adjigidjo na ngbéngbé. Adyindi di ne osisiti kuo natagba matagba alí bhú obili ngangá. Yi aú ongamba 'ngú di ne ongú na tsulu tsulu abhúlá.

<sup>12</sup> Engú bini, kala me ndu 'ngú bhomu-o hana kolo-o, u ahólo yi. U améne yi sisiti. U anú ne yi me u kodho 'ngú gba yi-e bhú 'ti nadje líli gba Moidje . U tsia bhíke yi bhú tikpu. U asungula yi pì ongbengbe ongámási di ne obhende ngatsia 'kpí lí kuti-e kabula 'lì ma. <sup>13</sup> Bhobhomu-o ahá kpadji pì yi ngubula me, yi kpokpo 'ngú gba ma-a pì uo. <sup>14</sup> Yi 'o lí bua yi me, yi gili engú inde yi apá e lí nedhinga nakodho 'ngú gba yi-e kalanu de. <sup>15</sup> Padhá de, anga ma ahá eli di ne imbilangu pì yi ngama makpe, ngubula nagbite 'bhø ndu obhulu yala gba yi-e hana. <sup>16</sup> Odyi yi ne ohi yi, ondaise yi ne okpála na piga gba yi di ne obi yi apú belegu yi ngao. U abhíli okpála koko bhú ka yi. <sup>17</sup> Ndu okpála hana ayála yi kabula 'lì ma. <sup>18</sup> Engú bini, 'kpa sundjo yi ngíta belegu de bini. <sup>19</sup> I du me yi nde alu kpekpeke akólo lí soso-o, yi sía mukobho na duduma.»

*Engú* inde akólo li Yelusalema

(*Tsia bhú* Mat. 24:15-21; di ne bhú Mlk. 13:14-19.)

<sup>20</sup> «Nedhinga yi aú lie me osudha asa Yelusalema ngbalina-a, yi de mbila me, nakpi kaka-a akolo masakpe. <sup>21</sup> Abhomu-o, okpála bhende a abháka o bhú ndu doto na Yudaya-a, a ayo me u kpe ne apí 'ta. Obhende adú bhú Yelusalema-a, a ayo me u ze bhúbhú maze. Obhende adú asangba gudhu-o, a ayo matá de me u li abhú gudhu-o de. <sup>22</sup> Padhá de, anga adú ekpí nakodho 'ngú gba Ebhe ngubula me ndu 'ngú hana inde u aye e bhú Bhuku gba Ebhe-e , amene lie. <sup>23</sup> Li 'kpí ang-o, adú likabhu na ngbéngbé pi olisi na ebhi di ne obhende li ongisi adú andji 'ka o-o. Padhá de, anga okpála na doto adjé likabhu naali, li mangimbo gba Ebhe-e súno lie pi uo. <sup>24</sup> U abhili okoko ne ombotia. U tsia mbá okoko bhú bali ne ndu bili hana. Omupagano adédele Yelusalema ne 'dhu o akólo bha bini li nedhinga gba uo andjía lie ko.»

*Nakolo ka sokpí*

(*Tsia bhú* Mat. 24:29-31; di ne bhú Mlk. 13:24-27.)

<sup>25</sup> «U aú oengú na ngangamba bhúla ela, bhúla epe di ne bhúla oikupala. Píla doto-o, bua okpála hana adú ati má ngbi ngbi ngbi ne tsulu ka tolo, di ne ka li 'ngbé 'ngu adú adimba lie ko! <sup>26</sup> Okpála amú ne tsulu ka nabhundja engú inde akólo píla doto libhomu-o, anga ndu 'he na abhúlá hana adyiki má djigi djigi! <sup>27</sup> Pipita-a, u tsia ú ma ngama, Ndili gba kpála, me ma nde ngago bhú ndindi ne angu di ne asasaua gba ma-a hana.† <sup>28</sup> Nedhinga li ongú ang-o ahólo amene lie lie, yi de lu kpekpeke, amba yi 'e 'ndji yi ne abhúlá, anga ekpí li Ebhe akóbho yi lie akolo masakpe.»

† 21:27 21:27 *Tsia bhú* Dan. 7:13.

*Gbitaku pindji* ndula na figi

(*Tsia bhú* Mat. 24:32-35; di ne bhú Mlk. 13:28-31.)

<sup>29</sup> Pipita-a, Yesu atsia apa gbitaku inde-e pi uo me: «Yi tsia nga ndula na figi di ne ondula koko hana. <sup>30</sup> Yi u me 'kpá 'kpá aholo nakə-o, yi mbila me gboko 'kpí akolo masikpe. <sup>31</sup> A bhadi moko, nedhinga yi aú ongú bhomu-o lie ngakolo-o, yi de mbila me Naú gba Ebhe-e akolo masikpe. <sup>32</sup> Ma apa pi yi na paká me, ndu 'ngú bhomu-o hana akólo me okpála na naki inde-e nde mu nga ndu o hana de. <sup>33</sup> Ekpí ne doto akódho 'kpí makodho. Engú bini, 'li ma kódho 'kpí belegu de bini.»

*Yi lila liyi* malila

<sup>34</sup> «'E-e! Yi lila liyi uu! Yi adú abhundja bha engú na anokomia, ne engú nalangba ne pandi di ne ongangá 'ngú na doto inde-e de. I du mo-o, li ekpi li ngama, Ndili gba kpála, ma agó lie, i kólo li yi bhú gbilikiti, <sup>35</sup> maka ekú ahoholo onu lie ko. Padhá de, anga ahólo okpála píla doto libhomu. <sup>36</sup> Yi alá-a de. Yi du nayo Ebhe ndu nedhinga hana, ngubula me yi sia angu ngú nakpe ndu 'ngú inde akólo hana, amba yi koto ngú nalu kala ma, Ndili gba kpála-o.»

<sup>37</sup> Ne ngbikpi-e, Yesu adu asuno bhú 'ngbé 'ti Ebhe gba omaYuda-o. Tagolo, ani atsia adu anu asi api 'ta na ondula na Olive. <sup>38</sup> Ndu okpála hana adu ago bhú sikikpi bhú 'ngbé 'ti Ebhe ngú nadjé ani.

## 22

*Ongámási* gba omaYuda agili nabhəə Yesu

(*Tsia bhú* Mat. 26:1-5; ne bhú Mlk. 14:1-2; di ne bhú Dja. 11:45-53.)

<sup>1</sup> Ekprí na anokomiá na Pasíka , ekprí ayo di lie me u zu mapa inde li levile nde bhú e ade-e, akolo masíkpe. <sup>2</sup> Ongbengbe odimandø gba Ebhe di ne omusuno na líli gba Moidje adu agili kpadji ngú nabhøø Yesu. Engú la bini, u adu adje tsulu ka okpála.

<sup>3</sup> Pipita-a, Satana ali li bua Yuda inde u a'í e me tsíkaliote, suka obhulu titima ndjikpa ne ká bhisi gba Yesu-o. <sup>4</sup> Abhomu-o, aní anu nadje lie ne ongbengbe odimandø gba Ebhe di ne ongámási gba okpála nalila 'ngbé 'ti Ebhe gba omaYuda. Aní anu nakpokpo ne uo maka aní apú Yesu lie pí uo ko. <sup>5</sup> U akpi djali naali, u atsia adje lio sunda o me o há pí aní falanga. <sup>6</sup> Yuda azíba. Aní atsia aholo agili nedhinga na ndjindji ngú napu Yesu pí uo me, okpála nde de uo ade.

*Yesu atima okpála me, u nu po bhúla ezu na anokomiá (Tsia bhú Mat. 26:14-16; ne bhú Mlk. 14:12-21; di ne bhú Dja. 13:21-30.)*

<sup>7</sup> Ekprí na anokomiá nazu mapa inde li levile nde bhú e ade-e akolo. A adu di ekprí inde ayo lie me u bhøø folo kandøø ngubula anokomiá na Pasíka-o. <sup>8</sup> Yesu atima Piele ne Djaa . Aní pí uo me: «Yi nu leke ndu 'ngú hana pí ní ngú anokomiá-o.» <sup>9</sup> U atsia ayi aní me: «Mo okunda me ya nu leke su?» <sup>10</sup> Aní agie pí uo me: «Yi djedje, yi alí lie bhú Yelusalema-a, yi atú liyi ne bhoko bini me aní nde abi lusa 'ngu pí 'ndji e. Yi kpata aní bhú eti inde aní alí bhú e-o. <sup>11</sup> Yi yi bhulu eti ango-o me: «Musuno ngayi mu me, tina 'ti inde ma azú anokomiá ne omukpata gba ma-a bhú e ngae dho?» <sup>12</sup> Aní asúno 'ngbé tina 'ti bhe na abhúlá-a pí yi bini. Ndu 'he hana bhúbhú. Yi leke ehe na anokomiá bhúbhú.» <sup>13</sup> U agbida, u abhaka ndu 'ngú hana maka li Yesu apa lie ko. Abhomu-o, u atsia aleke ezu na anokomiá-o.

*Yesu aha mapa ne vino pi obhulu titima*

(*Tsia bhú* Mat. 26:26-30; ne bhú Mlk. 14:22-26; di ne bhú 1 Kol. 11:23-25.)

<sup>14</sup> Li nedhinga ango-o akolo lie, Yesu ne obhulu titima gba e atsia adulu kuto ngú nazu 'he-o. <sup>15</sup> Aní apa pi uo me: «Ma adu nako ne gumu naali me ní zu anokomia inde-e ne yi bhú dabilí bini kala me ma dje likabhu ko! <sup>16</sup> Padhá de, anga ma apa pi yi me, ma zú matá-a de, akólo li nedhinga inde li tata-a asúno lie lie bhú Nau gba Ebhe ko.» <sup>17</sup> Abhomu-o, aní aha kópo na vino-o, aní agie heni pi Ebhe. Aní atsia apa me: «Yi haha, amba yi ndji ndu yi hana. <sup>18</sup> Ma apa pi yi me, ma ndjí matá-a de akólo li nedhinga inde li Nau gba Ebhe-e agó lie ko.» <sup>19</sup> Pipita-a, aní aha mapa-o, aní agie heni pi Ebhe. Aní agumu bhusu bhusu, aní aha pi uo. Aní atsia apa me: «A inde-e kute ma [inde aha lie pi yi-o. Yi du amemene moko, ngubula nabhundja ma.» <sup>20</sup> Pita u andjia nazu 'he bhomu-o lie, aní aha di kópo na vino-o pi uo, aní atsia apa me: «Vino inde-e, a ko gandja na mbia li Ebhe akodho e ne yi ne ngute ma inde atuko pi yi-o.]

<sup>21</sup> Engú bini yi tsitsia, kpála inde apú ma-a, aní ngazu 'he ne ma bhú dabilí bini sí! <sup>22</sup> Padhá de, anga a ayo me ngama, Ndili gba kpála-a, ma kpi maka li Ebhe apa lie ko. Engú la bini, a ko likabhu naali pi kpála inde apú ma ko!» <sup>23</sup> Abhomu-o, u atsia aholo ayi lio sunda o me, a ko kpála bhedho bhú ka o inde i tí da namene 'ngú bhomu-o.

*Ane ne engbé da?*

<sup>24</sup> Pipita-a, omukpata aholo amene kpekebhe sunda o ngú nambila me ane ne engbé bhú ká o da. <sup>25</sup> Yesu atsia apa pi uo me: «Ongbengbe ongámási gba omupagano-o ngaha líli pi okpála gba o-o. Obhende ngatsia 'kpí li doto-o kanda me u 'i o me «Obabadha okpála.» <sup>26</sup> Pi yi-e,



yi améne mo-o de. Engú bini, a ayo me kpála inde ane ne engbé bhú ká yi-e dú maka mboye ndili, amba kpála inde ngatsia 'kpí lí okpála koko-o, dú naae maka kpála na kulu gba uo-o. <sup>27</sup> Padhá de, anga ane ne engbé da, ne me a ko kpála inde ngazú 'he? Ne me a ko kpála inde ngamene kulu kulu-o. A ko kpála inde ngazú 'he-e dí? La-a, ma bhú ká yi maka kpála na kulu gba okpála koko.

<sup>28</sup> Ngayi obhulú titima gba ma-a, ní adú ne yi ndú 'kpí hana bhú nedhinga inde ma adú adje líkabhu gba ma-a lie ko. <sup>29</sup> Kaka-a, ma ahá Nau pí yi maka lí 'Dyí ma aha di múma lie ko. <sup>30</sup> Abhomú-o, yi azú 'he, yi tsia ndjí di vino ne ma bhú dabilí bini, i dú me ma nde alí bhú Nau gba ma-o. Yi adú di pí odabilí na ngámá ngú nakodho 'ngú gba opiga ndjika ne ká bhisi gba omatsalaele ko.»

*Yesu apa pí* Piele me: «Mo oyála ma»

(*Tsia bhú* Mat. 26:31-35; ne bhú Mlk. 14:27-31; di ne bhú Dja. 13:36-38.)

<sup>31</sup> Pípita-a, Ngámá Yesu atsia apa me: «Simo, Simo, djedje nga! Ebhe aha kpadji pí Satana me aní pe yi maka u apepe mapunga lie ko. <sup>32</sup> Engú bini, ngama-a, ma ayo Ebhe ngú mú, amba mo o'ó ká nabhuka gba mú-o de. Mo odjí matá bua mú lie, mú de ha di angu pí ondaise mú uu.» <sup>33</sup> Piele apa pí aní me: «Ngámá, ma bedhe me, abana i dú nanú bhú tikpu di ne nakpi-e, ní nú ne mú bhú dabilí bini.» <sup>34</sup> Yesu agie pí aní me: «Piele, ma apa pí mú me, sukpe na naki inde-e, kala me engu ku 'gbá-a, mo opá bhutsibhutsi bata me ní mbila ma de.»

*Yesu apa pí* omukpata gba e me, u leke lío ngubula egú

<sup>35</sup> Pípita-a, aní atsia ayi uo me: «Nedhinga nako ma atima yi lie mandí tia-a, mandí gonia ne malokò-o, ehe bini aneke nako ka yi uu?» U agie me: «Ehe bini neke ka ya de.» <sup>36</sup> Do aní pí uo me: «Mbía inde-e, kpála bhende lí

tia ne gonia nde ka e-e, a ayo me aní haha. Kpála bhende lí mbotia nde ka e ade-e, a ayo me aní tsindji koti gba e-o, amba aní kala mbotia ne di. <sup>37</sup> Padhá de, anga ma apa pí yi me, engú inde u aye e bhú Bhuku gba Ebhe-e me, <U ato aní bhú ká okpála na sisiti-e>, a ayo me amene lie lí kúte ma. A moko, engú inde atsia ma-a, a adjí amene lie.†» <sup>38</sup> Omukpata atsia apa me: «Ngámá, a ka ya sí ne ombotia bhisi.» Aní atsia agie pí uo me: «A ale.»

*Yesu anu* nayo Ebhe pí eta na ondula na Olive  
(*Tsia bhú* Mat. 26:36-46; di ne bhú Mlk. 14:32-42.)

<sup>39</sup> Pipita-a, Yesu akoto. Aní anu apí eta na ondula na Olive\* maka aní adu amemene lie ko. Omukpata gba aní atsia akpata di aní. <sup>40</sup> U akolo lie oo, aní atsia apa pí uo me: «Yi yo Ebhe, amba yi alí bhú nale de.» <sup>41</sup> Aní ayie de uo, aní adyudyo mbo lie tsutsu masudha. Aní akikita lipuku e kuto, aní atsia ayo Ebhe me: <sup>42</sup> «Dyi ma, i du me mu nde akunda-a, mu de 'e likabhu inde-e de ma tsutsu. La-a, mo oméne maka ma akunda lie de, mene mangbo maka mo okunda lie ko.» [ <sup>43</sup> Abhomu-o, andjelu bini ayie abhúlá, aní akoto lí aní, aní atsia aha angu pí aní. <sup>44</sup> Aní abedhe lie ne likabhu-o, aní atsia aholo matá nayo Ebhe kpekpeke naali. Ngufo na kúte aní akolo maka ngute, a atsia adu ayi kuto má ta ta ta!]

<sup>45</sup> Pita lí aní a'o nayo Ebhe lie, aní ayie bhúlá, aní agie lie ade omukpata. Aní abhaka me u nde atuko ne ela ka likabhu. <sup>46</sup> Aní atsia apa pí uo me: «Yi atuko ne ela ka ní? Yi yie bhúlá, amba yi yo Ebhe, ngubula me yi alí bhú nale de.»

---

† 22:37 22:37 *Tsia bhú* Isa. 52:12. \* 22:39 22:39 Eta na ondula na Olive-e asangba udhu na Yelusalema.

*U aholo Yesu*

(*Tsia bhú* Mat. 26:47-56; ne bhú Mlk. 14:43-50; di ne bhú Dja. 18:3-11.)

<sup>47</sup> Li nedhinga li Yesu adu apa 'ngú bhomu-o lie, Yuda suka obhulu titima ndjikpa ne ká bhisi-e ago ne bhiti okpála. Aní adyudyo lie de Yesu masikpe ngubula me ni nvu pabhθ aní. <sup>48</sup> Abhomu-o, Yesu atsia apa pi aní me: «Mu nganvu pabhθ ma, Ndili gba kpála, ngubula napu ma-a?»

<sup>49</sup> Li omukpata gba Yesu-o au engú inde adji akódho 'kpí-e lie, u atsia ayi Yesu me: «Ngámá, a la ya gu ne uo ne mbotia?» <sup>50</sup> Suka uo asu kpála na kulu gba bhele kpála gba odimandθ gba Ebhe-o . Aní atsia akodho kpadje aní li pápá na kokpa-a má tse! <sup>51</sup> Engú bini, Yesu atsia apa me: «Yi 'o'o, a apise moko.» Aní aha kpadje kpála ango-o, aní a'o 'kpa e tété, aní atsia akobho aní.

<sup>52</sup> Pipita-a, Yesu atsia apa pi ongbengbe odimandθ ne ongámási gba omulila na 'ngbé 'ti Ebhe gba omaYuda, di ne obhelesi okpála inde ago ngú naholo aní-e me: «Ka ni yi ago ngú ma lie ne ombotia, di ne ondula mugito me yi ago ngú naholo bhulu 'zi-e? <sup>53</sup> Ní adu nako ne yi ndu 'kpí hana bhú dabili bini bhú 'ngbé 'ti Ebhe gba omaYuda. La-a, yi holo ma de. Engú bini, nedhinga gba yi-e akolo, nedhinga gba ngámá na biti-o.»

*Piele apa me ni mbila Yesu de*

(*Tsia bhú* Mat. 26:57-58, 69-75; ne bhú Mlk. 14:53-54, 66-72; di ne bhú Dja. 18:12-18, 25-27.)

<sup>54</sup> Abhomu-o, u aholo Yesu, u anu ato aní bhú 'ti gba bhele kpála gba odimandθ gba Ebhe-o. Piele adu akpata uo mbo tsutsu. <sup>55</sup> A abhaka me u nde akpo djua tu mbadhasu, okpála adulu dede. Piele atsia ago adu bhú ká uo. <sup>56</sup> Kpála na kulu bini na θθθ au aní li zi djua me

ani nde adu kuto. Ani atsia Piele ne kpéke djila, ani me: «Kpála inde-e du di nako ne ani bhú dabili bini!» <sup>57</sup> Engú bini, Piele ayala, do ani de-e: «Ma ambila ani de, 00-e.» <sup>58</sup> Pita nedhinga bedi-e, bhoko bini au ani, ani atsia apa me: «Ngamu di-e, mu ne suka okpála gba Yesu-o!» Engú bini, Piele atsia agie me: «Bhoko-e, ma ne suka uo ade.»

<sup>59</sup> Pipita abhue mbo ngengele. Bhoko koko atsia azi kekele tété me: «A ko kukulu 'ngú, kpála inde-e du nako ne Yesu bhú dabili bini, anga a ko di kpála na Galilaya.» <sup>60</sup> Engú bini, Piele agie pi bhoko ang-o me: «Bhoko-e, ma mbila 'ngú inde mu ngapa e de.» Bha li nedhinga inde ani adu apapa lie, engu atsia aku 'gbá. <sup>61</sup> Ngámá Yesu adji bhúla e, ani atsia bhúla Piele. Abhomu-o, Piele atsia abhundja engú inde li ngámá Yesu apa igini e pi ani-o me: «Sukpe na naki inde-e, kala me engu ku 'gbá-a, mo opá bhutsibhutsi bata me ni mbila ma de.» <sup>62</sup> Piele akoto kilidjo, ani abh00 kuo e ne egbá má kusu!

*U asobho Yesu, u atsia abhi di ani*

*(Tsia bhú Mat. 26:67-68; di ne bhú Mlk. 14:65.)*

<sup>63-64</sup> Okpála inde adu alila Yesu-o aholo amu ani. U agbite djila ani. U aholo abhi ani. U atsia adu ayi ani me: «Aa! Ngamu, polofeta-a , pa nga pi ya me asu mu da!» <sup>65</sup> U asosobho ani. U atsia apa di ongu koko pi ani bhelé bhú osobho inde u adu asosobho ani ne e ko.

*Odimand0 akodho 'ngú gba Yesu*

*(Tsia bhú Mat. 26:59-66; ne bhú Mlk. 14:55-64; di ne bhú Dja. 18:19-24.)*

<sup>66</sup> Li ekpi aseke lie, obhelesi okpála gba omaYuda apok0bh0 bhúla o bhú dabili bini ne ongbengbe odimand0 gba Ebhe, di ne omusuno na líli gba Moidje-o. U atsia agbe ani kala Libi okpála natsia 'kpi li 'ngú gba

omaYuda-o. <sup>67</sup> U ayi anì me: «† du me mu nde ne Masiya-a, mu de pa pi ya.» Abhomu-o, anì agie pi uo me: «† du me ma nde apa pi yi-e, yi bhúka de. <sup>68</sup> † du la di me ma nde ayi yi li 'ngú-o, yi gíe 'ngú mu ma tété de. <sup>69</sup> Nayie pi mbia inde-e, ngama, Ndili gba kpála-a, ma adú li pápá na kokpa gba Ebhe na angu-o.†» <sup>70</sup> Abhomu-o, ndu uo hana atsia ayi me: «Bhobhomu-o apa me mu ne Ndili gba Ebhe?» Anì agie pi uo me: «A maka yi apa lie ko.» <sup>71</sup> Abhomu-o, u atsia apa me: «Ní matá ne gumu okpála koko inde i ti da napa engú angu-o pi ní ade, anga ní adje bha nganí makpe bhú 'li anì adje!»

## 23

*U anu* ne Yesu kala Pilatø

(*Tsia bhú* Mat. 27:1-2, 11-14; ne bhú Mlk. 15:1-5; di ne bhú Dja. 18:28-38.)

<sup>1</sup> Pipita-a, ndu okpála hana inde adu bhú dá bula-a ayie bhúlá, u atsia anu ne Yesu kala Pilatø, ngámá na Loma. <sup>2</sup> Oo, u aholo apa li Yesu me: «Ya abhaka kpála inde-e me anì nde ngaha kpéke 'ndji pi okpála gba ya-o. Anì nde ngayoko uo me u akala mandjandja gba Kaisala, 'ngbé ngámá na Loma-a de. Anì atsia adu apa di me ni ne Masiya, akunda napa me 'ngbé ngámá.»

<sup>3</sup> Pilatø ayi anì me: «Ngamu-o, mu ne 'ngbé ngámá gba omaYuda?» Yesu agie pi anì me: «Mo opa ngamu.»

<sup>4</sup> Abhomu-o, Pilatø atsia apa pi ongbengbe odimandø di ne bhiti okpála bhomu-o me: «Ma u engú bini inde a ayo me u holo kpála inde-e ngú e de.» <sup>5</sup> Engú bini, u azi bha kekele tété me: «Bhú nasuno gba anì-e, anì ngaha kpéke 'ndji pi okpála me u améne líli gba ngámá-a de. Anì amene bhú doto gba omaYuda libhomu. Anì akpo

† 22:69 22:69 Tsia bhú Ets. 110:1.

bhú ndu doto na Galilaya. Mbía inde-e, aní akolo ibili ne di ei.»

*U anu* ne Yesu kala ngámá Elode

<sup>6</sup> Li Pílatø adje lie mo-o, aní atsia ayi me: «Kpála inde-e, a ko kpála na Galilaya?» <sup>7</sup> U agie pí aní me: «A moko, a ko kpála na Galilaya.» Abhomu-o, li Pílatø adje lie me Yesu ayie bhú ndu doto li ngámá Elode adu alila e-e, aní atsia atima aní pí aní. Padhá de, anga bhú ekpí angoo, Elode adu di bhú Yelusalema oo. <sup>8</sup> Elode akpi djali naali li aní au Yesu lie. Padhá de, anga nayie nani didili naali, aní adu akunda me ni u Yesu ka engú gba aní inde aní adu adje e-o. Aní atsia adu akunda nau aní me aní nde ngamene ngamba 'ngú. <sup>9</sup> Aní ayiyi Yesu li ongú bhelé. Engú bini, Yesu gie 'ngú pí aní tété belegu de bini. <sup>10</sup> Ongbengbe odimandø di ne omusuno na líli gba Moidje adu oo. U adu apa 'ngú li kute aní sisiti naali. <sup>11</sup> Elode ne osudha gba e amu aní, u atsia asosobho di aní. Pipita-a, u adyi bádha bongo li aní, u atsia agie aní pí Pílatø. <sup>12</sup> Kalanu-o, Elode ne Pílatø du nadge lio de. Nayie li 'kpí angoo, u atsia akolo bhú makpolia.

*U akodho 'ngú* gba Yesu me aní kpi bha makpi

(*Tsia bhú* Mat. 27:15-26; ne bhú Mlk. 15:6-15; di ne bhú Dja. 18:39 – 19:16.)

<sup>13</sup> Abhomu-o, Pílatø apo bhúla ongbengbe odimandø, ongámási gba omaYuda di ne okpála. <sup>14</sup> Aní atsia apa pí uo me: «Yi ago ne kpála inde-e mu ma me aní ngaha kpéke 'ndji pí okpála. La-a, ma ayi aní li 'ngú angoo kala yi si, ma u aní ne siti 'ngú belegu de bini bhú ká ndu 'ngú hana inde yi apa e li aní-o. <sup>15</sup> Elode u di siti 'ngú ka aní de anga aní agie aní pí ní ei. A moko me kpála inde-e mene siti 'ngú belegu de bini inde u ti da nabhøø aní

ka e ko. <sup>16</sup> Kaka-a, ma abhí aní ne fimbo, ma atsia tsé 'kpa lí aní.» [ <sup>17</sup> Bhú ndu anokomia na Pasika hana, a ayo me Pilatø tse 'kpa lí kpála inde u aholo e bhú tikpu-o pí uo bini.]

<sup>18</sup> Engú bini, ndu uo hana aholo asusula bhú dabili bini me: «Bhøø kpála bhomu-o mabhøø, amba mu tse 'kpa lí Balaba pí ya!» <sup>19</sup> (U aholo nani Balaba bhú tikpu anga aní agbe nani kpéke 'ndji abhú Yelusalema, aní atsia abhøø di kpála.) <sup>20</sup> Pilatø adu akunda natse 'kpa lí Yesu. Kaka-a, aní atsia ayi matá uo lí 'ngú ango-o ko. <sup>21</sup> Engú bini, u aholo bha nasusula me: «Gí aní lí kulusi! Gí aní lí kulusi!» <sup>22</sup> Bhutsibhutsi na bata-a, aní apa pí uo me: «Aní amene la mangua siti 'ngú dho? Ma u engú inde aní amene e, u tí da nabhøø aní ka e de. Ma abhí bha aní ne fimbo, ma tsia tsé 'kpa lí aní.»

<sup>23</sup> Engú bini, u azi bha kekele tété kpekpeke me, a ayo me u gí Yesu lí kulusi. U adu bha a'é'e 'li o ne bhúlá, akolo lí nedhinga lí 'li uo aha angu Pilatø lie ko. <sup>24</sup> Abhomu-o, Pilatø atsia aziba namene maka u adu akukunda lie ko. <sup>25</sup> Aní atsia atse 'kpa lí kpála inde u adu ayo e-o, kpála inde u aholo e bhú tikpu-o. Padhá de, anga aní agbe kpéke 'ndji, aní atsia abhøø di kpála. Engú bini, aní atsia aha Yesu pí uo me u mene ne aní maka u adu akukunda lie ko.

*U anu* ne Yesu ngú nabhøø aní

(*Tsia bhú* Mat. 27:32-44; ne bhú Mlk. 15:21-32; di ne bhú Dja. 19:17-27.)

<sup>26</sup> Lí osudha adu anu ne Yesu lie, u akø lio ne Simo, kpála na ndu doto na Silene, me aní nde ayie abhiye. U aholo aní, u atsia a'o kulusi gba Yesu-o lí 'ngbu aní me, aní bíbí amba aní kpata Yesu ne di.

<sup>27</sup> Okpála bhelé adu akpata Yesu. Bhú ká uo-o, adu di ne olisi inde adu aku 'gbá ne nalopolo lio ngú ani-o. <sup>28</sup> Yesu adjí bhúla e ne apí uo, aní atsia apa pí uo me: «Ngayi, olisi na Yelusalema-a, yi akú 'gbá ngú ma de! Engú bini, yi ku mangbo egbá ngú yi ne ongisi gba yi ko. <sup>29</sup> Padhá de, anga oekpí koko akólo makolo, oekpí inde u apá lie me: «A ko djali pí olisi inde i zu de, inde i bi 'bhi de, di ne obhende li ongisi ndji 'ka o de-o!» <sup>30</sup> Li nedhinga bhomu-o, okpála ahólo napa pí ongbengbe 'ta me: «Yi buku ya!» U tsia pá pí odjedje 'ta me: «Yi wo ya!»<sup>†</sup> <sup>31</sup> Padhá de, anga i du me okpála nde amene ndula bhe na yiyi-e mo-o, u méne la ibili naae ndula bhe na keke-e pí?»\*

<sup>32</sup> Li nedhinga bhomu-o, u anu di ne obhosi bhisi koko inde amene sisiti 'ngú naali me u bhili uo bú dabili bini ne Yesu.

*U agi* Yesu li kulusi

(*Tsia bú* Mat. 27:45-56; ne bú Mlk. 15:33-41; di ne bú Dja. 19:28-30.)

<sup>33</sup> U akolo li bili inde u a'i e me «Pelegendji.» U atsia agi Yesu li kulusi di ne okpála na sisiti bhisi-o, koko li kulusi gba e li pá 'kpa aní na kokpa, koko li kulusi gba e li pá 'kpa aní na gali. <sup>34</sup> [Abhomu-o, Yesu atsia apa me: «'Dyi ma, mbu li siti 'ngú gba uo, anga u mbila engú inde u ngamene e de.»]

Osudha agu gbanda ngú nagapa obongo gba ani-e li o. <sup>35</sup> Okpála adu oo, u adu atsia engú inde adu akodho 'kpí-o. Ongámási gba omaYuda adu amu aní. U atsia adu apa me: «Aní akobho okpála koko. A ayo me aní kobho di lie ne titi e, i du me aní nde ne Masiya inde li Ebhe abhu

<sup>†</sup> 23:30 23:30 *Tsia bú* Oz. 10:8. \* 23:31 23:31 Ndula bhe na yiyi-e, a ko Yesu. Ndula bhe na keke-e, a ko okpála.



e ko!» <sup>36</sup> Osudha amu di ani. U adyudyo lio masikpe, u aha kpongadha pandi pi ani, u atsia apa me: <sup>37</sup> «I du me mu nde bha ndju ne 'ngbé ngámá gba omaYuda-a, mu de kobho limu ne titi mu!» <sup>38</sup> Pí 'ndji ani-e, u aye me: «A INDE-E 'NGBÉ NGÁMÁ GBA OMA YUDA-O.»

<sup>39</sup> Suka okpála na sisiti inde u agi o li kulusi adu asobho ani me: «Mu ne Masiya adi? Kobho limu ne titi mu, amba mu kobho di ya!» <sup>40</sup> Engu bini, bhe koko ambe bhú 'ndji ani, do ani de-e: «Mu kpe Ebhe di, ngamu inde ngasia bhadi likabhu maka ani-e? <sup>41</sup> Pi ní-e, a li likabhu gba ní-e ne tata, anga ní ngasia bhomu-o mbini kulu gba ní ko. La-a, ngaani-e, ani mene naae siti 'ngu belegu de bini.» <sup>42</sup> Pipita-a, ani atsia apa pi Yesu me: «Bhundja ma uu, li nedhinga inde mo ogó lie ngu nau ngámá gba mu ko.» <sup>43</sup> Yesu agie pi ani me: «Ma apa pi mu na paká me, naki-e, ní adu ne mu bhú dabili bini bhú kuti na munde yi ko.»

### *Yesu akpi*

<sup>44</sup> A akolo masikpe de tulukpe, ela a'o nasu. Biti aha píla doto libhomu akolo li saa na bata pita tulukpe. <sup>45</sup> 'Ngbé 'kpá bongo inde adu agbo bhusu 'ngbé 'ti Ebhe gba omaYuda asidha bhusu e tutu má tsue! <sup>46</sup> Abhomu-o, Yesu atsia asula kpekpeke me: «'Dyi ma, ma nga'o bua ma sa 'kpa mu.» Pita ani apa engu bhomu-o lie, ani atsia andala 'kpa li bua e. <sup>47</sup> Li ngámá gba osudha na Loma au engu inde akodho 'kpí-e lie, ani atsia adu adhogho Ebhe me: «A ko paká me kpála inde-e bha ndju nako ne kpála na ngbingbili!» <sup>48</sup> Ndu okpála hana inde ago apo bhula o ngu natsia engu ango-o, au engu inde akodho 'kpí-o. U atsia adu agie lio agba o me u nde abubu 'kpa o pí 'ka o ka likabhu. <sup>49</sup> Ndu obi Yesu hana di ne olisi inde adhaku

ne aní bhú dabilí bini nayie bhú Galilaya-a, alulu mbo tsutsu. U adu natsia engú inde adu akodho 'kpí ko.

*U azi Yesu*

(*Tsia bhú* Mat. 27:57-61; ne bhú Mlk. 15:42-47; di ne bhú Dja. 19:38-42.)

<sup>50-51</sup> Kpála bini adu nani oo. A adu 'li ani me Djodjefu, kpála na Alimaté, suka gudhu gba omaYuda. A ko nani kpála na babadha inde adu di ngbingbili. Ani adu nani nadjeke nago ka Nau gba Ebhe píla doto. A ko nani suka Libi okpála natsia 'kpí li ongu gba omaYuda-o. Engú bini, ani du aziba engú inde li Libi okpála natsia 'kpí li ongu gba omaYuda adu abhundja e di ne namene e li Yesu-o de. <sup>52</sup> Ani anu abhaka Pilatə, ani atsia ayo kuo Yesu ka ani. Pilatə aziba. <sup>53</sup> Pipita-a, ani atsia a'e kuo ani li kulusi-o. Ani agagala ne bongo. Ani atsia ato bhú lata inde u adjí e bhú teme, lata inde u zi nga kpála bhú e kalanu de. <sup>54</sup> A adu nani 'kpí kulu bhuluvue, masikpe de ekpí naguo .

<sup>55</sup> Olisi inde ayie nani ne Yesu bhú Galilaya-a, anu bhú dabilí bini ne Djodjefu. U atsia lata-o, u au maka u a'o kuo Yesu lie bhúbhú-o. <sup>56</sup> Pipita-a, u agie lio agba o. U atsia aleke emu, di ne mungotsi ngubula me sisi-e, u nu pulu kute kuo-o ne di. Li 'kpí naguo-o, u atsia aguo maka li líli apa lie ko.

## 24

*Yesu azuku*

(*Tsia bhú* Mat. 28:1-10; ne bhú Mlk. 16:1-8; di ne bhú Dja. 20:1-10.)

<sup>1</sup> Bhú 'kpí yinga kəkpí má bhé-o, olisi aha mungotsi inde u agili e-o, u atsia agbida abhú lata. <sup>2</sup> U abhaka me teme nde awawala li 'bhə lata-a awawala. <sup>3</sup> U ali lie, u bhaka kuo Ngámá Yesu de. <sup>4</sup> Nedhinga u adu akiaka lie

ka 'ngú angó-o, kolo me-e okpála bhisi aze li uo. Okpála angó-o adyidyí bubu bongo má tuu tuu! <sup>5</sup> U adu la lie ne tsulu naali-e, u atutu bhúla o ne kuto. Okpála angó-o atsia apa pi uo me: «Yi ngagili kpála inde uu-o bhú ká okpála inde amu-o ka ni? <sup>6</sup> Aní sii ade. Engú bini, aní azuku. Yi bhundja engú nako aní apa e pi yi li nedhinga inde aní adu nga bha lie bhú Galilaya me: <sup>7</sup> «A ayo me u pu ma, Ndili gba kpála, pi okpála na sisiti. U gi ma li kulusi, amba bhú 'kpí na bata-a, ma tsia zuku.»  
<sup>8</sup> Abhomu-o, u atsia abhundja 'li aní-o.

<sup>9</sup> U ayie bhú lata-o. U atsia anu nakpokpo ndu 'ngú bhomu-o hana pi obhulu titima ndjikpa ne ká bini, di ne ndu obhende adu ne uo bhú dabili bini-e hana. <sup>10</sup> Olisi angó-o, adu nani Malia , kpála na gudhu na Magadala, Djaani ne Malia , 'hi Djaki. Ngauo ne olisi koko inde adu bhú dabili bini ne uo akpokpo pi obhulu titima gba Yesu-o. <sup>11</sup> Engú bini, obhulu titima abhundja naao me, engú inde li olisi akpokpo e-e, a ko engú na ngingi. Kaka-a, u tsia bhuka de. <sup>12</sup> Engú bini, Piele ayie bhúlá, aní anu ne holo abhú lata. Aní akolo lie oo, aní akita ne kuto, aní atsia 'kpí, aní au bha bongo inde u agagala kuo ne e ko. Pipita-a, aní agie lie agba e me aní nde ngangamba naali ka engú inde akodho 'kpí ko.

*Yesu akoto li omukpata bhisi li kpadji na Emausi*

*(Tsia bhú Mlk. 16:12-13.)*

<sup>13</sup> Bha li 'kpí angó-o, omukpata bhisi adu anu bhú kuti bini inde u a'í e me Emausi. Kuti angó-o adu de Yelusalema tsutsu, masikpe de kilometele ndjikpa ne ká bini. <sup>14</sup> U adu akpokpo 'ngú sunda o pindji ndu 'ngú hana inde akodho 'kpí-o. <sup>15</sup> Nedhinga uo adu akpokpo 'ngú di ne namene kpekebhe lie sunda o-o, ngaani Yesu makpe, aní adyudyo lie de uo masikpe. Aní atsia aholo

'nú ne uo bhú dabili bini. <sup>16</sup> U adu au ani, engú bini, ehe bini adu amene me u ambíla ani de. <sup>17</sup> Ani ayi uo me: «A ko mangua 'ngú dho yi adji ne kpokpo e sunda yi me-e?» Abhomu-o, u alu, u atsia abedhe ne likabhu bedhe.

<sup>18</sup> Suka uo bini inde adu 'li e me Keleopasi apa pi ani me: «Bhú ká ogomago na Yelusalema libhomu-o, engú inde akodho 'kpí sunda okpí inde-e, mu mbila bha de ngamu kpi mu kpi?» <sup>19</sup> Ani ayi uo me: «Mangua 'ngú dho?» U atsia agie pi ani me: «Engú inde akolo li Yesu, kpála na Nadjaleta! A ko nako polofeta kukulu. Ongú inde ani amene e ne bhende ani asuno e, ani amene ndundu hana ne angu. Ani atsia asuno ongú angu-o kala Ebhe di ne kala ndu okpála hana. <sup>20</sup> La-a, ongbengbe odimandø gba Ebhe di ne ongámási gba ní-e, apu ani me u bhøle ani. U atsia agi ani li kulusi.

<sup>21</sup> La-a, ya adu nako ne 'to ya naaya me, a ko kpála inde agbégbé tsalaele bhú bali-o. Engú bini, a ane naki ekpí bata maka li oengú angu-o akodho 'kpí lie ko. <sup>22</sup> La matá di-e, ya angamba ka olisi koko bhú ka ya naali. U anu igini bhú sikikpi abhú lata. <sup>23</sup> Engú bini, u u kuo ani de. U agie lio, u apa pi ya me oandjelu aze lio. Oandjelu atsia apa pi o me ani uu. <sup>24</sup> Pipita-a, okpála koko bhú ká ya anu abhú lata, u atsia abhaka ndu 'ngú hana maka li olisi akpokpo lie ko. Engú bini, ngaani makpe-e, u u ani de.»

<sup>25</sup> Abhomu-o, Yesu atsia apa pi uo me: «Yi ne ongingi! Ka ni yi ngabhuka lie má gala ade ndu 'ngú hana inde li opolofeta-a apa e! <sup>26</sup> A ayo nako de me Kilisito dje likabhu kala me ani li bhú nau na asasaua gba e di?» <sup>27</sup> Pipita-a, ani aholo nakpokpo ndu 'ngú hana inde u apa e pindji ani bhú oBhuku gba Ebhe-e pi uo. Ani akpokpo

nayie bhú obhuku gba Moidje akólo bhú obhuku gba ndu opolofeta-a hana.

<sup>28</sup> U akolo lie de kuti inde u adu anu bhú e masakpe-e, Yesu amene mugito me ni adji tsutsu. <sup>29</sup> Engú bini, u atsia apa pi ani me: «Ní si ne yi si, anga ekpí asegele, biti la di ngago.» Aní atsia alí ngú nasi bhú dabilí bini ne uo oo ko. <sup>30</sup> Nedhinga aní adu azu 'he lie bhú dabilí bini ne uo-o, aní aha mapa, aní agie heni pi Ebhe. Pipita-a, aní agumu mapa-o, aní atsia aha pi uo. <sup>31</sup> Abhomu-o, djila uo abhulu, u atsia ambila aní. Engú bini, aní angita bha kolo bhú djila uo má pele! <sup>32</sup> U atsia aholo nayi lío sunda o me: «Li nedhinga inde aní adu akpokpo 'ngú di ne nasuno ta eli gba Ebhe lie pi ní lí kpadji-e, bua ní bedhe igini bhú ní ne djali bedhe di?»

<sup>33</sup> Bha lí nedhinga bhomu-o, u ayie bhúlá kolo má gala, u atsia agie lío abhú Yelusalema. Oo, u abhaka me obhulu titima ndjikpa ne ká bini-e nde apo bhúla o ne obi o-o bhú dabilí bini. <sup>34</sup> U atsia apa pi obhe bhisi bhomu-o me: «Ngámá azuku na kukulu! Simo au aní!» <sup>35</sup> Pipita-a, omukpata bhe bhisi-e atsia akpokpo 'ngú inde akodho 'kpí lí kpadji-e pi uo, di ne maka u ambila Yesu lie lí nedhinga aní agumu mapa lie ko.

*Yesu asuno lie pi omukpata gba e-o*

*(Tsia bhú Mat. 28:16-20; ne bhú Mlk. 16:14-18; ne bhú Dja. 20:19-23; di ne bhú Kul. 1:6-8.)*

<sup>36</sup> Lí nedhinga u adu nga bha lie nakpokpo 'ngú ango-o, Yesu atsia alu bhú ká uo. Do aní pi uo me: «Guo 'ngú du bhú dabilí bini ne yi!» <sup>37</sup> U adje tsulu naali, u atsia aholo aguku, anga u adu abhundja me o ou igbadyibhe. <sup>38</sup> Engú bini, Yesu atsia apa pi uo me: «Yi ngadje tsulu ka ni? Yi ne bua na bhisi bhisi ka ni? <sup>39</sup> Yi tsia nga 'kpa ma

di ne 'dhu ma, a ko bha ma makpe. Yi tana nga kute ma, amba yi u, anga mbilika ne biki li igbadyibhe ade maka yi ngau ma lie ne di ko.» <sup>40</sup> Ani apa engu bhomu-o lie, ani atsia asuno 'kpa e di ne 'dhu e pi uo. <sup>41</sup> Li djali di ne nangamba aha angu uo lie naali-e, u tsia bhuka ngaiza de. Ani atsia ayi uo me: «Mbo 'he nazu mazu ka yi si uu?» <sup>42</sup> U atsia aha ndu sungu inde u azi e mazi-e pi ani. <sup>43</sup> Ani aha, ani atsia azu li djila uo oo.

<sup>44</sup> Pipita-a, ani pi uo me: «Ma apa nako pi yi ndjindji nedhinga ni adu nga bha lie bhú dabili bini-e me, a ayo me ndu 'ngú hana inde u aye e pindji ma bhú líli gba Moidje , bhú obhuku gba opolofeta di ne bhú bhuku na oetsi gba ní-e, amene lie.» <sup>45</sup> Pipita-a, ani atsia abhulu imbilangú gba uo ngubula me u mbila ta engu inde u aye e bhú obhuku gba Ebhe ko. <sup>46</sup> Ani atsia apa pi uo me: «Maka u aye lie bhú obhuku gba Ebhe-e me, a ayo me Kilisito dje likabhu, amba ani tsia zuku bhú 'kpí na bata. <sup>47</sup> A ayo me okpála kpokpo 'ngú gba ani-e pi ndu okpála hana píla doto libhomu. U akpóko nayie bhú Yelusalema me okpála dji bua o, amba Ebhe 'e siti 'ngú gba uo ko. <sup>48</sup> Yi au engu inde akodho 'kpí-e ne djila yi makpe. <sup>49</sup> Ngama-a, ma atíma pi yi bhende li 'Dyi ma apa me ni atíma e-o. Kaka-a, yi du bha bhú gudhu si akólo li 'kpí inde li Ebhe atíma angu pi yi lie ko.»

*Ebhe aha Yesu abhúlá*

(*Tsia bhú* Mlk. 16:19-20; di ne bhú Kul. 1:9-11.)

<sup>50</sup> Pipita-a, Yesu anu ne omukpata gba e masikpe de kuti na Betania. U akolo lie oo, ani a'e 'kpa e, ani atsia atuko bisagu pí uo. <sup>51</sup> Li nedhinga ani adu atuko bisagu pí uo lie, ani ayie bhú ká uo. Ebhe atsia aha ani abhúlá. <sup>52</sup> Ngauo-o, u adhogo ani. Pipita-a, u atsia agie lio abhú Yelusalema me u nde abedhe ne djali bedhe. <sup>53</sup> Ndu 'kpí

Luka 24:53

119

Luka 24:53

hana, u adu nadi bhú 'ngbé 'ti Ebhe gba omaYuda ngu  
nadhogö Ebhe.

## Gandja na Mbia

### Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c